

**EIGHTH LEGISLATIVE ASSEMBLY OF MIZORAM
(ELEVENTH SESSION)**

LIST OF BUSINESS

FOR THIRTEENTH SITTING ON FRIDAY, THE 24th FEBRUARY, 2023
(Time 10:30 AM to 1:00 PM and 2:00 PM to 4:00 PM)

QUESTIONS

1. **Questions** entered in separate list to be asked and oral answers given.

PRIVATE MEMBERS' BUSINESS

2. * **Resolutions**

LALHMAHRUAIA ZOTE
Commissioner & Secretary

* Please see Bulletin Part-II No. 290, dated the 22nd February 2023 for relative precedence of Private Members' Resolutions to be moved.

SPEAKER : *Chutichuan, nang chuan I Pathian hnen lam hawi la; Khawngaihna leh rorelna hmang la, I Pathianah chuan innghat fo rawh.*

- Hosea 12:6

QUESTIONS & ANSWERS

Zawhna & Chhanna kan la nghal ang a. *Starred Question* No. 201 - Zawt turin Member zahawm tak Dr. Vanlaltanpuia ka sawm e.

DR. VANLALTANPUIA : Pu Speaker, ka lawm e. *Starred Question* No. 201 - School Education Department changtu Minister zahawm tak hnena ka zawhna chu – “Lunglei North huam chhunga school building sak that tur lists min hrilh thei em?” tih a ni e. Ka lawm e.

SPEAKER : Chhang turin, a changtu Minister zahawm tak Pu Lalchhandama Ralte ka sawm e.

PU LALCHHANDAMA RALTE, MINISTER: Pu Speaker, Member zahawm tak Lunglei North bialtu Dr. Vanlaltanpuia zawhna chhanna chu –

“Lunglei North huam chhunga school building sak that tura tuna ruahmanna kal lai chu - Govt. MS, Bualpui ‘V’ leh Govt. PS, Mausen additional classroom siamna turte a ni e. Hei hi NABARD-27 atan rawt a ni.

SPEAKER : *Zawhbelhna* - Zawhna neitu, member zahawm tak Dr. Vanlaltanpuia.

DR. VANLALTANPUIA : Pu Speaker, ka zawhbelhna chu –

Tun thla ni 8-a notification chhuakah khan Zotlang High School Headmaster kan nei loh reng hi min dah sak a, kan lawm hle a. Amaherawhchu, Govt. High School Mualthuam North-a Headmaster hi min transfer sak a, Govt. High School Haulawng-a Headmaster min transfer sak bawk a. A bik takin Haulawng High School hi exam centre a ni a, Headmaster neih loh hi a rem lo tlat mai a, min transfer sak ho hi min dah leh sak thuai thei ang em?

SPEAKER : *Zawhbelhna* - Member zahawm tak Pu Lalduhoma.

PU LALDUHOMA : Pu Speaker, ka lawm e.

Ka hriat sual loh chuan kum 2019 vel kha niin ka hria a, sorkarin MR tih tlem tial tial a tum laiin, MR teacher thahnem tak lak a ni a, an hlawh hi ni 1-ah ₹520/- a ni a. Thingtlang kilkhawrah deuh vek an awm a, a thente chuan headmaster charge te an la hlawm a. Headmaster charge an lak lai khan an hnuaiah khan an aia hlawh tam ten an

thawk a, discipline pawhin a tuar a. Heng ho hi provisional employees-ah tal hlankai theih a ni em? Ruahmanna a awm em? tih ka zawt a ni e.

SPEAKER : *Zawhbelhna* - Congress lam kan sawm ve ang e. Member zahawm tak Pu C. Ngunlianchunga.

PU C. NGUNLIANCHUNGA: Pu Speaker, ka lawm e. Budget session demand sawiho lai khan ka sawi a, mahse min react-na ka hre lo tlat mai a, ka han zawt nawn leh duh a ni -

i) Kan bial Lawngtlai West lamah hian Higher Secondary School kan la nei ve miah lo mai a, Bungtlang South leh Diltlang-ah khuan private ang reng deuhin an din a, Samagra atang te hian min dah sak ve thei ang em?

ii) Lawngtlai district-ah khian High School Headmaster post ruak hnawh khah tumna a awm em? Tun MNF sorkar chhung hian seniority hi vawihnih lai tih a ni tawh a, Lawngtlai leh Siaha lam hian kan chang lo ve khawp mai a, henge hi min tih sak thei ang em?

iii) Kan Minister nen pawh hian kan sawi thin a. Vawiin hian House-ah min hrilhfhah se ka duh chu - District Council-ah sawn provincialization avangin State sorkar hian school enkawl a nei a, school pakhatat zirtirtu 2, Mizoram staff leh Council staff an awm kawp tlat mai a, hei hi sorkar hmasa atang pawha kan buaipui a ni a, vawiin thlengin a la kal a, administration a buaithlak khawp mai a. Chuvang chuan, provincialization staff zirtirtute hi district council-ah an dah luh theih mai lo em ni, Elementary chu district council chan a ni si a?

iv) Pu Speaker, lump-sum grant high school kan bialah 2 a awm ve a, a buaithlak khawp mai a, ₹2,50,000/-in kum 1 an inenkawl a ni. Henge hi ad hoc-a hlan chhoh theih a ni ang em?

SPEAKER : Chhang turin Minister zahawm tak Pu Lalchhandama Ralte ka sawm e.

PU LALCHHANDAMA RALTE, MINISTER: Pu Speaker, Member zahawm tak tak te zawhna chhanna atan –

Zawhna neitu Dr. Vanlatanpuia sawi ang khan, tunhnaiah High School Headmaster LDE-a tling te leh promotion-a kal chho te kan han nei a; chutih rual chuan pension-a chhuak eng emaw zat kan neih reng bawk avangin, han siksawi kual te kan nei a. Member zahawm tak Pu C. Ngunlianchunga zawhna pakhat Headmaster chungchang nen khan a chhan kawp theihin ka hria a. A then kan pelut a, a then kan lachhuak bawk a, hetiang hian indaihlohna kan neih ve avangin a theih ang angin kan sem rual a. Lunglei North, Zotlang lamah pawh khan an neih ngai reng reng loh headmaster thar kan han pe a. Chutih rual chuan a sawi ang khan, Haulawng leh Mualthuam North an school dinhmun te kan han thlir a, zirtirtute dinhmun enin.

Headmaster hi tun tumah hian hmundangah kan dah pawhin senior teacher, headmaster charge la thei awmte an awm tho bawk a, distrcet capital-a headmaster neih lohna school lian taka dah ngai te a awm bawk si a, anmahni khua te pawh a lo ni bawk nen, ‘helai hi la chhuak teh ang’ tiin kan han la chhuak a, a thenah kan pek belh thung a.

Chutiang chiahin, Lawngtlai West bialtu zawhna, “Siaha leh Lawngtlai lamte headmaster kan va khat deuh ve?” tih pawh kha, tun tumah headmaster han pek thar tlemte kan neihah Sangau - Blue Mount High School-ah headmaster thar kan pe a, a hnukung berah khan. Tin, Tipah-ah headmaster kan pe bawk a; a hmasa khan Siaha High School-ah kan pe a, saw lai ‘Zero Point’ kan tih thin, a hming thar berah khan kan pe bawk a ni. Siaha District-ah pawh 3 kan pe a, sawlai district-a school dangah pawh pek kan nei a ni. Lawngtlai bik tak saw Regional High School, Lawngtlai sawn headmaster a nei lova, pek pawh kan duh a. Amaherawhchu, hun rei tawh tak atangin headmaster charge kum 10 zet lo la tawh, khawtlang pawhin headmaster anga an ngaih saw, promotion file a kal mek a. Chu chu, sawi dawt ila, saw tianga thahnem ngai taka lo awm tawh a nih avangin, reiloteah hian pek theih mai tur kan nei dawnin kan hria. Chulai te chu headmaster bikah chuan ni sela.

Member zahawm tak, Serchhip bialtu Pu Lalduhoma rawn zawhna – “MR teacher 2019 September thla a kan lak mi 881 te kha ₹15,000/- kan pe a, an lawmman tihpun hret te leh service awm ze nei zawk PE-ah te dah theih an ni em?” tih kha, sorkar pawhin a en chho mek a, theih ang angin DP & AR-ah te pawh “provisional employee-a an luh ve dan a awm em? MR tihboa, PE-a dah vek tawh an nih avangin” tiin department pawhin rawtna kan siam a, a kal mek a, examination stage-ah a awm a. Member dangte pawhin, “₹15,000/- a han inchhawr reng mai hi, lawmman tihpun theih a ni lo maw” ti te pawh an awm a. Hei hi, kan lak lai khan MR skilled-II rate kha kan pe a ni; ₹520/day hisapin. Tunah hian ka department chan tho Labour, Employment lam atang hian kan minimum wages te ennawn turin rawtna kan siam a, cabinet agenda-ah reiloteah hian tih luh a ni ang a. Chuti hunah chuan eng le khaw le, PE-ah an awm lo a nih pawhin, skilled-II hlauh tihsan turin Finance Deptt. nen pawh en ho tawh a ni a, reiloteah hian anmahni pawh a rawn nghawng chho turah kan ngai a ni.

Lawngtlai West bilatu khan zawhna chhawng kha a ngah a, han chhang dawn ta ila. ‘Higher Secondary School hi west lamah hian kan nei lo khawp mai a, SAMAGRA atangin min pe thei ang em le?’ a ti a. Nikum PAB-ah pawh khan rawtna kan thlen thla a, a bulah pawh ka sawi tawh angin, Delhi lamin an rawn pawm zingah khan a tel lo hlauh mai a, kumin April-ah hian PAB Delhi-ah neih leh tur a ni dawn a, chutah pawh chuan rawtnaah kan lo telh leh ngei ang a, a hlawhtlin ngei pawh beisei ila. A pek lek pek loh lai tak hi chu Delhi lamin a final thin a, lo telh kan tum dawn nia.

School upgradation chungchang hi nimin lamah pawh kan MLA zawng zawng ten in sawi a, thahnemngai takin mahni bial chung zirna te, private-lumpsum ah,

lumpsum ni lai adhoc-ah, adhoc ni lai te ‘provincialize theih dan a awm lo em ni’ tih kha, chutiang tur chuan keini department lam pawh theih tawpin kan inbuatsaih a, theih tawpin kan zir a. Tum khatah kan tih vek theih loh pawhin a tahtawl tal a, kan sum dinhmun nen en milin, ‘tih theih dan a awm ang em’ tiin Council of Minister-ah pawh kan thlen a. Kan Finance Minister, Chief Minister ni bawk nen pawh sawiin, a ni pawhin min veipui em em a. “Rawtna han siam leh chhin ula, financial enin, a minimum deuh pawhin han rawt chhin teh u,” min ti a. Finance Deptt-ah tunah hian sum leh pai mamawh neih tura kan rin te a thawh-khatnaah hetiang hian kal theih ni dawn ta se, tiin rawtna pawh kan thlen a. Chu chu tunah hian ngaihtuahnaah a awm mek a ni.

PU K.T. ROKHAW : Pu Speaker, khawngaihin. Ban ka phar thin a, tun tum chu ka chang tlat lova. Ka zawhna chu –

- i) SEDP teacher hi lakbelh a ni dawn em? Lak belh ni ta se, thingtlangah chuan a khaw neitu ngei lak ni se.
- ii) Tin, ka biala Adhoc Grant-in-Aid school - TC High School leh Siata High School building te hi a chhe tawh lutuk a, NABARD fund atangin min sak sak thei ang em?

PU LALCHHANDAMA RALTE, MINISTER: Pu Speaker, Palak bialtu hi education-ah chuan min tawiawm tha thei khawp mai a, thahnem a ngai thei khawp mai a. Tuna a sawi pawh kha kan lo chhinchhiah thlap ang.

Tin, I veilama thuten SEDP teacher min lawmpui em em leh, anmahni bialah stop-gap arrangement-a kan kalpui dan min appreciate hi lawmawm ka ti a. Chu ngei chu tuna kan kalpui lai, zirtirtu 701 SEDP-hnuaiia kan kalpui pawh hi, tun financial year kal lai hi March Ni 15 velah a tawp dawn a, academic session thar hi April atang hian a dang kalpui leh tur, a ngai a ni emaw, a dang a ni emaw pawh, kalpui leh tur a ni dawn a, chu pawh chu kan Chief Minister nen sawiho tawhin, rawtna te pawh sum tam zawk, pension-an lo awm zel a, mamawhna lian zawk a awm zel avangin, ‘a khawi mi ngei ni ang’ tiin, rawtna ang khan ‘lak chhunzawm zel a nih theihna turin sum leh pai pawh min siamsak leh thei lo em ni’ tiin niminah pawh kan sawi dun a. ‘Lehkha pawh a tharrawn siam leh rawh’ a ti a, niminah vek khan DO pawh ka submit leh tawh a. Tin, school sak tur hi ‘NABARD-ah hian min cover thei em?’ tih zawhna pawh kha kan lo chhinchhiah phawt dawn nia.

Ka sawi laklawh lai kha chhunzawm leh ila. Lawngtlai West bialtuin a sawi, “Autonomous Council Lawngtlai leh Siaha District lam hi Sixth Schedule hnuaiia awm an ni a, elementary hi dan angin Sixth Schedule kuta awm a ni. Amaherawhchu, tunah hian dual administration-a awm a, kan buai khawp mai” a tih kha, CADC hi chu hun hmasa lamah an lo tifel then tawh a, a vaiin an kutah a awm tawh a. Lawngtlai leh Siaha lamah hian Middle School thenkhatah hian district council school leh state sorkar school te an awm kawp a, administration-ah pawh a buai a, a area-a zirnaah pawhin a tuar a ni. Chu chu ‘engtin nge kan siamthat ang’ tiin council hotute nen kan sawiho a, Council

EM Education leh CEM-te nen pawh kan sawi a, ruahmanna te kan siam a. ‘A theih a nih chuan a pahnih hian aw khatin kal sela, cabinet agenda-ah i buatsaih teh ang’ kan ti a. Mahse, a modalities turah khan council hrang an nih avangin, an duh dan leh ngaihdan a lo hrang a. Chuvang chuan, kan duh angin a kal chak thei lova.

Tun hun bikah hi chuan LADC lam hi chu anmahniin felfai takin, Mizoram sorkar hnuaiia thawk zawng zawng pawh coucil hnuaiia luh vek an duhna pawh association ang pawhin an rawn thlen a. Council pawhin ‘anmahni council-ah absorb vek theih dan awm thei se’ tih duh tawna a lo thleng tawh a. Chu chu process-in, keimahni pawhin theih ang tawkin kan office lamah pawh kan buaipui a ni.

MADC kha sorkar a inthlak leh hret avangin sorkar kal hmasa te nen kha chuan aw-khat kan nei hman a, tuna sorkar thara education changtu te nen kan la inhmu lova, tlem kan han nghak a; a theih a nih chuan aw-khatin, cabinet agenda-ah dah chhoha ruahmanna tha siam kan duh a ni. Chuta a theih ngang lo a nih chuan, LADC tal hi chu kalpui hram, hi mimal ang tak pawhin ka duh a. Tuna zawttu member zahawm tak pawh khan a ngaihdan a nih avangin, chutiang chuan kan council nen pawh hma kan la a, kan kalpui mek a ni e.

SPEAKER : *Starred* Question No. 202 - zawt turin member zahawm tak Dr. Vanlaltanpuia ka sawm e.

DR. VANLALTANPUIA : Pu Speaker, vawiina tana zawhna ballot a nih lai hian ka zawhna hi a chhuak hmasaah atang hlauh mai a, a vanneihthlak ka ti a. *Starred* Question No. 202 - Minister zahawm tak Environment, Forests & Climate Change Deptt. changtu hnena ka pek duh chu -

- a) Tuihna humhalhna scheme sorkarin engnge a kalpui mek?
- b) Tlawng hnar (hei hi ‘Lunglei’ tihna a ni a) humhalhna sorkarin a kalpui em?

SPEAKER : Chhang turin a changtu Minister zahawm tak Pu TJ Lalnunluanga ka sawm e.

PU TJ. LALNUNTLUANGA, MINISTER: Pu Speaker, MLA zahawm tak Dr. Vanlaltanpuia zawhna chhanna chu-

- a) Soil & Moisture Conservation works-te kalpui thin a ni. Venhimna lamah pawh hmalak tel niin, Forest (Conversation) Act, 1980-ah chuan, ‘central sorkar phalna la hmasa lo chuan (forest clearance nei hmasa lo chuan) Reserved Forest, Notified Forest leh ramngaw dang reng reng huamchhungah ramngaw tih changtlun hna (thing phun/soil & moisture conservation works) tih chauh lo chu, eng hna mah kalpui phal a ni lo.
- b) Tlawng hnar humhalh hi sorkarin a kalpui e.

SPEAKER : *Zawhbelhna* - Dr. Vanlaltanpuia.

DR. VANLALTANPUIA : Pu Speaker, ka lawm e. Ka zawhbelhna chu –

Lunglei khawpui tui tlan hi Tlawng-Pialthleng hmun atanga pump a ni a. Kan hriat angin Zobawk-ah sawn Tlawng hian hnar a nei a, chumi atanga Pukpui ram tui lakna thleng saw a thui lo em em mai a, chuvang chuan tui hian source tha a neih theihna turin, sawlai catchment area humhalhna saw a pawimawh em em a. Kan Minister zahawm tak hian uluk lehzualin forest tunhnaia tlahniam zel, a bik takin sawlai area saw uluk takin min enpui leh thei eng em?

Uar deuh hleka ka sawi duh chu - thal a lo ni a, tunhnaiah tui pump tur a awm chhe ta em em mai a, chuvang chuan a vel ramngaw humhalh hi tuihna humhalhna atan pawimawhin ka hria a. Chu chu ‘uluk deuhin, kumina hma kan lakna turah hian min kalpui se’ tiin ka chah duh a. Chutiang chuan min kalpui thei ang em?

Pahnihnaah chuan - Demand pharh lai khan ka zawt a, min hrilh ta chiah lo a. Tunlai hian silai *precihole* tih vel ho, kap dik em em mai, kah thelh theih mang loh khawpa dik ang ho chi hi a tam ta riau mai a. Savate hi an kap thla nasa thei em mai a. Rah tlan hmun deuha han chan pheih chuan a hlawm hian an kap thla nasa thei em em a; heng silai khapna siam hi a pawimawh hle mai. Heng khapna dan hi sorkar hian a nei em? Ka lawm e.

SPEAKER : *Zawhbelhna* - Pu Lawmawma Tochwawng ka sawm e.

PU LAWMAWMA TOCHHAWNG: Pu Speaker, ka lawm e. Ka zawh belhna hi VC changtu LAD lamah khan ka zawt tawh a. Amaherawhchu, a concerned Department-ah zawh belh leh a ngai a, department leh department inkar a nih avangin ka han zawt leh dawn a ni.

Lungpuizawl VC chungchang kha, 1980 atangin Lungpuizawl-ah hian mihring an cheng tan a, sorkar phalna thlapin 1997-ah khan VC an nei tan a. Tunah sawn mi 1004 chengin, in 170 an awm a; sikul pahnih, middle school leh primary school te a awm bawk a ni. Biak In saw pathum a awm a, community hall tha tak leh VC house tak tun hnaiah pawh kan sa a ni.

Chutih lai karah chuan, Pu Speaker, an VC area hi buaina leh harsatna awm lovin lungmuang takin an khawsa ve thin a. LSC te pawh neiin, chung an siam lai chuan department lam atang hian objection pawh a awm ngai bawk hek lova. Amaherawhchu, chutia lungmuang taka an awm lai chuan, Ni 8.2.2022 atang khan an eizawna ber,

lung-lak leh an LSC te pawh chu renew zel khap sakin an awm ta a. Tunah sawn lungngai mangangin, meialh en hmabakin an awm ta a ni.

Pu Speaker, Zawnei Jeremia ang mai khan chu thu chuan kei pawh, “Ka mi, ka fanute natnaah chuan ka na ve si a”, tih dinhmunah min dintir a ni. Chumi avang chuan an hrehawm tawrhna leh an manganna sut kian sak tur sawn khawngaih takin kan Minister hian a hma thei angin hma min lak sak thei ang em?

SPEAKER : Aw le; a theih ang ang chhang turin a changtu Minister zahawm tak Pu TJ Lalnuntluanga ka sawm e.

PU TJ. LALNUNTLUANGA, MIMISTER: Pu Speaker, kan MLA zahawm tak, Pu Tanpuia zawhna, Lunglei khawpui tui lakna chungchangah khan, saw lai Tlawng hnar leh Tlawng dungah pawh hian theih ang tawkin Forest Department hian hma a la thin a, soil moisture conservation hnuaiah hian hma lak a ni a. Tin, dan hnuaiah a humhalh theih theih te kan han humhalh bawk a. Chutah chuan tun hnuaiah pawh contour trenching kan ti a, tlang chara tui khur laih te, he mi lei chung hnawng leh lei tha te a kal liam zel lohna tura tan, khatia chambang thei tur khan check-dam te kan kalpui mek a. Thla hmasa lawkah te pawh khan la thawh mek a ni a. Khatiang khan catchment area te tunah hian venhima, khatiang leitha leh tuihna te humhalhna tur khan CAMPA leh fund dang atangin hma lak a ni a.

Tin, tunah hian JICA Project kan beisei mekah pawh a component lian ber pakhatat kan dah bawk a. Hei hi a hlawhtlin hun chuan saw lai Catchment Area zawng zawng saw kan SMC work te nen tang hovin, awmze nei zawkin leh tuihna te pawh kan humhalh thar leh turah kan ngai a. Tuihna te pawh kan siam thar leh turah kan ngai a ni.

Tin, silai chungchangah ‘a khapna awm em’ tih kha, Home Department te nen hma lak tlan a ni a. Silai license pek te pawh hi, he mi ‘a kap dik deuh chi’ ti khan a mawl zawngin sawi mai i la, khang license pawh kha pekchhuah phal a ni lova. Sava kah nan phei chuan *Wildlife Protection Act, 1972* hnuaiah hian khap a ni a. Chutiang chuan tunah hian hma lak a ni a.

Amaherawhchu, mihring indaih loh deuh bawk nen, awareness la chak tawh loh deuh vang te pawha la awm a niang a. Hengah hian duh angin hma a lak kim theih loh a. Chutih rual erawh chuan a mipuiah chuan he mi sava nungchate humhalhna leh nungchate kahhlum a tihlum ang chi hi kan fimkhur tlang a, kan in zirtir chho ta viau mai a. Naupangah phei chuan tunah hian heng savate leh nungchate hmangaihna a lian chho hle tawh a ni.

Tin, Pu Speaker, member zahawm tak Pu Lawmawma Tochwawngin zawhna - Lungpuizawl khua te harsatna tawh chungchangah khan, saw lai dinhmun saw Tlawng

protection chungchangah 1965 notification hnuiaah humhalh kha a lo ni a. Chuvang chuan harsatna tam tak saw laia mipuite tawh pawh a lo ni a, tin, High Court-ah *PIL 7 of 2021* thlengin lo thehluh tawh a ni a. Chumi avang chuan saw laiah sawn dan lova thil chet-lakna tur reng rengte khap lailawk rih a ni a, hengte hi case kal lai mek a ni a. Chuvang chuan, eng pawh ni se la, saw laia Lungpuizawl bialtute harsatna leh, an hmuh phaka an inkhawngaihna chungchang hriatpuuin, theihtawpa hma lo lakpui, a *Dan* hnuiaia tih theih ang chin china lo puiah kan tum dawn nia tih kha ka chhanna ni se a tha ang e.

SPEAKER : *Starred* Question No. 203 - zawt turin member zahawm tak Pu Lalduhoma ka sawm e.

PU LALDUHOMA : Pu Speaker, GAD changtu Minister zahawm tak chhana tan, kan zawhna-

- a) Ainawn Veng-ah sorkar quarters repair emaw, sak that leh ngai emaw engzat nge awm?
- b) Repair emaw, sa tha leh turin emaw hmalak a ni em?

SPEAKER : Chhang turin GAD changtu Chief Minister zahawm tak Pu Zoramthanga ka sawm e.

PU ZORAMTHANGA, CHIEF MINISTER: Pu Speaker, kan member zahawm tak Pu Duha zawhna Chhanna chu -

- a) Ainawn Veng hi a hmaa ‘Govt Complex’ tih kha a ni a. Ainawn Veng-ah hian sorkar building 47 a awm a, chung building-ah te chuan quarters 184 a awm a. Sorkar quarters te hi upa tawh tak an nih hlawm avangin thiah vek tura hmalak mek a ni a. Chuvang chuan, sak that emaw, repair emaw pawh hi tihzui a ni tawh rih lo a ni.
- b) Inspection te, verification report hrang hrangte thlir hona leh zir hona GAD kaihhruaina hnuiaah Ni 11.7.2022-a Secretariat Conference Hall-a neih chuan, Ainawn Veng-a sorkar building leh quarters te hi a upat hlawm tawh em avangin, a chhunga chengte mai bakah, a chheh vela chengte tan him tawh lovah ngaiin, ‘thiah vek ni se’ tiin rawtna a siam a. He rawtna hi Council of Ministers ngaihtuah tura chhawp-chhuah atan buatsaiha, kalpui mek a ni. Hetianga hmalakna kal mek a nih avang hian, repair emaw, sak that tumna emaw hian hma lak a ni lova. Sorkar atanga renovation emaw, repair emaw kalpui thin pawh tih tawp a ni tawh nghe nghe a ni.

SPEAKER : *Zawhbelhna* - Pu Lalduhoma ka sawm e.

PU LALDUHOMA : Pu Speaker, kha, hma lak mek chungchang kan han ngaithla a, a lawmawm ka ti khawp mai a. Amaherawhchu, kan Aizawl New Market anga thiat siin, kan sa leh si lo ang a, rei deuh mai buai deuhin mi kan siam leh ang tih ka hlau deuh a. Chuvang chuan, a la luah theih tawng tawng chhung chuan thiah rih loh ni se, sorkar in a thiat a, a sa nghal thei dawn a nih chuan a lawm awm khawp ang a. Khalai kharawn fimkhur sela, ngun takin kha kha ngaihtuah ni se ka duh a.

Pahnihnaah chuan - Brig. T. Sailo hun lai khan khulai khu sorkar hmunpui atana zuah a ni a, amaherawhchu, a hnuah a thil tithei thei khan LSC an nei ta a, kan ram tichhetu atana ram hruaitute'n hma kan tawng thin hi a pawl khawp mai a. Tichuan, ram an nei ta sup sup a, tunah khuan mimal ram nei sorkar hriatpui eng emaw zat an awm a, chumi hrulah chuan mi eng emaw zat thlai te pawh lo chinga, in lo sa ve ta mai an lo awm ta a; kha kha endik vek tawh a ni a. A thil titheia te chauhin ram an neih theiha, heng ho - in leh lo te lo din ve tawh, huan thlai pawh lo nei tawh nana na, sorkarin a hman tangkai si loh ram awla lo awm te hi chu, 'pass i pe teh ang u' tih hi inthlan lai apiang hian kan tiam thinin ka hria. Khalai kha, In lo ding tawh chin tal kha pass siam sak tum a ni ta em?

SPEAKER : *Zawhbelhna* - Dr. Vanlalhlana ka sawm e.

DR. VANLALTHLANA : Pu Speaker, ka lawm e. Kan Minister zahawm tak, GAD changtuin a chhan atan –

Nimin piah *Unstarred* zawhna No. 243 ah khan, DP&AR Minister zahawm takin re-employed te DDO atan hman theih an nih loh thu a rawn tarlang a. Amaherawhchu, tunah hian Principal Consultant, Aviation hi re-employed a ni a, DDO in kan hmang a ni. Hetah hian eng *Dan* nge hman a nih? *Delegation of Power Rules* te a awm a, *GFR, 2017* te a awm a, Finance Department ten pawhin *Dan* te an nei ang a. Hetah hina eng *Dan* nge hman a nih? April Ni 10, 2019 ah khan HoD ah kan dah a, chuvang mai chuan DDO a ni ta mai em ni? Tunah hian a *Dan* hman a hi lo dik lo ta se, engtia hma lak tur nge ni ang?

SPEAKER : Ruling lam sawm ve a ngai ta. Member zahawm tak Pu Zothantluanga *zawhbelhna* zawt turin ka sawm e.

PU ZOTHANTLUANGA : Pu Speaker, ka lawm e.

Session hmasa lamah khan nangmah pawh khan Chair atang khan i ngaihpaawimawh zia leh, Ainawn Veng chungchang chinfel i duh thu kha i rawn sawi a, a lawmawm khawp mai a.

Ainawn Veng hi a hma chuan ‘Govt. Complex’ tih a ni a, LSC pek te hi ‘a hming hian a tihar a ni ang a?’ tih ngaihtuahna te pawh a ni ang e, tunah hian an veng hming an thlak a, ‘Ainawn Veng’ tiin. Sorkar hmun, ‘Govt. Complex’ tih a nih khan LSC pek te hi a lo har em ni? Mi rethei leh harsa te te ten tunah khuan In an nei a, nimahsela, an in leh lo theih tawpa an lo din hmang khuan loan han lak ve an tum pawhin an la thei lova, LSC an neih tlat loh avangin.

Campaign laiin ka intiam ve miah lo nain, tunah hian Mizoram hmangaihtu tak sorkar a awm lai hian, Revenue Department-in survey an ti vek tawh tho si a. Tunah hian GAD kutah hian a awm mek a. Helai ram hi, thil tithei tam tak an awm lain, tam tak khu chuan thil hi an la ti thei lo tho mai a; thil tithei tam tak khuan hmun leh hma lo nei bawk mahsela, thil tithei ve deuh deuh, lal ve deuh deuh te pawhin an nei thova. Chutih lai chuan mirethei te te te an ni a, chuvang chuan tun kan sorkarah ngei hian permanent settlement an neih theihna turin hma min lak sak theih ang em? Tin, khami sorkar rama kha chu kan Chief Minister-in a rawn chhan ang khan, identify vek a ni tawh a, sorkar ram ni lova in hmun LSC han peka hi a harsa viauin a lang lova. Tin, survey hi 90% emaw ni hi chu zawh tawh a ni a, chuvang chuan thil har lutuk awm awmin a lang lova.

Tin, Pu Speaker, kan pekloh hian hnawhchhuah ngaihna an awm tawh chuang lovin, an nunna thap pawhin an chenna khu humhalh an tum tho tho tawh ang tih a rinawm a. Chuvng chuan, ‘chinfel a ngai hrim hrim a ni’ tih hi chu kan sorkar chak tak hian min hriat sak sela, ‘tun sorkar chung ngei hian min chinfel sak sela’ tih hi ka ngenna a ni e. Ka lawm e.

SPEAKER : Awle; zawhna te a inpersan khawp mai a, ‘Ainawn Veng’ tih atanga ‘re-employ’ tih te a ni a. A theih ang ang chhang turin Chief Minister zahawm tak Pu Zoramthanga ka sawm e.

PU ZORAMTHANGA, CHIEF MINISTER: Pu Speaker, re-employ kha chu tunhma khan fimkhur vak lo khan DDO-ah te han hman mai te kha a awm thin a. Chuvangin tunah chuan, ‘hman loh ni sela’ kan ti a. ‘Principal Consultant pawh kha lo ti tawh lo rawh u’ kan ti a, DDO-ah kha chuan hman tawh loh a ni e.

Tin, *Zawhna* neitu Pu Duhoma zawhna – “fimkhurin, thiat mai rih lovin kal ni sela, chuti lo chu kan thiah sak ang a, kan sak leh mai theih loh takin” tih kha, a dik khawp mai a. Hei hi kan ngaihtuahnaah pawh a awm a –

Sorkar tan pawh rilru insuala chu - A inte a chhe tawh si a, a zuk en tute’n, “tumah awm tawh lo sela, thiat vek ni rawh se; chuti lo chu, engemaw palh, lirnging fahranah pawh lo chim ta sela, engatinge in chhuah tir loh?” ti sela, mi nunna chungchang thuah khan mawh kan phurh kan hlau ang reng si a.

Tin, lehlamah, “Chhuak vek rawh u; kan thiat dawn” ti ila, an luhna tura kha kan siam theih siloh chuan, lehlamah chuan problem a awm bawk si a. Engpawh nise, tunah chuan Expert Committee DC hova thute pawhin “Awm ngamna chi a ni tawh lo; anmahni, a chengte mai pawh ni lovin, a bula awmte tan pawh a hlauhawm tawh a nia” an rawn ti a. Chumi avang chuan thiat turin an rawn recommend a, sorkar pawhin kan en mek a. Engpawh nisela, khang a *humanitarian point* te kha ngaihtuah chungin, a intahtawl deuh hleka tihdan te a awm em? ‘Hei hi chu a la ziaawm deuh hlek a, heta inruk tuak deuhvin hei hi chu a awm ngam tawh ngang lova, thiat ila, hetah hian quarter pawh han sa ila’ tih lam te pawh kan en ang a.

Engpawh nisela, tunah hi chuan khang kan hotute rawtna kha keini pawh kan rilrua awm a ni a. Quarter-a mi awm tha lai, “chhuak rawh u, helai hmunah hian a dang kan sa dawn” tih pawh a hreawm khawp ang a. Chuvangin, a inruak tuak theih dan kawng ngaihtuahin, tunah pawh DIET ramah sawn quarter kan sa a, khata tanga a dang thiah tura te inruak tuak tawn turin kan ti mek a, khatiang deuh khan tihdan pawh kan lo en ang a. *Entirnan* - A chhe zualah a ruak a tam thova, khang kha thiatin tunah chuan sorkarin SASCI atangin emaw, a pawisa a awm ang anga, a ruak tuak tura te kha an tam vak lo a nih pheih chuan, a tihtheih kan ring a. Khati zawng khan member zahawm takte zawhna kha sorkar lam pawhin kan ngaihtuahna a awm tho a ni a. Ina mi harsatna siam lutuk lo tur khan tihdan kan lo zawng ang a.

Tin, a lo awm fel tawh sate, member zahawm tak Pu Zothantluanga rawn sawi ang khan sorkar hmasa lamah pawh an ngaihtuahna a lo ni tawh tho bawk a, “tuna mi chin hi chu inpek fel law law mai ni sela; LSC hi, lehlama sorkara an chawi ve tur leh pek ve tur ang chi awm tur a nih leh tifel law law mai sela, LSC te inpek fel law law kha a tha mai lawm ni” tiin sorkar hmasa lamah pawh khan ngaihtuahna a lo awm tawh a, keini pawhin kha kha kan ngaihtuahna a ni. Chuvangin, tunah hian ‘GAD-in cabinet memorandum han siam rawh u’ kan ti a, kan ngaihtuah mek a ni a. Tun sorkar chhung hian tihfel ngei, LSC nghet la nei tur ten an neih theih nan tih kan tum e.

Tin, chu chang a ni lova, hemi connect-ah hian Bawngkawn Brigade ram pawh sawn a ni bawk a, sawlai pawh saw enfel rual a ngai dawn a. Kan lo enfel ang a, a bik takin Ainawn Veng chu enfel zual tur a nih avangin zawhna pawh lo chhuak a ni a. A connect thil dangah pawh chin fel thei ang chin chin sorkarin a hma lama ching fel turin GAD pawh ‘cabinet paper rawn siam rawh u’ kan ti a, an siam a. ‘Rei vak lovah chin fel kan tum e,’ tih kha tuna kan chhanna chu a ni e.

SPEAKER : *Starred* Question No. 104 - zawt turin member zahawm tak Pu Lawmawma Tochhawng ka sawm e.

PU LAWMAWMA TOCHHAWNG: Pu Speaker, ka lawm e. Hon. Minister, Disaster Management & Rehabilitation Department chhan atan, ka zawhna chu :-

“Chhiatna chi hrang hrang tawkte hnenah kum 2022 chhungin tanpuina engzat nge pek a nih tawh?” tih a ni e.

SPEAKER : Chhang turin a changtu Minister zahawm tak Pu Lalchamliana ka sawm e.

PU LALCHAMLIANA, MINISTER: Pu Speaker, member zahawm tak Pu Lawmawma Tochwawng zawhna chhanna chu –

“Chhiatna chi hrang hrang tawkte hnenah kum 2022 chhungin tanpuina ₹4,24,63,580/- pek a ni tawh” tih a ni e.

SPEAKER : *Zawhbelhna* - Dr. ZR Thiamsanga, Member zahawm tak ka sawm e.

DR. ZR. THIAM SANGA : Pu Speaker, kan kawr rawng te vawiin chu a inang deuh a ni a; min rawn hmuh hma a, ka lawm khawp mai. Ka zawhna chu –

Ka bial chhung khaw pawimawh tak mai, Neihdawn, Khawzawl atanga inkalpawhna Tuimuk Lei hman deuh lawk khan a chim rup mai a. Neihdawn Lei khi PMGSY kawng a ni a, amaherawhchu, provision a awm loh avangin khi lei khi dawhchawp mai mai a ni a. Hmanni khan Dy. Chief Minister leh keimah tang hoin MLA fund-in kan dawh a, amaherawhchu, khi a chim ta rup mai si a. Fur a nih chuan Neihdawn khua khi kal ngaihna a awm dawn lova, tunah khian tui a tlem avangin kan la kal tawk tawk a; tiau lungte kan han tikhawm a. Kan Minister zahawm hnenah pawh ka thlen tawh a, min ngaih pawimawh sak viau a; department-ah pawh kan thlen tawh a. Khi khi fur a thlen hma ngeiin min dawh sak thei ang em, khawngaih takin?

SPEAKER : *Zawhbelhna* - Pu C. Lalsawivunga ka sawm e

PU C. LALSAWIVUNGA: Pu Speaker, ka lawm e. Disaster Management and Rehabilitation Department changtu Minister zahawm tak chhan atana ka zawhbelhna chu –

Nikumah khan Republic Veng-ah lei che avangin harsatna kan tawk a, amah pawhin a hmunah min rawn enpui a, kan lawm hle a. Step a thar hlak siam a ngai a, drain pawh awmze nei taka siam ngai a ni bawk a. Tin, electric hrui connection line pawh kha hlih a ni bawk a, khita chengte khian harsatna an tawk nasa em em mai a. Chuvang chuan, step thar siamna tur atana leh drain siamna tura estimate proposal awm tawh te leh electric hrui han thlunzawmna tura ruahmanna awm hi chak takin hma min laksak thei ang em? Mipui manganna a nih avangin theihtawp min rawn chhuahpui thei ang em?

SPEAKER : Chhang turin Minister zahawm tak Pu Lalchamliana ka sawm e.

PU LALCHAMLIANA, MINISTER: Pu Speaker, member zahawm tak Dr. ZR. Thiamsanga khan, Tuimuk Lei siam kha a ngai pawimawh khawp mai a. Amaherawhchu, mi thenkhatin an sawi ang deuh hian DM & R hi lei siamtu kan ni lova, a buaithlak khawp mai a. Emergency thil tak takah chuan, thingzai te, thingtuai te hmang hian kan ti ve naw naw thin a ni. ‘Emergency thil a nih loh chuan, kan khawih loh lam deuh a ni’ tih kha ka chhanna ni mai sela.

Tin, member zahawm tak Pu Lalsawivunga’n a sawi kha a dik khawp mai a. Nikum February thla khan ‘NDMA’ an tih, Union Home Ministry hnuai awm khuan State mitigation fund hman dan te, State disaster reponse fund hman dan tur guidelines thar arawn siam pek a, chu chuan min phuar ta a. Ka sawi thiam dan chuan, Central-a project lianpui pui crore tela crore 10, crore 100 tel te an tih dan ang khan, hnathawh tur awm reng reng kha DM & AR hnuai a hna pawh kha, nuai 2 emaw, nuai 3 lek emaw pawh ni sela, ‘Appraisal committee-in a endik phawt tur a ni; chumi zawhah chuan, SDMA hnuai a State Executive Committee, Chief Secretary hoin, chu committee chuan a approve leh tur a ni; chumi hnuah chuan sanction a theih chauh ang’ tih guideline arawn siam pek a. Kan Director te, kan Secretary te leh a changtu Minister te pawh a ni ang chu, an kut a phuar ta a ni. Kha Appraisal Committee-ah khan ‘SDMA Member-Chairman a ni ang’ a ti a. Tichuan, technical department – PWD te, P&E te atang khan member lakhawm kha a lo ngai ta a, chu chuan DM & AR hnuai a hna hi a timuang ta em em mai a ni. A bikin khatiang chhiatna lo thlenga chhawmdawlna tur ‘mitigation fund’ kan tih bikah hian, Republic Veng-ah chhiat-tawhna pawh kha, a bialtuin a sawi ang khan, engkim estimate chu siam vek tawh a ni. Ka hriat sual loh chuan, Appraisal Committee pawhin a pawm tawh a, SEC pawhin a pawm tawh a, sanction tunah hian siam mek a ni. Reiloteah hian hna tan theih kan beisei a ni.

SPEAKER : *Starred Question* No. 205 zawt turin Member zahawm tak Pu Lalduhoma ka sawm e.

PU LALDUHOMA : Pu Speaker, GAD Minister zahawm tak chhan atan, ka zawhna *Starred Question* No. 205 chu -

- a) Ni. 14.8.2019-a spiritual sub-committee din kha ala ding em?
- b) He sub-committee hian eng te nge a tih tawh?
- c) Chaplain Office sakna tur atana Ni 6.2.2020-a SEDP sum sanction cheng nuai 29.05 kha hman a ni ta em?
- d) A nih loh chuan, eng vang nge? A sum kha eng atana hman nge anih tak?

SPEAKER : Chhang turin GAD changtu Chief Minister zahawm tak Pu Zoramthanga ka sawm e.

PU ZORAMTHANGA, CHIEF MINISTER: Pu Speaker, Member zahawm tak Pu Duha zawhna chhanna chu –

- a) A la ding e.
- b) Spiritual sub-committee hmalaknain gospel camping wawi 6 neih a ni tawh.
- c) Ni 6.2.2020-ah SEDP sum atangin Chaplain Office sakna tur sanction a ni lo.
- d) A chungah chhanna ang khian, sanction a ni lo.

SPEAKER : *Zawhbelhna* zawt turin a zawhna neitu, Member zahawm tak Pu Lalduhoma ka sawm e.

PU LALDUHOMA : Pu Speaker, ka zawhna chhanna hmasa leh tuna chhanna ka hmuh kha a inkalh tlat mai a. Ka *starred* Question No. 120, Ni 28.2.2020-a ka zawh a chhannaah chuan, ‘SEDP hnuaiia chaplain office sakna tur cheng nuai 29.05 kha Mizoram sorkar hnuaiia Finance Deptt. in Ni 6.2.2020 khan sanction a tichhuak a, hman a la ni lo’ tih a ni a. ‘Sanction tawh si, hman a la nilo’ tih kha, tunah hian hman a ni ta em? Mahse, khatiang kha awmlo ang khan min chhang leh ta si a; a eng ber kha nge thudik?

Tin, he spiritual - sub-committee hi kan lo hriatthiam dan chuan, sorkar khalth ngiltu tur, sorkar hmasa congress huna ‘ethics committee’ an tih ang deuh turah khan kan lo ngai a. Tuna kan sorkar dinglai tawngtaipuitu tur leh khalth ngiltu tur bakah keini legislator-ho te pawh a tul anga tawngtainate min neihpuaia, helaia office te pawh nei ve, a building pawh sak vea, khatiang thlarau lampanga kan innghahna tur deuhah khan kan lo ngai a. Khawi emaw lai hmun danga camping va neih lampang a ni taa kha. Hei, a building pawh kan sa leh dawn tawh chuang lo anih kha chuan, hetiang hi chu ti tawh lo law law ila a tha mai lawm ni?

SPEAKER : Awle; a theih ang anga chhang turin Chief Minister zahawm tak GAD changtu, Pu Zoramthanga ka sawm e.

PU ZORAMTHANGA, CHIEF MINISTER: Pu Speaker, Spiritual sub-Committee hi Social Rehabilitation Board an thutkhawmin sub-committee chi hrang hrang an siam a, chutah chuan a *thlarau-lam nun* deuh, a bik takin khatih laia an target kha chu Jordan Centre-a awmte enkawlina kha a ni a, Spiritual sub-Committee an tih pawh khan, kha kha an target zual a ni. A dang pawh tul anga tih a ni a, rampum huapa khatia lianpuia kalpui vak pawh kha a ni lova. Chuta tan chuan Ni 14 August khan siam a ni a, Spiritual sub-Committee hi. Social Welfare-in order pawh a siam a ni a, Mizoram Kohhran Hruaitu kha committee chairman ni sela, Secretary-Member ah Upa K. Lalthawmmawia - Tuikual North te, Member ah - Rev. Vanlalbela - Bawngkawn te, Upa Denghmingthanga - Kulikawn te, Pu C. Vanlalmawia Chhakchhuak, Asst. Director, Social Welfare te kha member anni a, a hnu ah Lt. Col. Vanlalthanga leh Rev. JC

Vanlalluaia te dah belh leh anni a. Amaherawhchu, an han target deuh, Jordan Centre-a hmalak an han tih khan, camping te buatsaihin an han ti tan a, khata an target a pui ber kha covid a lo thleng a, a luah theih ta lova, covid-care centre atan an lan leh ta si a. A hnu ah te pawh khan an ti thova, camping pawh vawi eng emaw zat an han neihpui a ni.

Amaherawhchu, ram pumpui thila committee lianpui leh thiltih tuma a tirah pawh din a nilo, Social Welfare-a board awmin khami bik atana kohhrante nen ruihhlo ngaite kan enkawlnaah hian, hmakhai rual zawka kan kal theih nan 'heti hian i ti ang u' tia din kha a ni a. Amaherawhchu, ka sawi ang khan covid avangin khami a pui bera pawh a luah leh theih tak si loh avang khan an tum angin hna an thawk thei ta lova. Kha kha chaplain office lampang nen khan connection a nei lo hrim hrim a.

Camping erawh chu, kan hriat ang khan vawi 6 lai an han nei nghe nghe a ni. Tin, 'chaplain office tur' tih kha, chaplain office hi airport-ah a hma khan a awm thin a, 'a hranpa in sak ni sela' tiin sanction pawh cheng nuai 29 siam a ni a. Amaherawhchu kha ringawt kha chuan, a hranpaa airport kan siamthatna tur nen khan, a kawta cheng nuai 29 vel leka building han tih kha tih theih a ni ta lova. Chuvangin a tam zawk (a amount chiah kan hre ta lova) nuai 100 chuang fe sanction-in, mithi an lo thlena mipuiin kan lo receive-na tur, pawnlam mite tana kan chawlh hahdamna tur leh, canteen anga hman theih tur, 'a lian tha law law hi i sa teh ang; hetah hian a tul angin a dah theih tho a lawm' an ti a, chutah chuan a chidang zawkin an kalpui ta a. Sak a ni a, an la zo lo deuh hlek a. Khu khu tha takin a sanction ang chaplain tan bik ni lovin, canteen leh mitthite kan lo receive-na tur atan sum tam zawk, a crore chuang fea sak a ni. Kan la zo lo deuh hlek a, 'zawh thuai kan tum e' ti kha ka chhanna a ni e.

SPEAKER : *Starred Question* No. 206 - Zawt turin Member zahawm tak Pu Lalrintluanga Sailo ka sawm e.

PU LALRINTLUANGA SAILO: Pu Speaker, ka lawm e. School Education Department changtu Minister zahawm tak chhan atan ka zawhna chu -

- a) Mizoram sorkarin school building/MDM kitchen building chhe zualpuite sak that tumna a nei em?
- b) Nei ni se, engtikah nge hna tan a nih theih ang?

SPEAKER : Chhang turin School Education Department Minister zahawm tak Pu Lalchhandama Ralte ka sawm e.

PU LALCHHANDAMA RALTE, MINISTER: Pu Speaker, Member zahawm tak Dampa bialtu, Pu Rintluanga Sailo zawhna *chhanna* chu -

- a) MDM kitchen building hi central scheme PM-POSHAN hnuiaia sak a ni a, a chhia leh sak ngai te central sorkarah rawtna kan thlen mek e.
- b) Central sorkarin sum min pek hun hunah sak tura ruahman a ni.

SPEAKER : *Zawhbelhna* - Zawhna neitu Member zahawm tak Pu Lalrintluanga Sailo ka sawm e.

PU LALRINTLUANGA SAILO: Pu Speaker, ka bial chhung khaw tam taka MDM kitchen building te a chhe em em hlawm a, a bikin Khawrihnmim, Lungphung leh Silsuri te hi min ngaihtuah sak theih dan, eng emaw kawng zawng talin a awm thei em aw?

SPEAKER : *Zawhbelhna* - Member zahawm tak Pu Ramthanmawia.

PU RAMTHANMAWIA : Pu Speaker, ka lawm e. Ka zawh hmain - hei Khuangleng High School hi matric exam centre a ni a, hun rei tak headmaster nei lovin kan awm a, tunhnaiah headmaster tha tak mai kan Education Minister-in min pek a vangin lawmthu ka sawi a.

Ka *Zawhbelhna* chu - Vaphai Higher Secondary School din a ni a, kan Minister zahawm takin a hawn sak nghe nghe a. He school ah hian result tha em em kan nei thin a, 100% te an passed a ni. Hei hi, 'he sorkar kumtharah hian lumpsum tala min hlankai sak ve dan te a awm em?' tih ka zawt e.

SPEAKER : *Zawhbelhna* - Pu C. Lalsawivunga hmanhmawh deuh in ka sawm e.

PU C. LALSAWIVUNGA: Demand-ah khan ka sawi tawh tho a, mahse kan Minister zawhna ka pe duh a. (Speaker: Ngawi rawh aw. *Zawhna & Chhanna* hun a tawp a, zawt zo se, chhang zo law law se kan remti em? (*House-in a remti a*))

Pu Speaker, ka lawm e. I kaihhruaina hnuaia rorel chu a nuam khawp mai; kan zalen halh mai a.

Ka *Zawhbelhna* pakhatna - Govt. Bethlehem Vengthlang High School, Govt. Central High School, Govt. Republic Primary School-I te hi sak that ngai a ni a. A building te a hlui em em tawh a, kum 30 an chuang deuh vek tawh a ni. Hei hi, 'a tharin min sak thei ang em?' tih a ni a.

Tin, Pahnihna chu - Repair & maintenance ngai, Govt. Middle School Bethlehem Veng, Govt. Bible School Venghlui, Govt. Aizawl High School Republic Veng te hi a chhuate a tlahniam a, Zun-in te, Ek-in te a lei bei-bui tawh a; a bangte, a tukverhte a tlabal tawh bawk a, repair a maintenance tih ngai a ni a. Chu chu kan Minister hi min khawihsak thei ang em?

SPEAKER : Awle; chhang turin Pu Lalchhandama Ralte, a changtu Minister zahawm tak ka sawm e.

PU LALCHHANDAMA RALTE, MINISTER: Pu Speaker, zawhna neitu Pu Lalrintluanga Sailo khan, 'kan MDM kitchen te a chhe tawh hle mai a,' tia a bial chhunga mi a sawi kha, khatiang tho kha Zoram hmun tam takah kan kitchen set, midday meal (chhun chaw) kan pek te a chhumna hmun a ni tlangpui a; a chhe tawh hlawm khawp mai a. Tuna ruahmanna kan neih mekah chuan, kum 10 china upa tawh ho zawng zawng a repairna tur ₹10,000/- Zoram pumah pek kan tum a. 'Kum 10 china upa repair kan tum' tih kha tuna a zawhna, a school han mention bakah kan member tam tak, zawh chak tak takte pawh kha ka chhan kep nghal a nih chu.

A dawt lelah chuan, East Tuipui bialtu Pu Ramthanmawia zawhna kha, lawmthu nen - Khuangleng High School 'headmaster rei tak neilo kan pe' a tih ang deuh khan, headmaster kan han sawn thenkhat hi kan han bun tuak vel thin a ni; tiang te kha a nih zia a rawn nemnghet a.

Vaphai Higher Secondary School (private) hi 'Lumpsum Grant-in-Aid ah min dahsak thei ang em?' tih kha, ni e, kan sawi tawh ang khan Lumpsum Grant-in-Aid a dah turte, Adhoc a dah turte, provincialized tur te, chumi a tana sum leh pai mamawh te sorkarah kan thlen mek a. Hengte hi kan hotute nen kan lo thlir ang a, tih theih hmasak hunah kan lo hre dawn nia.

Tin, Aizawl South-I bialtu Pu C. Lalsawivunga zawhna kha - School hming kha han lam diat diat emaw, a school mal ang khan kan chhang tawh lo mai ang a, hun a tawi a.

Kha kha kan lo record zel a; heng School-te hi hmanna kan sawi ang khan khawpui chhung bikah hian harsatna tam tak kan nei a, *minor head* atang hi chuan eng eng emaw han ti zeuh zeuh kan nei a, a bial chhung Bethlehem Veng-ah leh hmun dang dangah pawh tih kan nei tho a. Major work deuh hi NABARD scheme hnuaia school siamthatna kan neih hi thingtlang tan chauh a nih a vangin, khawpuia mi tur hi kan dap mek tih a ni. Ka beisei dan chuan, Samagra PAB-II a crore 30 kan neih hi school hrang hrang, a chhe zual, a thar sak ai mahin major repair turte leh minor repair tihna tur hi kan dil a, tunah hian beiseiawm deuh chuan kan hmu a. Amaherawhchu, a taka release leh kan account-a a rawn luh hma hi chu, kan puin a sawi ang deuh hlek khan, thlang lampang han sawi hi a tak a thlen hma hi chuan 'kan ti dawn e' han tih dawt kan la ngam lo deuh a, mahse, beiseina sangtak kan nei a ni.

Khang kan han sawi ho - khawpui chhunga school hrang hrang member dang sawi thingtlang school te pawh a theih ang ang, major repair te, minor repair ngai te pawh tih theih tumin department kan inbuatsaih mek e.

PRIVATE MEMBERS RESOLUTION

SPEAKER : Awle, kan tih leh turah kan kal ang a. Vawiinah hian kan hriat tlan angin kan *dan 27(1)* in a sawi angin Private Members Resolutions kan tih ni/kan lak ni a ni a. Vawiin, Ni 24 a kan sawiho tur hi Ni 21 (Thawhlehi) khan ballot a ni a. Chutah chuan Resolutions 16 lai thlanchhuah a ni a. Tin, bulletin-ah kan rawn pek tawh che u kha.

Resolutions No.1 kan la ang a - “*Kawngpui tha leh building tha kan neih theih nan tun aia ulukin hna thawh ni rawh se.*” tih a ni a. Tunah Resolutions neitu member zahawm tak Pu Lalchhuangthanga, move turin ka sawm e.

PU LALCHHUANTHANGA: Pu Speaker, ka resolution - “*Kawngpui tha leh building tha kan neih theih nan tun aia ulukin hna thawh ni rawh se*” tih ka move thei hi ka lawm hle mai.

Kawng tha neih chungchangah hian resolution hi he House zahawm takah hian sawiho a lo ni tawh thin a. Ni 21 November, 2014 ah khan Dr. K. Beichhua resolution putluh a ni a, Ni 16 October, 2015 ah khan Pu Vanlalzawma resolution sawiho a ni bawk a. Ni 16 March, 2018 ah khan Pu K. Sangthuama resolution putluha sawiho a ni tawh bawk a ni.

Tun kan sorkar thar lo piangah khan member zahawm tak Pu Zothantluanga resolution, “*MNF ministry in hunreilote chhunga Zoram dung leh vanga kawng chhe tak a siamtha mai thei hi lawmawm kan ti hle,*” tih kan ngaihtuah a, kan sawiho tawh a nih kha. Tun tuma ka resolution hian a tum chu - *kawngpui tha, building tha zawk leh tlo zawk* a kan neih theih nana rawn pulut ka ni. Kawng, building tha leh tlo hi kan hnam tan a pawimawh em em a, ‘hmasawna a tana thil pawimawh ber a ni’ tih te pawhin kan sawi thei awm e. Member zahawm tak takte pawhina kan buaipuia, kan vei em em chu - kan bial chhunga *kawngpui tha neih* a ni a. Chuvangin, kan kawngte hi a lo that a, a lo tlo zawkna turin he resolution hi ngaituah ila ka ti a. He resolution hi department hnathawk emaw, a changtu Minister emaw sawisel tum ngawr ngawrna a ni lova, kan zavaia kawng tha leh tlo kan neih theih nan ‘ngaihtuahna te hmang tlang ila’ tih kha ka rawn put luh chhan chu a ni.

Kan kawng thatloh chhan hi chu ‘kan lung hman chan tawh loh vang’ kan ti a, phai lam atangin lung chang tha zawkte kan chaw lut a, mahse a tlo chuang lem lova. ‘Kan ramah ruahtui a tla tam’ te kan ti a, keini aia ruahtui tla tam kan state thenawmah Meghalaya te an awm tho a. Tin, ‘motor lian rah vang a ni’ te kan han ti a, kan state thenawmah te chuan kan rama motor lian lo kal thin aia lian leh rit zawk phurte an tam em em zawk a ni. State thlaler bera awm kan ni a, kan thenawmte aiin motor te pawh a tlan tlem em em a, chuti chung chuan kan kawng siamte hian fur khat em pawh a daih

lo thin a, hei hi eng nge a chhan ni ang? ‘a kaikuang hi a awm tur a ni’ tih kha tun tuma kan sawihona point a tana ka duh ber chu a ni.

Tin, ka lo hmuh ve dan chuan, kawng chhiat chhan ber chu -*corruption* hi a ni. ‘A hmu tur hre saa tender chhuah’ an tih mai, *restricted tender* hmanga hna inpek te, mi hminga hna kan thawh tirtle leh hna kan hralh chhawng thinte hi kan kawngpui chhiat chhan chu niin ka hria a. Chuvang chuan, heng kawng tha leh building rotling sak kawngah hian ngaihtuahna thui tak kan sen hi a tul tawh tak meuh meuhin ka hria.

Kawng siam nan kumtin sorkar hian sum tam tak a seng thin a, tun kum kal lai meka kan sum sen dan chu – 2022-2023 (RE) ah state fund - SEDP te, PMGSY te, central road fund te, NABARD loan te, EAP loan leh PM-DeVINE te atanga kan hmuh, Mizoram sorkarin kawng siamna atana kan sum hman zawng zawng hi cheng nuai hlir nuai 1,10,265/- a ni a. A vaibelchhe zawng chuan cheng vaibelchhe 1,102.65 a ni. Heng bakah hian NESIDS te, NEA te leh central scheme dangte atanga kawngpui siamna atana sum kan hmuh a awm nual bawk a ni. Chutiang anih si chuan, engatinge kan kawngpui hi a that theih loh ni?

Tin, building chungchangah hian han sawi leh ila - tunlaih hmasawmna in a nawr chhuah sorkar building tha tak takte a lo piang chho zel a, heng kan in sakte pawh hi kan fimkhur hle a ngai tawh a, kan fimkhur tawh loh zia chu a lang mai a; kan sak mek lai laite pawh a lo chim thin a ni. Chuvangin, in sak kawngah hian engineer thiam tak takte an lo chhuak zel a, qualified engineer te hian min enpui tha deuh ta se la, hmanraw tha hman chungchangah hian building sak enkawltute hian nasa lehzuala tan an lak a ngaiin ka hria. Khawpui chhungah chuan AMC ten theihtawpin tan an la a, amaherawhchu, AMC area nilo, hmun dang dangah te building lian pui pui, rotling tur kan sakah hian fimkhur lehzual ngaiin ka hria.

Tin, kawng kha han sawi leh ila. Kan ramah hian kawng hi chi hrang hrang - national highway te, state highway te, major district road te, other district road te, village road te leh city road tih tea then ni a, heng kan kawng neih zawng zawng belhkhawm hi km 5,716.93 a ni. Tin, ‘kawng tha lo’ kan han tih hian, kan kawng zawng zawng hi a chhia tihna a ni lova, hmun tlemte kawr bul te, hmun dam lai deuh te ang te hi a chhe ngun lai a ni thin a ni. Kum tina kan buaipui thin ang hi a ngai deuh vek a, heng hmunahte hi chuan RCC flooring te pawh hi han ti ila tha mai tura ngaih a ni a, kum tina a chhe thawm-that ngai reng tho hi kan buaipui thin a ni. *Entirnan*: Km 10 vela sei kawng ni ta se la, kan buaipui thin kawng thalo te hi chu a dik tak chuan km chanve pawh a tling lo a ni. Chu km chanve chuan kha kawng tluan mai atan khan harsatna a siam thin a, hengte pawh hi kan engineer thiam tak takte pawh hian lo ngaihtuah se la; tlem in a man to deuh a nih pawhin, a man chu to mai rawh se kawng tha kan neihna tur a nih chuan. Kan engineer te pawh ‘khatiang lam zawngte khan a hawi theih lawm ni?’ te ka ti a ni.=

Tichuan, Pu Speaker, he kan sawi – kawng tha leh tlo, building rotling kan neih chhoh mek turah te pawh hian kan member ten thahnem ngai taka min sawipuia, min pass pui turin ka sawm a. Ka resolution hi a nihna ang taka min sawipui hi tuna kan zoram dinhmunah hian tul ka ti a, pawimawh ka ti a. A nihna ang taka min pass-pui turin ka sawmin, ka ngen a ni e. Ka lawm e.

SPEAKER : Awle, resolution neituin a rawn move ta a, kan sawiho zui nghal ang a. Member pakhat tan minute engzah nge kan inpek ang le? (**Member:** Minute 10; minute 5..) *Minute 10* tih a ri a, *minute 5* tih a ri baw a, khawi zawk nge kan pawm ang? Minute Minute 10 ti mai ang aw? Awle, minute 10 inpe i la. Tunge sawi ang le? Member zahawm tak Pu KTRokhaw i sawm ang.

PU K.T. ROKHAW : Pu Speaker, ka lawm e. He resolution hi, resolution tha tak a ni a, “*kawngpui tha leh building tha kan neih theih nan tun aia ulukin hna thawh ni rawh se*” tih a ni a. Dik tak chuan sorkar kal tawh leh kal lai mek pawhin theih tawp an chhuah a, khua ten a zirloh avangin duhthusama hna an thawh theihlohna chen pawh a awm a. Chuvang chuan, ‘*tun aia ulukin hna thawh ni rawh se*’ tih hi chu a tha thlawtin ka hria a. ‘Engah nge sawi tam lova kan pass mai loh?’ tih hi ka ngaihda a ni e.

SPEAKER : ‘A tha e’ tia pass mai rawtna a awm a, kan thlawp mai em? Aw le, Member zahawm tak Pu Lalrintluanga Sailo i sawm ang.

PU LALRINTLUANGA SAILO: Pu Speaker, ka lawm e. Member zahawm tak Aizawl South-II bialtu resolution – “*Kawngpui tha leh building tha kan neih theih nan tun aia ulukin hna thawh ni rawh se*” tih hi resolution tha tak niin ka hria a. Thil tha duh theuh, he ram mipuite aiawha thlan kan ni a. Member zahawm tak Pu Rokhaw sawi ang khan, sorkar hmasa leh tuna sorkar mekte pawhin kawngpui tha kan duh a, building tha kan duh a. Mahse, ruahtui a tam lutuk avang leh kan leilung a ngheh tawh loh avang te hian kan engineer ten tha taka an plan pawhin duh angin a tlo hlei thei lova.

Kan House Leader, kan Chief Minister zahawm tak phei chuan kawngpui hi a vei em em a, hmar-chhawng lam hawi phei chu bitumen hmang lova concrete-a tih hram dan te min ngaihtuahpui a ni a. Chuvangin, Member zahawm tak Pu Lalchhuanthanga resolution, “*Kawngpui tha leh building tha kan neih theih nan tun aia ulukin hna thawh ni rawh se*” tih hi ka thlawp a. Chuvang chuan, uluk zawka hna thawh a nih zel theih nan he resolution hi ka thlawp a ni e. Ka lawm e.

SPEAKER : In va thlawp tha ve; kan wind-up tir mai dawn a mi. Sawi duh in la awm em?

DR. ZR. THIAMSANGA : Pu Speaker, kei pawh he resolution hi tha ka ti a, ka thlawp e. Sorkar hmasa leh tun sorkar hi chuan kawng hi an ngaipawimawh khawp mai a. Amaherawh chu, fur te a lo ni a; nikum phei kha chu fur a daihrei si a, duh angin a tha tawk lova. Ni e; sawiho lova pawm mai hi kei pawhin ka rawt e.

SPEAKER : Member zahawm tak Dr. Vanlalhlana i sawm ang.

DR. VANLALTHLANA : Pu Speaker, vawiina kan resolution sawiho hi a pawimawh ka ti a Kkhatia sawiho lova pass mai kha a uihawm ka ti a, kan kawng han enin, sawiho tha ka ti a.

Hmanni lawkah chhiat tawhna thilah Lunglei-ah kan kal a, keimah ngeiin motor ka khalh a ngai a. In lampangah programme kan nei avangin lehlengin kan va kal a, December tha tawpah khan. A tukah chuan programme lama kal ngaihna a awm lova, ka mu nileng thak a ni. Chu chu, kan kawng dinhmun avang hi a ni a. Kan ram en hi chuan sum chu a lut hnem khawp mai, a tir kha chuan kawng siamnaah pawh kan che tha viau a Aa lawmawm ka ti. Sorkar hmasa-ah chhuanlam te a lo awm a, ‘ruahtui a tla tam’ tih te a ni a. Sorkar thar a lo awm a, theih tawp an han chhuah a, kawng kan lai chum chum a. Amaherawh chu, kawng chauh a lo ni lova, building te a lo ni a. He thil kan tihna turah hian a bulthut atangin, ‘engtin nge hma kan lak anga, hnathawktu turte engtin nge kan buaipuia, engtin nge kan kalpui?’ tih hi kan entel a ngaiin ka hria a. Hna thawk tur chuan hnathawktu tur contractor kan mamawh a, consultancy an indin te, Pu Speaker, mamawh hrang hrang kan nei a ni. Tuna kan empanel firms leh kan contractor thenkhat te hi chu, ‘a lem deuh lo maw?’ tih rilru ka nei a ni.

Hei, hmana session-ah – ‘empanel firms hote engnge an work experience?’ tih kan zawt a. Kum hmasa lawka dinte khan vaibelchhe chuang experience te an nei a; firm leh mihring hi danah chuan a danglam; mi hrang daih an ni. A then chuan partnership firm te an lo din a, a then chuan LLP private limited te an din a. A neitute khan a hmaa an hnathawh kha, kha firm experience-ah khan an claim thei miah lo. Mahse, tun sorkarah erawh chuan kan claim ringawt mai a ni. Hma kan la a, kan inpawm chawp a, an hnathawhna lampangah pawh DPR an siam dawna ka hriat chian ngei, Grade A consultancy in a ziak thei lova, midang an ziah tir a chungte chuan hna an thawk a, experience tha pawh nei lovin hna an thawk a ni. Hetiang chuan engtin nge hna tha kan neih theih ang?

Hei, sole-proprietorship te erawh hi chuan an lo thawh tawhnaa consultancy hi *sole-proprietorship* anih chuan, anmahni kha a neitu an nih nghal avangin, an experience chu an hmang thei the meuh mai. KR proprietor te pawh sole-proprietorship (a neitu) nihna nein, non-tribal a lo ni a. RTI-a ka zawhnaah chuan - *Income Tax Act* hnuaiyah hian a lo inziak lut a, permanent account te a nei thlap a. ‘Chhiah a pe em?’ tih ka zawhna, khu lamin min chhannaah chuan, “*income from other sources* atang hian

chhiah a pe e” tiin min rawn chhang a. Chung chu kan consultancy neih te an ni. Khulam khuan an rawn ngaihven tan a, RTI in zawhna ka zawt a, tunah pawh hian *due* panga a la awm a ni. “Chhiah a chawi lohah hian hma lak a ni em; investigation lak a ni em”? tih ka zawhna chu, “lak a la ni love”, tiin min chhang a; chung chu kan thawhpuite an ni. ‘Income from other sources’ tih hi, Income Tax Act hnuaiah chuan, lucky ticket atanga pawisa lak te, tuten emaw an lo pek thut ang chi te, sakawr intlansiakna pawisa inchawia sum lakluh te an ni a. Sole-proprietorship nei, khatianga sum lalut chuan *income from business* atanga income tax pe tur a ni. Tunah hian crore engzat man nge a thawh tawh? income tax a pek tur hi a tam ve ngawtin ka ring. Chung chu kan thawhpui a ni. Income tax pek loh hlauhawm zia chu - jail tan theihna bakah, an chhiah pekloh an rawn umzui ang a, chung chu interest a la awm; chungte chu tunah hian a lar ber berah kan hmang a. Kan ram, keimahni, kan mipuite kalna tur leh kan building te pawh a enkawl tupa a ni. Chungte chu kan thawhpui duh a ni a. Helaia kan hnathawh chu engpawh ni rawh se, a inkhaidiat chho ah hian kan tan a ngai khawp mai.

Pu Speaker, PMGSY te pawh hi, kan tuina lamte hian a lo hril deuh te pawh a ni ang a. PWD ah internal audit an neihin, a audit tute indaihloh karah, ‘min lo pui teh’ an ti a, ka kal ve tawh a. Bank guarantee an pek te pawh a lem hlawm lutuk; a then chu a dik, a then erawh chu a lo expire a, an lo dahbelh leh lova; a then chuan mi hmingte an rawn dah daih. Chu chu kan PMGSY hnathawh dan te a ni. Chunggho, a tak pawha thil ti duhlo chuan engtingge hna pawh an thawh that theih ang le? Kan tan a ngai takzet a ni.

Sawi tur tam tak a awm. Airport lam bikah te luh a chakawm khawp mai. Chumi ka luh hma chuan, tunah sorkar hnathawk tam tak an awm a, kan contractor ten an luah tur in te an sa a. Tunhnai lawkah Turkey, Syria lirnghing kan hria a, sorkar hnathawk thenkhat hi chu an ngaih a ngam lo a ni. Hna an thawh dan, contractor-te hma lak dan han en hian hreawm an ti ve a ni.

Tum khat chu two-wheeler-in ka tlan a, ruah a sur avangin department building pakhat, MINECO ah khuan hmelhriatte an awm bawk a, ka tei lut a. A chung ber a ni lova, a chhawng, a lai bawr vel a ni a. Amaherawh chu, a ceiling atang khan tui a rawn put a, an buai hle a; bucket te an dawh a, anmahni pawhin hreawm an ti. Chu chu tuna i dinglama thute, chu mite sorkar hmaa an lo thawh tawh a ni; tun sorkar awm hmaa company-in an thawh te, chutiang building te chu a ni. Tunah hian sorkarna kan chang leh a, engnge kan an dawn erawh chu a hriat lova. ‘Kan sorkar hnathawkte an hmakhua pawh hi kan ngaih tel a ngai’ tih kha ka sawi tel duh a.

Hma kan lak dan ka sawi tawh a, Airport chungchang hi sawi tur awmin ka hria. Khulaiah khuan Mizoram pawn atanga lo kal; kawng ni lovin, thlawhnaa rawn kalte chuan an hmuh hmasak ber chu, kan Airport khu a ni. Kan Airport sak dan a that tawklloh avangin, a chim a; a piahah, ‘a la chim leh mai ang e’ tiin midang awmlah laiin zanah a

rukin an lo tichim leh a, a tukah kan zuk hmu leh tho si a. Khulai duty te chuan a chim khan, ‘zan ka mu lo’ ti a min hrilhtu mi pathum-pali an awm. Chhunah te khan kan kal si a, kan kal lai khan chim ta se la, ‘a hreawm awm’ an ti. Nunna chan theihnaah vanneihthlak takin duty te him damin an awm a ni. Chu chu kan *workmanship* a ni leh si a. Kan hman lar ber, *kan hman lawr* a ni leh bawk si a, a thawktu ngei pawh.

Airport chungchangah hian November Ni 26, 2020 khan SE atangin nawrna a lo awm a; SE nawrtu an awm a, ‘hma la teh u’ tih a ni a. CE ah a kal a, CE atangin E-in-C ah a kal leh a, chutiang chuan hma lak a ni a. An ziahnaah pawh a awm vek; ‘kan chief minister phal angin; kan chief minster rawn tih angin, restricted tender-a hma lak ni rawh se’ tiin, Ni 18.12.2020 khan phalna an dawng a. Restricted tender thilah hian kan ngaihtuah ngai chu, Competition Commission hian ‘bid-rigging’ ah hian a thin a tichhe hle mai. Tuna kan sorkar hian restricted tender-ah hian ‘bid-rigging kan ti em?’ tih hi kan ngaihtuah a ngai. Contractor tam tak hian buaina an tawk a, an inziahlul lehna turah hian sorkar hian open tender hi an tichhuak tam tawk lova, ‘restricted tender-a tih a tam lutuk avangin registration tihna tur khawp hna pawh an hmu lo’ tih hi kan hriat a ngai. Chu chu kan kal dan a ni.

Khu laia Airport siamthatna tur hna a rawn kal ta cheng a; work order hi Ni 21.9.2021, September thlaah a chhuak a, amaherawh chu a hma April Ni 21 ah KR Construction hian lo khawih daih mai; thla tam a vei hnuah work order a chhuak chauh; chu chu kan hna kalphung a ni. Hetiang em ema *Dan* pawh ngaipawimawh lo (Pu Speaker, ka zo dawn...).. mipuite an rawn auchhuah pawha kal ngut ngut mai; mipuite tana ram siam tur, kawng siam tur, building siam tur hian hetia hma kan la hi chu pawika ti takzet a.

General Financial Rules, 2017-in a tarlan dan chuan, hetiang, *limited ‘tender emaw, restricted tender emaw* ah hian mi pathum aia tam tih tur’ tih te a rawn dah a, Supreme Court pawhin thuchhuah a siam a, ‘competition commission hian bid-rigging chungchangah hian hma a la ang’ tih a ni. Contractor tu emaw rilruna deuh ten lehkhahan thehluh ang tih hi ka hlau khawp mai.

Chuvang chuan, “kawng kan siamnaah leh building kan saknaah te hian, tun aia nasa zawk hian hma kan lak a ngai a ni” tih kha ka rawn tarlang ve duh a; ‘he resolution hi pass ngei ni se’ tiin ka rawn thlawp a ni e. Ka lawm e.

SPEAKER : Dar 4 pelh loh tum ila. Tunge sawi leh ang? Dr. BD Chakma, Member zahawm tak ka sawm e.

PU B.D. CHAKMA : Pu Speaker, ka lawm e. Vawiina Private Member Resolution, “Kawngpui tha leh building tha kan neih theih nan tun aia uluk zawkin hna thawh ni rawh se” tih MLA zahawm tak Pu Lachhuanthanga rawn putluh hi tha ka ti a.

Hetah hian thingtlang lam huam ve dan hi a awm thei se ka ti a. Tin, ‘tun aia uluk zawkin..’ tih ni lovin, ‘nasa takin..’ tih ni zawk sela a that ka ring a.

‘Seeing is believing’ tih a ni a, saptawngin. Lunglei lamah motor-a kal dawn chuan, Aizawl-Thenzawl-Lunglei Road kha chiang taka hmuh theih a ni a, kawng tha meter 1 pawh hmuh tur a awm lova, *pot-hole* mai ni lo, pot-hole ai pawha lian *trap-hole* ang lian tak tak a awm a ni. PWD labour-te pawh hmuh tur an tlem khawp mai, hmun thenkhatah pakhat emaw, pahnih emaw an awm tawk a ni. A pawh khawp mai.

Aizawl-Lunglei Road hi a pawimawh a, kawng dang chu ka hre lova, southern lam, a bikin Aizawl-Lunglei Road hi a chhe nasa khawp mai a. Chubakah chuan ka bial headquarter Kamalanagar internal road 80% hi state PWD hnuai a awm a ni a. CADC hnuai a chuan kawng te tak te te chauh a awm a, a bak state hnuai a ni a.

Pu Speaker, golden jubilee inauguration programme-ah nangmah ngei pawh i kal tawh a, Khuallian-in kan sawm che a. Internal Road, town road hi enchian chuan a chhe em em mai a. Nikum hmasa Covid lai khan ka MLA fund hmangin pot-hole repairing (PCC) leh patch repairing ka tih tir a. Patch repairing ka tih lai pawh khan MNF Executive Committee ten nasa takin min do a, tha taka siam pawh an phal lova, chutiang dinhmuna chuan kan awm a ni. MLA fund chu *limited fund* a ni a, crore eng emaw zat nen lo chuan hetiang internal road repairing hi a tihtheih loh a ni. Chuvangin, Kamalanagar khawpui chhunga internal road repairing hi a ranglamin hma min lak sak thei se ka duh khawp mai.

Chumi rual chuan hei, kan session-ah pawh kan sawi fo thin a. Saski hnuai a central sorkar atangin soft-loan, engmah interest pawh awm lovin kum 50 tal a hman theih tih a ni a, khami fund atang khan ka bial, Kamalanagar town area tal chu min siam sak thei se ka lawm hle ang, Pu Speaker. Tin, sorkar building - Chawngte police station hi, a hmuna hmuhloh chuan hriatthiam a har a, kei chuan ka tlawh ve thin a, chutiangin police quarter pawh chhe tak a ni. Assam type pawh ni lo in pangngai a ni a. OC quarter phei chu vawikhat mah repair loh a ni a, tye bang a ni a. A luahtu OC a ni a, security a tan pawh a tha lova, hei hi hi Assam type tala sak dan hi a awm lo em ni, Pu Speaker. Chu mai ni lo, constable te awmna tur quarter tha pakhatmah a awm lo bawk a. Hei, nikum lawkah MLA fund hmangin, BDO pawhin minrawn ve thin a, ‘khawngaih takin Pu BD, i MLA fund atangin BDO office inchung hi min thlak sak rawh’ a ti a, ka thlak sak a ni. Tin, tunah hian SDO conference room a chhe leh tawh a, sak that an dil mek a. Tin, SDO leh BDO nei kawpin kan awm a, full-time SDO kan neihlohna pawh a rei tawh a. Chuvangin, sorkar office leh quarter te tal hi chu uluk takin enin, repair dan min ngaihtuah sak thei se ka ti khawp mai.

Chu bakah kan lifeline kawngpui Lunglei-Tlabung road, tin, kan MLA zahawm tak Pu Nihara bial pawh hi a ni tho a, MLA bial pali emaw, panga emaw laiin kan chhawr

a. Hemi Phairuankai Bridge hi thlatin deuhthaw a chhia a, repair a ngai a ni. Hei, social media ah pawh kan hmu fo ang a. He bridge hi permanent a siam dan hi a awm lo em ni ka ti a. Tunah hian motor lian (ke 12 nei) hi a kal thei lova, a hreawm hle a ni. Hei, Lunglei South bialtu zahawm tak Pu K. Pachhunga hi, Chawngte ‘L’ thleng hi a bial a ni a, Phairuankai bridge kal tlang lo khan khawiah mah kalna kan nei lo a ni. Khawngaihni, he bridge hi uluk takin min en sak thei se, major repairing tihdan awm thei se ka ti khawp mai.

He Private Member Resolution Pu Lachhuanthanga, Member zahawm tak rawn putluh hi ka thlawp e. Pu Speaker, ka lawm e.

SPEAKER : Tunge sawi leh ang le? Kan kal dan tur chu – Memberte’n in sawi duhloh chuan CM, PWD changtu ka sawm ang a, chumi zawhah a mover kan wind-up tir ang.

Awle, Member zahawm tak Pu Nihar Kanti Chakma ka sawm e.

PU NIHAR KANTI CHAKMA: Pu Speaker, ka lawm e. Vawiinah Private Member Resolution kan sawiho mek a. Member zahawm tak Pu Lalchhuanthanga resolution hi, “Kawngpui tha leh building tha kan neih theih nan tun aia ulukin hna thawh ni raw se” tih a ni a. Pu Speaker, hei hi tha ka ti khawp mai a, ka support bawka, lehlam atang pawhin an duh vek a, kei pawhin ka duh a ni.

Pu Speaker, khawvelah hian communication hi a pawimawh a, communication awm lovin ramim hma a sawm thei lova, kan hre vek a. member zahawm tak ka hmaa miin a sawi ang khan, mover pawhin tha takin a move a, a thil sawi zawng zawng pawh a dik a ni. Pu Speaker, ka sawi duh chu, National Highway-302 hi kan lifeline a ni a, Tlabung-Lunglei a ni a. Tunah an siam mek a, hei hi uluk takin kan venpui a ngai a ni. Chuti rualin World Bank funded road Chhumkhum – Chawngte zawh tawh a ni a, a lawmawm hle a, hetah hian sum pawh tam tak sen a ni. Amaherawh chu reiloteah a chhe tan a, hmun hrang hrangah khuar a awm a. Hei hi engnge ni a chhan, engvang nge Mizoram kawngte hi a tlo loh em em? A chhan hi zawngchhuah a ngai a ni. Hei, Annual Report of Mizoram Road-fund Board, 202-2022 hi kan hmu vek a, hmun hrang hrangah kawng laih a ni a, a lawmawm hle a ni. Village road te a awm bawka, PMGSY, National Highway, District road, project hrang hrang a awm a. Hei hi a lawmawm rualin, hei hi engvang nge a tlo loh em em tih hi.

Vawiina private resolution puluttu Hon’ble Member chungah pawh lawmthu ka sawi a ni. Tunah en ta i la, Aizawl-Lunglei Road hi a chhe em em a, a bikin Lunglei leh Tlawng Bridge inkar khi. Vawing emaw zah siam tawh a ni a, mahse tun thlengin a la tha chuang lova. Tumah ka dem lova, amaherawh chu kawng tha kan mamawh a ni. Chuvangin tunah pawh kan lifeline, Tlabung-Lunglei road, NH-302 hi laih mek a ni a,

an hnathawh hi tha taka venpui a ngai ka ti a ni. Keini chu technical mi pawh kan ni lova, engnge a awmzia, engnge a chhian chhan, an lung hman thatloh vang a ni em nge kan venpui tha lo. Engnge a chhan? Uluk takin an hnathawh hi venpui ni se tih hi ka duh khawp mai.

Kha zawng kha he resolution ka support pahin tawi te ka han sawi ve a ni e. Ka lawm e.

SPEAKER : Sawi tur kan la awm em? Awle, Member zahawm tak Pu C. Lalsawivunga ka sawm e.

PU C. LALSAWIVUNGA: Pu Speaker, tawitein sawi ve duh ka nei a.

Hei, kan Member zahawm tak resolution, “Kawngpui tha leh building tha kan neih theih nan tun aia ulukin hna thawh ni rawh se” tih hi a pawimawh hlein ka hria a. Kan ramah hian building sak hna te, kawng laih hna te, black-top hna te leh lei dawh hna te kum eng emaw zat chung kan lo kalpuiin kan lo thawk tawh a, kan ramin a chhawr em em a. Ei leh bar, sum leh pai zawngna kawngah te vawin ni thlenga kan chhawr, kan hman tangkai te an la ni hlawm a, a lawmawm em em a.

Hemi inkalpawhna hi a pawimawh a. Inkalpawhna (communication) hian, thlawhna kawng te, lawng kawng te, rail kawng te, motor kawng te hi a huam vek a. Amaherawhchu, vawiin nia kan sawi tura hi chu ‘road construction’, kawngpui, ‘motor kawng’ kan tih hi a ni deuh a. Central lam pawh hian an ngaipawimawh em em a, Govt. of India pawhin ‘hmasawngna rahbi pawimawh a ni’ tih hi an hria a. Chuvang chuan nikum maiah pawh khan Ministry of Road Transport & Highway atangin India hmarchhak tan sanction pawh kan hmu a. Mizoram bikin kan hmuh kha km 204 kms road construction siamna atan crore 6,664 min rawn pe a, keini aia dawng tlem hi Nagaland leh Sikkim chauh an awm nghe nghe a ni. Chutiang chuan Govt. Of India hian keini India ram state-ah pawh a kilkhawr bera awm, tlang rama awmte hma kan sawn theihna turin min duhsakna hetiang hian kan dil pawh ni em em loin kan dawng a ni a, a lawmawm tak zet a.

Chutah chuan, Pu Speaker, ka han sawi duh chu - kan kawng siam chhe hma lutuk hi a chhan a awm ang tih hi ka ring tlat mai a. Ka bial chungah kawng an rawn siamtha a, kar khat chung velah a khaw kha awm leh ta mai a ni. ‘Eng nge a chhan ni ang aw?’ ka ti a. Tuk khat chu, ka han hai a, lungno tihte kha kan chhuanlam thin avangin ka han en a, a lung no vang pawh a niin ka hre lova Ka hmuh ve thiam danah chuan, balu, rawra, boulder emaw pawh ni se bitumen nen kan chawhpawlh danah hian a inman nghet taw lo hi a ni ber hian ka hre ta tlat a. Chuvang chuan, alkatra hi kan hmang ren lutuk a, alkatra hian heng balu te, boulder te, rawra te hi a man hlawm nghet

thei lo niin ka hria a ni. Chuvang chuan, chungte pawh chu kan inenletna atan pawh hian a tul khawpin ka hria.

Tin, kan kawng siam a chhiat hma em emna chhan lian tak pakhat nia ka hriat chu - *Rinawmlohna* hi a ni pakhatin ka hria; eirukna avang te pawh hi a niin ka hria a. Pawisa hi a hmanna tur dik takah ruahman a nih anga hman nisela chuan, nichina ka sawi tak ang chite kha kan pumpelh thei dawn a ni. Chumi piah lamah chuan, pawisa hi a thawktute tan hian duh ang thala hman tur a awm thin lo ni te pawhin ka hre thin bawk a. Chung thil chi hrang hrang avang te chuan kan kawng siam te pawh hi a tlo thei lo, a tha rei thei lo ni maiin ka hria a.

India ram atangin company ten Road Transport & Highway hnuaiah kawng min rawn sial sak a, henge pawh hi a ram neitute hian lo enpui ve a, lo vilpui ve te pawh hi kan mawhphurhna niawm taka a lan lain, sawrkar hian henge pawh hi a enpui ngai lo niin a lang a. Chu chu Assembly-a ka zawhnaah pawh min chhanna a ni a, henge pawh hi amak ka ti a. Central atanga min rawn thawh sak, (min rawn pek leh kan thawh pawh ni lo mah sela) kan ram chhungah hna an rawn thawk a, kan ram chhungah kan ta tura hna an rawn thawhnaah hian a ram neitute hian lo enpui te, lo vilpui te hi 'kan mawhphurhna a ni ve dawn lawm ni aw?' tih hi kei chu ka ngaihtuahnaah hian a awm lian em em a ni. Chung te chu, 'heng company rawn lutte an ngampat em emna leh min pawisak miah lohna chhan te pawh hi a ni thei ang em?' tih te hi ka ngaihtuahnaah hian a awm rum rum a ni. Chuvang chuan, kan in enlet a, tan kan lak pawh hi a tul hle a ni.

Kum tinin kawngpui siamna atan pawisa tam tak kan dah a, mahse, rei a daih thin lo hi a pawisa. Kan bial chhungah te pawh kawng siam hmabak, kan internal road-te, kan main road chhe deuh deuh mai te tunah hian kan ngah a ni; an rawn siamna kha la rei lutuk chu a ni lo vek. Amaherawhchu, kan hmanraw hmante hi a dik tawk lo nge, a tha tawk lo nge? 'Hmanrua kan neih ang angte hi a nihna tur ang takin kan hmang lo em ni?' tih te hi ngaihtuahnaah hian a awm a. Chungte chu Pu Speaker, wawiin niah hian ka sawi lang lo thei lova.

Tin, Building kan sak dan hmang te pawh hi, kan contractor kan nih pawhin, department lam kan nih pawhin, mimal kan nih pawhin kan inenlet vek hi chu a tulin ka hria. A chhan chu kan building sak dan kalhmang atang pawh hian thil fel lo hi chu a awm thin a ni. Chutah chuan, work order te a lo chhuak a, hnathawhna tur pawisa atangin 'kawngpui tha, building tha, sum awm ang ang hian kan siam ang' tih ngaihtuah ai chuan, kha building sak tur emaw, kawng siam tur emawa pawisa lo kal atang khan 'engzat nge ka hlawh theih ang, engzat nge ka hlep ang' tih ngaihtuahna avang hian kawng tha kan nei thei lova, building tha pawh kan nei thei lo a ni. (**Speaker:** Minute 2 i la nei e.)

Chuvang chuan, Pu Speaker, helai hi a ngaih pawimawhawmin ka hria a. titinaah ‘mi state chuan pawisain kawngpui an siam a, building tha an sa a. Keini Mizoram chuan kawngpui leh building-in pawisa kan siam’ tih te hi a awm thin a ni. Heng ngaihthlak te hi a hrehawm em em a, a nuam lo lutuk a ni. Chuvang chuan, wawiinniah hian inenlet ila a thain ka hria a.

Tun hnaihah ka bial chhunga awm MICE School building sak a ni a, ka zuk en a, a building sakte khu a chhe em em a ni. A slab te a puar a, a room hnuai ber laboratory pawh pawisa contractor hnenah pek a ni a, mahse sak a ni lem hlei lova, lungrem 5 awm turah 4 rem a ni a, mahse a building sak hnuai lam do tura pawh kha pakhatmahin a do lova, chutiang te chu a ni a. Septic tank a awm mumal lova, ... (Pu Speaker, a hmawr ka rawn baw k ang e) toilet pawh hmeichhia thlatin bi nei tan a hranpaa siam a awm miah lova. Chuvang chuan, building tha neih kan mamawh a nih rual hian, kan zavai hian wawiinniah hian in enlet ila, sorkara a mawhphurtu, he hmuna roreltute hian hma i hruai ang u. Keiniin hma kan hruai chuan, hnathawktu mithiam rual, engineer rual kan neihte hian englai pawhin kan hnung zui a, kan ram tan theihtawp chhuah hi an hnial lo ang tih hi ka ring a ni. Chuvangin he Resolution hi Pu Speaker, ka thlawp a pass ngei turin ka ngenpui a ni e. Ka lawm e.

SPEAKER : Tunge sawi leh ang? ‘A resolution hi a tluangtlan si a, a tha e’ tihpui mai intum em ni? Aw le, Member zahawm tak Pu VL Zaithanzama han sawm hmasa teh ang, a senior zawk a hnungah.

PU VL. ZAITHANZAMA: Pu Speaker, ka lawm e. Kan MLA zahawm tak Pu Lalchhuanthanga resolution - ‘*Kawngpui leh building sak reng reng tha leh tlo tura hmalak ni rawh se*’ tih sawina hun tha tak wawinah kan han nei hi a lawmawm ka ti hle a. Ka hmaa ka MLA pui zahawm tak takte khan a support zawng hlerin an rawn sawi a, keipawhin he resolution hi kan pass ngei theihna turin tha ka tih thu rawn sawi ka tum a ni.

Kan ramin a mamawh a kawngpui leh building tha hi, kan House Leader, tuna kan PWD changtu ngei pawh hi kawng vei a ni a, *rulngan pa ang zara* kawng siam duh kha a ni. Keini pawh chutiang duh tho chu kan ni a. Amaherawhchu, kan kawngpuite a tlo lo em em thin a, kumkhat daihin kawngpui kan siam lova, kumkhatah kan kawngpuite kan siam zo hman baw k si lova. Chuvangin, kan siam zawh hmain kan kawngpui siam hmasak te a lo chhe leh hman thin a, kawngpui tha kan nei hman lova. Mizoram kawngpui leh building te hi chu ‘a tha taw k lo’ tih hi chu kan pawm tlang niin a lang a. A chhan kan inrinsiak a, kawngpuiin a that phah chuang hlei lova. Tunah hian, ‘chulai bik chu’ tih sawi ka tum lova, kan ram dung leh vanga kawngpuite hi duhthu a sam lo em em a ni.

Kumin kum tir lamah khawthlang lam Phuldungsei tlangdung te ka kal a, Champhai lam te, Siaha lam te pawh; khawilai mah duhthusama tha a awm lova, a veiawm hle a ni. Kan kawngchhiat chhan hi kan inrinsiak a, ‘kan ram leilung ngheh tawk loh vang te; kan lung chan tawk loh vang te; alkatra kawng siamnaah kan telh tlem vang te; kan kawngsiam chhah tawk loh vang te a ni’ te kan ti a, chutiang chuan ngaihndan chi hrang hrang kan nei a ni. “Engvangin nge Meghalaya kawngsiam a chhah that em ema, Mizoramah kawng metal a pan bik em em?” tiin engineer pakhat ka zawt a, chuta mi chhanna chu hei hi a ni - ‘Kawngpui pawimawh te uluk taka endik a ni thin a, nikhatah truck engzatnge kal, bus engzatnge kal, car engzatnge kal tih te uluk taka endikin, chumi mil chuan kawngchhah zawng tur kha India Road Congress in a recommend thin a ni’ a ti a. Chuti a nih chuan, Mizoram kawng pan bik kha a tur rengah ka han ngai a. Mahse uluk takin ka han ngaihtuah a, truck full-load kal tamnaah chuan kawng chhah chu a ngai teh meuh mai a. Meghalaya te ai chuan Mizoram-ah motor chu a tlem a, full-load kal pawh a tlem a, kan kawng metal chhah zawng pawh a pan ta a ni. Amaherawhchu, chutianga kan chhut a nih si chuan, a chhah leh a pan kha a tlo dan a inang tur a ni. Truck kal ngai lohna ah chuan pan deuh pawhin lo ti ta ila a tlo mai a. Chutiang chuan, motor kal dan uluk taka ena, chumi mila kawng chhah zawng leh pan zawng siam anih si chuan, kan state thenawmte aiin Mizoram kawng pan deuh mahse, a tlo lohna tur awmin ka hre lova. Chuvangin, a mi chhanna hi thil dik ngei ni pawhin a lang a. Amaherawhchu, hemi vanga kan kawng hi tlo lo niin a lang lova, *kan thawh thatloh vang* ni berin a lang a ni.

Tichuan, hemi kan ngaihtuah laia ka rilrua thil pakhat awm chu - kan thawhnaah hian department hrang hrangte thawhhona a tha tawk lo a ni. A bikin khawpui chhungah PWD-in kawng a siam a, a hnu reiloteah PHE lamin an rawn lai chhe leh a. Theih chu ni se khawi lai kawng bik emaw hi department hrang hrangte thawhhona fel tak hnuaiyah han siam chhin ila; uluk taka tui pipe te phumin, a chungah chuan black top ni ta sela, chu chuan kan kawngte hi a tih tlo sawt ka ring a ni. A chhan chu, kan tui pipe te a hlui tawh a, a leak a nih chuan kawng hian a haw em em a ni. Kan tui pipe te hi kan phum thuk bawk si lova. Chutiang tho chu telecom te pawh a ni a. Tichuan, department hrang hrang kha laia hna neite kha inlungrua takin thawk ho ta ila chu, kan kawng hian a tlo phah sawt ang tih hi ka ring tlat a, chu chu ka ngaihtuahnaah a awm a ni.

Pu Speaker, tunlai khawvelah hmasawna a thang zel a, technology tharte pawh a lo chhuak a. Mizoram-ah hian kan la hmang velo niin a lang a; ‘FDR’ kan tih, youtube-ah te kan hmu a, pathum, pali kawngsiamtu a inzui duah duah a, a thenin alkatra an rawn thlauh a, a hnungah an lo chil mam leh zel a. Chutiang chu hmannah Nagaland-ah pawh an hmang tawh an ti a, ‘engtikah nge kan hman ve ang?’ tih chu ka ngaihtuah thiam pha lova, hun rei vak lo ah chuan kan hman ve ka ring a. Hetiang anga tih hian kawngsiam chhung a rei lova, ‘a tlo bawk’ an ti a, ka awih khawp mai. Department lamin uluk takin kawng an han siam a, a zanah a thenin motor-in an lo dai leh a, chu chu kan kawngte a nih tur ang a nihlohna chhan te pawh a ni awm e.

Tichuan, contractor-te an pawimawh hle mai a. Hmun tamtakah chuan contractor te an zawhloh hna pek an awm a ni. Hna an ngah lutuk a, an thawk tha hman thin lova, an pending vak vak thin a; chu chuan kawng a ti thalo a ni. Chuvangin, mi pakhat hnena hna pek tam lutuk hian kawng a titha lova. Tin, a then chuan hralh kan ching a ni. Hna hralh kual leh commission ei kual hian nasa takin kawng a titha lo a ni.

Kan kawng thatlohna chhan chu - a maintenance hi kan ti tha tawk lo; chu chuan kan kawng hi a titlo lo a ni. Kutphah tiat leka pawp a awm pawhin thuantha nghal zel ila chu, kan kawngte hi tun ai chuan eng emaw chen chu a tlo dawn a ni. A vaia a chhiat a, a bula tanga sum tam tak senga tih leh ngai lo hian a maintenance hi uluk thei ila chu kan kawng hian a that phah zual ngei ang tih hi ka ring tlat a ni.

A tawp berah chuan, ‘kawngtha neih hi kan tlin em aw?’ tih hi vawiinah hian ka rilruah a lo awm tel a ni. Kawng a that chuan, kan speed te a sang a, accident te a tam a ni. Tunhnaiah Champhai leh Lunglei lamah te pawh kawng tlemin kan han siamtha a, accident-in a zui a. Chuvang chuan, kawngtha nei turin sorkarin theihtawpin hma la ila, chutih lai chuan mipui lam pawh inzirtir kan ngai takzet a ni. Tin, kan kawngtha te enkawl turin mipui lam pawh tun aia nasa lehzuala kan inzirtira, tan kan lak a ngai awm e.

Chuvang chuan, Pu Speaker, he resolution hi pass turin ka rawn thlawp a ni e. Ka lawm e.

SPEAKER : Member zahawm tak Pu Lalduhoma ka sawm e.

PU LALDUHOMA : Pu Speaker, Parliament-ah te, State Legislature-ah te hun reilo te experience kan lo nei ve ta a. Hetih chhung hian private resolution, chu pawh opposition member ta lehngal, sawiho pawh ngai lova pass mai rawtna opposition leh ruling atanga a lo awm hi ka hriat vawikhatna a ni a; ‘a lawmawm hle mai’ han tih mai pawh a awm hle a. Amaherawhchu, kan tihchhan ni awma lang hi a lawmawm lovin ka hria a.

Hei, Congress unaute pawh sawiho lova pass mai rawttu ah an han tang a. Hmanni lawka an sorkar laia kan kawng chhiat zia kan hria a, khangte kha kan sawichhuah an hlau ni hian a lang a. Chuvang chuan, pass mai an rawt dan hi a lawmawm lo lampang a ni a, paw ka ti a. Tin, ruling lam te pawh opposition resolution an han thlawp duak mai hi, sawi loha, sawi tam loha pass thuai thuai an chak vang a ni tih hi a langin ka hria a. Chuvang chuan, kan inthlawp dan hi chuan ‘lung a tiawi chiah lo mang e’ ka ti a ni.

Tin, kan ramah hmasawna ruangam a thlen belh zel a. President rule-ah pawh awm ila, heng a kal tur hi chu a rawn kal zel dawn a ni. Chu chuan kan ram leilungah

chhiatna tam tak a keng tel zel si a. Chung a nih avang chuan, mi tam takin kan ram a chhiat zel hlauin pawl te a lo ding a. Vawiinah hian, Pu Speaker, ‘*Centre for Environment Protection*’ tih te, ‘*Centre for Environment & Social Justice*’ tih te, ‘*Save Mizoram Rivers*’ tih te, ‘*Mizoram First*’ tih te, hengte ina hmasawna ruangam kan neih ruala kan ram chhe tur thahnemngai taka veng tura an auchhuahpui hi a ropui ka ti a. A ram enkawltute, thuneihna leh mawhphurhna kengtute ai mah mah hian thahnem an rawn ngai thin a, an kutah thuneihna a awm ve bawk si lova, an khawngaihthlak ka tiin, an chungah lawmthu ka sawi duh a.

Tin, Central YMA pawhin sorkar nen thawhhona thuthlung te siamin, kawng tha kan neihna turin hmata an la a, a lawmawm ka ti a. Heng kan ram hmasawna ruhrel a nih tur ang a nih theihlohna chhan hi chu - hlemhletna vang; corruption vang; rorelna dik lovin an hria a ni tih hriain, chhungril lama siamthat kan nih leh theihna turin, rorelna dik duhtu pawl te pawh an lo piang ta a, hmanni lawkah an kalkhawm tih thawm te kan hria a. Vawiinah hian Pu Speaker, kan Zoram mipuite hian *rorelna tha*, *rorelna dik* an duh a, an ril a tam a, an tui a hal a, an auchhuak mek a ni.

Tichuan hei, State kan nih hnuah hian PWD hi chief minister ten an la chang deuh char char a. Kan ram kawngte hi a tha a nih chuan, kan chief minister te kan fak a ngai ang a; kan ram kawngte hi a thalo a nih chuan, ‘kan chief minister ten mawh an phur dawn’ tihna a ni. Sorkarna te hi kan chelh rei avanga inchhuan ngawt chi a ni lova. Sorkar rei viau si, hnathawk chhe deuh si kan nih pheih chuan, a chhe zawnga hriat reng kan hlauh dawn tihna chauh a ni. Chuvangin, sorkar tha leh chhia kan tehna te hi sorkar rei lam ni lovin, kan achievement atangin a ni turah ka ngai a.

Tichuan, Chief Minister portfolio a nih reng tlat avangin, vawiinah hian kan ram kawng chhiatna chungchanga mawhphurtu ber chu, ‘kan Chief Minister hi a ni’ kan ti lo thei lo a ni. Tichuan, heng project lian ten chhiatna an thlen kawngah hian kan hotuten hma an hruai ka ti lo thei lova. Thil sawi hrehawm tak chu a ni nain, thudik a ni a; *thudik* hi chu huai takin kan sawi tur niin ka hria. Kan duhsak zawngte restricted tender hmangin hna kan pe a, *Dan* ding lai kalhin. Hei, ka *Zawhna* chhanna a lo chhuak a - PWD-ah ringawt pawh hian restricted tender 121 pek a lo ni hman tawh a. Hengte hian kan dan leh hrai a palzut a; restricted tender ni tura danin a phut te a awm reng reng lo; mahse, *Dan* lo zawk kha *Dan* angin tunah chuan kan kalpui ta a. A then te pheih chu restricted tender mai pawh a ni tawh lo; chu aia tha leh zual eng tender mah nilo, eng work order mah pawh ni lo, verbal-a inhrilha hna inthawh tir tawp te a awm a ni. Lengpui airport te pawh tu emaw chuan verbal-in a thawk tawp a, April thlaah; September thlaah work order pawh nilo, ‘*notice to proceed*’ tih a dawng mai a ni. Work order pangngai pawh a ni lo. Khati mai mai khan dan leh hrai hi kan palzut nasa lutuk a; heng hi sum siam nana kan hman avangin kan ram hi kan tichhe mek a, kan sum kan khawhral mek a ni.

Tichuan, a bill la thei theiah an tang a; mi pakhat bill lak zat kan hria a, social media-ah a darh chuai chuai a. A ni la lain a bill a lehlan thin a; mi tam takte bill a tan thep thup lai leh, miten an GPF te, an pension te an lak theihloh laiin chung hote bill chu a tang ve ngai lova. Treasury atanga bill an lak tawh han chhut phei chuan - thla tin hian vaibelchhe khat chuang hna thawk zel anga hisapin, average-in a chhut theih a. Chuti khawpa contractor tha chuan engineer engzat nge a neih ang le? Equipment eng zat nge a neih ang le? Chuti khawpa hnathawk chak chu Mizoram hian kan lo nei a ni maw? An bill lak zat atanga teh chuan, chu chu a ni tlat si a ni.

Tichuan, hna chhia complain a lo ni a, YMA te, khawtlang te, NGO te an kalkhawm a, a hmunah an endik a. Tichuan, officer-te pawhin an rawn complain ve a, SE te, EE, SDO leh JE ten. Khangho khan hnathawk thalo an han pal ve dawn deuh a, chungho chu transfer anni mai a ni. Engtin nge hna a thawh that theih ang? A lu ber atanga thil hi a kal dik tawh loh chuan, a hnar atanga lui hi a nut tlat tawh chuan, a hnuai lamah a fim thei lo.

Vawiinah hian Pu Speaker, sawi hrehawm ka tih em em chu - kan ruling party te hi khaw tina mipuite kawng dik min kawhhmuhtu ni se, kan ram hi a dam ang. Amaherawhchu, hna pawh a thawk chhia chhiaa an tan zel avang hian, kan ram hi a na a ni; hei hi paw ka ti tak zet a ni. Chuvang chuan, tu party emaw tal kan ram maichama inhlan ngam, inhalral ngam a awm a ngai tawh. Officer te pawhin hotute duhsak zawng contractor chu an nek ngam lova, an han nek deuh chuan, *transfer* anni mai; tun term-ah pawh chutiang sawi tur eng emaw zat kan hria a ni. Building te, retaining wall te a chim a, ‘tute nge khang ti chimtu kha?’ kan tih chuan, kan hotu lawk ber berte nena inngheng hnai tak an lo ni zel thin si a ni.

Tunhnaiah pawh Lunglei South bialtu MLA zahawm tak, a pa in Muallthuum South-Mat Lei SEDP atanga cheng nuai 35-a a dawh, a chhiat zia video a viral nasa em em a ni. Pu Speaker, a hotute zawkin kan hnam hi kan tichhia a ni. Khawtlang an lungawi lova, an mangang an auchhuak a nih kha. Lei dawh thar ni siin, accident tawh theihna mai tur a ni a. MLA te hi kan bial chhunga hnathawh that loh vengtu tura ngaih kan ni a; mahse, hetiang hi kan ti duh a nih si chuan, kan ram hi engtin nge maw a dam ang le? A paw ka ti a ni; hei hi a lungchhiat thlak ka ti.

Tin, kan hotu apiang tena thubu ai an nei ziah mai te, vawiina kan House Leader ngei pawhin PWD hnathawh chungchanga case a nei chho leh ta te hi a hrehawm ka ti a, rilru hi a na; zahthlak ka ti a ni. Tin, enga tinge kan ramah forest clearance leh environment impact assessment nei lo hian NHIDCL te hian heti teh chiama hna an thawh theih bik le? Helaiyah hian office memorandum ka nei a. Hei hi *Roads & Infrastructure Development Board* dinna thu a ni a, a endik tur chu - NHI, NHIDCL, NRRDA, BRO, NABARD leh a dang, kawng laiho leh khatiang building leh infrastructure lian khawih zawng zawngte endiktu tur anni a. A hna tur chu, “All such

development and construction-works pertaining to roads and highway shall henceforth be inspected, monitored and evaluate at regular intervals by Roads and Infrastructure Development Board,” a ti a ni. Kan Chief Minister hi *Chairman* a ni; heng hnathawh ho endik tu tur; regular taka monitor-a, evaluation pawh siamtu tura din a ni a, mahse hei hi kan thatpui lo a nih hi maw le; kan that pui hauh lo mai.

Heti chung hianin, hei NHIDCL-in kan ram a tihchhiat zia hi kan hria a ni. Mi ramah te chuan a ram lei tak chin kha kawng zau zawngah an hmang thin a, kan ramah chuan kawng thlangah an dawl a, leivung nen kawng zau zawng min siam sak a, engtia rei nge a daih ang heng te hian? Kan lui an hnawh ping mek a, kan sangha dil, ka leilet, kan luidung tam tak an tichhe mek a, tunah hian mi huan an tichhia a. Khawzawl-ah te khian han kal teh u, Tuisen Lui te khi a tichhe vek dawn; fur a lo ni ang a, Leivung management te pawh hi ngaihtuah ila, mimal tan pawha chhawr theih, mipui leh sorkar tan pawha chhawr theihin leivung te hi kan hmang thei reng a, mahse, kan ti lova. Heng zawng zawngah hian kan *Zawhna* min chhanna chu:- Aizawl - Champhai, Lunglei - Tlabung leh Thenzawl forest division chhungah hian NHIDCL-in phalna la lovin hna an thawk' tih a ni. Heng forest division zawng zawngte hi kawngpui lainhain a hrut area te anni a, chungah chuan clearance la miah lovin engati nge hna kan thawh tir theih? He board hian engnge a tih? An tang tlang a, an lungrual zawk em ni? Engatinge kan hotute'n heng laka min hum tura board din hian min hum leh si loh? Engatinge kan NGO te zawk an auchhuah? Chu chu wawiina kan buaina chu a ni ta ni. Village level atanga state level thlengin monitoring committee a awm a, mahse kha khan hna an thawk chuang lova, a paw em em a ni.

Tin, an tihdik loh te hremna tak tak pawh kan nei lova, DFO te hian an area theuhah stay order an pe thei a ni, an duh phawt chuan. Mahse, khatiang kan tih kan hre lova, ka bial ngei ah pawh feh kawng te, motor-a kan feh theih thinna te kha an leivungin min chhilh sak tlat a. Tin, kea kalna kawng - ram vah kawng te, huan kalna kawng te, lo feh kawng te min tihchhiat sak bawk a, chutiang chu a tam em em a ni. Chhantu neilo ang mai hian kan awm a. Tin, kan lui dungah balu leh lungte phalna la hlei lovin JCB tein duh tawkin an la a, kan luidung an suasam a, an tichhe mek a ni.

Tin, a huna zawh loh contract hi a tam em em a, PMGSY ah ringawt pawh hian a hun a zawh loh 72 a awm a ni. Chung chu a ni a, (ka sawi zo tep, Pu Speaker) World Bank hian ‘a hna supervise tu leh a hna thawktute hi DPR siamtu anni thiang lo’ a ti a. Amaherawhchu, kan ramah chuan DPR siamtute hi a hna thawktute leh supervise tute nena chaw thleng pakhat inzen tawm te kan awm a ni. Kan tih dan hi a diklo lutuk, kan rorel dan hi. Chuvangin, hetiang zela kan awm a nih chuan, ni khatah kan duh zawng mite chuan work order pathum te an hmu thei a ni a, a diklo reng reng mai a. Tin, *defect liabilities certificate* te pawh hi a hun, a period tawpah pek chauh tur a ni. An maintain tur a ni a, an maintain leh chuang si lova, survey te pawh google atangin an survey mai mai a, contractor survey that leh te a ngai a. Hetiang hrim hrima kan kal avang hian,

uluk takin, hei aia nasa hian kan ram building-te leh kawngpuite hi ‘kan sorkarin nasa zawka enngunin leh, uluk zawkin ti rawh se’ tih hi he resolution hian a tum a nih avangin, hei hi inlungual taka pass ka han rawt e. Ka lawm e.

SPEAKER : Awle, PWD changtu ni bawk, Chief Minister zahawmtakin sawi duh te a nei em?

PU ZORAMTHANGA, CHIEF MINISTER: Pu Speaker, ka lawm e. Vawiinah hian Member zahawm tak Pu Lalchhuanthanga’n, “*Kawngpui tha leh building tha kan neih theih nan tun aia ulukin hna thawh ni rawh se*” tih resolution a rawn pulut a, kan vaiin tha kan ti tlang a. Chuvangin, a sawi tawh phawt chuan, ‘hei hi kan pass tlan a tha e’ tiin, kan vaiin tha kan ti tlang a, kan tan tlan a tul zia hei hian a lantir a, a lawmawm hlein ka hria a. A bik takin PWD minister anga hna kan han thawhah a mawh pawh kan la zual a. Member zahawm tak tak ten kan building a ni emaw, kan kawng siam a ni emaw a tha tawh lo laite in han sawi kha a dik a, a aia nasa pawh kha ala awm teuh ang tih pawh ka ring a. Chuvangin, kan vaia tan tlan a tul zia he House-ina kan resolve-a, hma kan lak a tul tak tak a ni.

Amaherawhchu, thil pakhat kan hriatsa tawh, kan hriat tlan tho mah ni se han sawi nawn ka duh chu - kawngpui tha hi hetia a han a pian chhoh hian, ram thar, state thar, UT thar a ni emaw, a ram a rawn upat ang zel hian kawng tha te, building tha te, khang kha finnain an rawn hmu a, mipui ten thil tha an duhna nen a lo kal kawp a, a rawn evolve (a lo her chhuak) ve thin a, chu chu a kalphung a ni tih kan hria a. Keini pawhin kan ramah ngei pawh kan hmuh chu, district council lai te chuan hna te han thawk ila, kei pawh Pu Speaker, lung chher leh lung rem tein district council hunlai khan ka inhlawhfa tam ve khawp a. Lung kan han rema kan tih dan chu, mortar cement a char ang taka lantir tur khan mud mortar (chirhdiak) khan kan han rem hnan ta a, a inkar kha cement-in kan zut a, a bel that nan krandi pawh chauh a lo tawh lova, kawi te hian kan han hrut rual a, cement mortar anga bill a nih theih nan. Harsatna karah lungrem te pawh kha UT period hma, district council hma te pawh khan ka lo thawk ve vak tawh a; khata tanga tun inkara develop chhoa kha, a rahbi pawh sawi tur a tam ang a. District council period atangin UT period ah a lo chho a, ‘UT building a nih kha; UT kawng a nih kha’ han tih chuan, a dik chiah mai a; ‘second class’ ti khan sawi ngai lovin kan hmu vek mai a ni.

Kan kawng laih pakhatnaa kawng grading kha a tha lo thin a, tin, a kawng a zim bawk a. Chuti loah chuan a kawng, black-topping kan tih pawh a chhe bawk a, rei a daih lova. Amaherawhchu, state kan ni a, tlem chuan a rawn improve ve zel a, vawiin ni thleng hian kha kha zawi zawiin a improve chho a. Kan tun hun, he electronic period kan lo thlen takah chuan development zuang pawh a chak a, atha lam turah pawh a chak a, mahsela kan duhthu samin a la tha lo em em a ni. Tunah pawh hian theih tawpa kan han tih pawh a hretu ka ni a. Chief Minister In rangva chih lai pawh khan kan buai

khawp a; fur lai chuan chawhtawlh leh baltina dawh ngai hmun 3-4 ah a awm a. Siam kan han tum thin a, a buaithlak em em mai a. Khatiang kha CM bungalow rangva chih ngai te pawh a ni a. 'Hei hi chu concrete-a tih ngei a ngai' an tih pawh a tam khawp mai. Engpawhnise, kha kha kan pha thei lova, kan tawn lai mek a ni a. Kan hotute'n an han sawi bak pawh kha a la tam mai a; kha kha kan tun dinhmun chu a ni.

Amaerawhchu, zawi zawiin India sorkar development nen, ram pumpui hmalakna nen, State-in hma a lakna nen a rawn inchhawp chho ta a, thil danga thatlohna kha chu sawi thu a cheng lova, a tha lo lai period chu ka sawi tawh lo ang a. Tuna hna inchhawpah hian, 'national highway India sorkarin tam thei ang ber siam ila, chu chu sorkar laipui atangin kan rawn en ang; kan rawn monitor ang; kan rawn maintain ang' an ti a. Kan ramah pawh chu chu vanneihthlak takin a hma aiin national highway pawh kha tha leh zual, two-lane-a siam turin hma an han la ta a. Silchar phai, Vairengte lam atangin Aizawl thlengin 'four lane-in a kal tur a ni; State capital chu four lane-in a thleng ngei tur a ni' tih a ni a. Keini ngaihah chuan two-lane hian hmun 2-ah te kal se a ziaawm zawk ang a; four-lane a thil tihtur hi a turu lutuk a, kan kawng laih leh kan rama tlang awm dan nen hian 'kan ti khawlo zawk ang' te kan han ti rum rum zawk a, a dang chu an sawi chuang lova; 'State capital tal chu four-lane a thleng tur a ni' an ti a. Chuvangin, Tlawng kam kawng hlui zawka four-lane laih an tum pawh khan, "two-lane pawh tling lo han tih pawh hi kan tlin lova; a thlang lawkah lui a ni a, tawlh hlekin a chhuk a, a inkhuap a; four-lane han lai teh reng ula chuan..." kan ti a. chuvangin, "hei hi chu kan awi lo, a chhak green area-ah duh tawka four-lane-a laih theihna, lui tana hlauhawm lutuk lo a awm e" tiin kan zuk nawr a, tichuan an remti a. Tlawng kam kawng hluia lai lovin four-lane tur pawh kan nawr chhuak thei ta a ni a. Aizawl thlengin four-lane kawng a lo kal ang a, chu national highway chuan Aizawl atanga hmun dang kalnaah - Aizawl atanga Lunglei, a chhak zawkah....

SPEAKER : Kan hun a tawp a; kan CM zahawm tak hian han sawi zo law law sela the kan ti em? (*House-in tha a ti a.*) Awle, sawi zawm leh mai rawh le.

PU ZORAMTHANGA, CHIEF MINISTER: Awle, a tawi thei anga Pu Speaker, han tih pawh ka han tum ang a.

Tichuan, Lunglei – Seling tlangdunga kawngpui pangngaiyah two-lane-in Tuipang thlengin national highway an tlang pheipup dawn a, tunah chuan a kal ta a. Tin, Seling atangin Champhai lam chhunin two-lane national highway pawh an lai mup mup a, a kal mek bawka; Seling atangin Tipaimukh chhunin a kaltlang dawn bawka; khawthlang lamah Kanhmun lam thlenga chhuk thlain a kal dawn bawka; chhak lam atanga khawthlang tawp lam chhunin, chhim tawp atanga hmar tawp chhunin national highway a kal tlang pup dawn a ni.

A rawn enkawltu chu Govt. of India - MoRT thin, NHIDCL kutah a rawn dah a. Anni khan tender te, hna tur zawng zawng nen an rawn ti a, a State neitu chuan tha kan tih leh thalo kan tih chu theihtawpin kan lo sawipui a. Ka sawi ang khan, NHIDCL-in ‘Tlawng kamah four-lane a kal tur a ni’ an tih pawhin theih tawpa kan lo tan chuan, ‘a nih leh, a chhak lamah ni rawh se’ an ti ve ta a. Khatiang khan, a tha lo lai pawh State sorkar hian beihpuiin kan lo bei a, nasa takin, a tan pawh kan lo tang reng a ni. Amaherawhchu, khami piah lamah khan kawng hlawm khat a la awm a, chu chu ‘PMGSY’ a ni a, PMGSY chu thingtlang khawtin te chhun vek tura central sorkarin RD hnuaia a rawn dah a ni ve thung a, anmahniin an guidelines neih angin an rawn siam vek a, open tender-in kan han kal a. Kan hmuh ang khan, PMGSY chu a kal ta a, a buaithlak lai chu - open tender-in kan han ti a, lowest bidder (a hniam ber) kha pek a ngai a, pek loh chuan Court-ah an kal a, a tihngaihna a awm si lova. Kan han inchhan hniam siak tak tak a, scheduled of rates hnuaiah 10% below, 15% below, tunah pawh 25% below a awm a, a then chu 50% below-a chhang te pawh zuk awm a maw le! A buaithlak lutuk a. Han pekloh dawnin, Court-ah an kal dawn baw si a; pekin, a tlawlh dawn tih a chiang sa baw si; eng emaw ti ti khan ‘5% below aia hniama chhan theihloh’ an han ti a. ‘Dan’ chiah pawh chu a ni lova, kan siam chawp ve deuh a ni a, khata tang pawh khan a hniama lo chhang lui an awm pawh khan, an security deposit-ah ‘chumi percentage chuan an dah sang tur a ni’ tih nen theihtawpin monitor turin PWD kha a kengtuh an rawn hmang baw si a, kan tang a ni.

Chuvangin, PMGSY tender-a, kan kalkawng pawh en ila, a then chu bansan (blacklist) tak, thawh mumal tak loh, chhanna open tender percentage hniam si, ngawl tang a tam em em a ni. Chuvangin, open tender-a tih hi a then chuan, “khaw nge a department, a sorkar ho hi? Ka han tibuai ve reng reng teh ang” ti ang maia, thawh theih miah loh tur hniam lutuka chhang kan tam thin a, chu chu kan ngamlohna leh kan buaina ber, kan ram kawng chhiatna pangngai a ni. Scheduled of rates pangngai PWD-in an tih ang hian thawk char char sela chuan a ziaawm ang a, mahse a thawh theih si lova, an inchhanhniam siak ta thin a. Tu pawh sorkar ila, kha chiah kha kan buaina a ni ta a ni. Chuvangin, restricted tender-a a pawimawh zual tih kha chuan rate hniam lutuka kal lovin, scheduled of rates pangngai anga awmze neiin a thawh tir theih a. Sorkar kal tawh te pawhin, “engah nge in restrict leh thin?” an tih pawhin, ‘ngawi rawh u, hna tha kan duh chuan kawng dang a awm mang lo; kan open tender chuan hei hi a ni a, an intihsiakna karah kan buai thin a ni” an ti a. Kha kha restrict tender tamna chhan pawh a ni a, a theih hram chuan open tender-a tih hram hram pawh kan duh a ni.

Eng pawh nise, kan duh chu ‘kawngtha’ a ni, sanction lo kal aia sanga thawh tir theih a ni lo; sanction lo kal ang tal kha chuan thawk se la, khami aia hniam fe a thawh tuma hna duh vanga han intlansiakna hian kan ram a tichhe nasa lutuk a, chu chu kan luhaina ber pawh a ni. Eng pawh nise, tunah chuan kan control theihna piahlamah NHIDC-in National Highway an han ti a, kan environment an tichhiatna hi a nasa ngawt mai; kan phekk tan a ngai a ni. Forest Deptt, PWD, khawtlang hruaitute, sorkar leh NGO-

te nen tih tak taka kan environment an tihchhiatna hi chu hma kan lak a ngai a, kan tan zel pawh a ngai a ni. Chuti loa, an hna pangngaiyah chuan a vengtu (monitor) tur pawh anrawn insiam bawka, a ziaawm deuh tawh a. Tun hmaa kan kawngsiam ai chuan a ziaawm a. Mahse, duhthusam lo lai a la tam khawp mai a, hetah erawh hi chuan sorkar pawh, PWD leh kan NGO-te pawh ‘thawhho dan i ngaihtuah ang u’ tiin inremna te neiin hma kan la hial a ni. A tul zia leh kan duh zia chu a takin a lang a ni. Chuvangin, ti ho zel ila, VC, NGO-te leh khawtlang hruaitute nen pawh, nitina an hnathawh hmu khanrawn report vat se la, ‘engatinge?’ kan tih tlan theih nan kan vai tan a ngai tak tak a.

Chuvangin, helaia resolution, “kawngpui tha leh building thate kan neih theihna turin theih tawpin tan nasa lehzual leh, uluk lehzuala hnathawh hi a tha a ni” tih hi kan pawm tlang a. Tin, a dik bawka, pawm ngei ngei tur pawh a ni a; keini pawhin he resolution hi pass tha kan ti a. Kan in sakte ‘10% below’ tea an chhan chuan, a hlep tur chuan cement leh eng emaw kha, a cement proportion lama tihhniam te leh thil dangah te an tlak a, kan in sakte pawhin a chhiat phah thin a ni. Mahse tunah hi chuan, a tlangpuiin kan in sak hi a viltute’n an vil bawka, a ziaawm ta khawp mai a, tunhma ai kha chuan; that lam pan zel tur leh quality thaa kal tur pawhin sorkar lam leh department lam pawhin hma kan la a, lak zel pawh kan tum a. Kan NGO-te leh midang pawh thawhpui turin nasa takin kan sawm bawka ni.

Tin, kan working period chu kan hria a, kum khatah thla 6 pawh a ni mang lova. Ruahtui a lo tla leh zung zung a, a black top chinah pheichuan a buaithlak khawp mai a. Chuvangin, ‘concrete (PCC) mai hi a tha zawk e, kan ram dinhmunah chuan’ kan ti fo a. Eng emaw tawi deuhah pheichuan kan ti zung zung mai a. Veng chhung kawngah pawh a tha kan ti a, mahse kawngpui tak tak a han tih dawn hian PWD tan a buaithlakna chu, khawilai khawkar kawng emaw kan PCC-a, eng emaw chhung chu motor tlan tir loh a ngai si, a contractor leh a khuate ‘motor tlan an mamawh tawh’ tia in tlantir chuan a rap chhe vek dawn si; thubuai kha a buaithlak lutuk a, kan duh ang pawhin kan ti hleitheilo a ni.

Amaherawchu, thil pakhat tunhnaia ka hriat chu, cement-ah khan ‘damdawi zuk telha rang taka char thei a awm e’ an ti a; “rawn la teh u, i test ang” ka ti a; nikhatah pawh a char tha maithei e. Chu chu a that theih chuan, PCC-a kawng han tih hi kan ram ruahtui tam lutukah chuan han black top thin bawka mah ila, a buaithlak em em a ni. Tui a tling a, kawng chhak a lo min a, chung chuan drain a hnawh a, tui a tling reng mai a, motor lianin a rap a; a chhiat laklawh tawh chuan thal leh nghah loh chuan a repair tak tak theih si loh a. Chuvangin, helai hi a buaithlak a. Tunah pawh PWD-in a kan enkawlah chuan kan kawngpui - Lunglei World Bank kawng hi a pui ber a ni a, a dang PMGSY leh kawng dang hi chu a thawktuin an enkawl tur period kha a la ni hlawm a; a zo tawh, keimahni enkawl ngai chin te pawh a awm a. Engpawh nise, motor lian tlan tur ber chu central lam kutah tunah hian a awm a, theih tawpin lo puih kan tum ang a, kan vaia kan puih an ngai em em a ni.

Tuna thalah hi chuan motor lian rah chhiat loh turin a tir atanga design a ngai a, Lunglei road-ah te pawh chu chu kan kalpui a. A dangah hian tuna kan tih theih chin – patching emaw tal resurfacing theih ang chin chin kan thawk tan a, kan ti char char dawn a ni. A thawktute’n an tih dik loh lai kha chu inhrilh tlang zel ila, ‘hei hi a dik lo e’ tia kan vai tan a ngai a ni. Pu Speaker, insawi mawi ka tum pawh a ni lova, hma chu kan sawn chho ve zel a, hmasawn lehzual turin tan lak kan tum a ni.

Tichuan, he Resolution - “*Kawngpui tha leh building tha kan neih theih nan uluk takin hna thawh ni rawh se*” tih hi tha kan ti tlang em em a, kan support thlap a. Group tinin tha kan tih tlan a nih avangin lungrual takin pass tha ka tih thu ka rawn sawi a ni e. Ka lawm e.

SPEAKER : Vawiin hian member zahawm tak Pu Vanlalhlana chu chhungte thihna avangin a lo kal thei lo a ni.

Tunah kan chawl ang a; a dar pangngai hi chu kan bawhchhe thei lova, 2:00 PM ah kan tan leh dawn nia.

2:00 PM

SPEAKER : Quorum kan tling maw? Aw le, tunah chuan a bill neitu member zahawm tak Pu Lalchhuanthanga kan sawm ang a, kan sawi hona te rawn wind up-in, pass rawn dil nghal bawk se.

PU LALCHHUANTHANGA: Pu Speaker, ka lawm e.

Hei, ka Resolution - “*Kawngpui tha leh building tha kan neih theih nan tuna aia ulukin hna thawh ni rawh se*” tih chu kan han sawi khawm a, member pasarih laiin min sawipui a, ka lawm tak meuh meuh a. A bik takin, PWD changtu kan CM zahawm takin a ngai pawimawh a. Kawng that theihna tur te, hma lak dan tur te leh an lo kal tawh dan te pawh a sawi a, beiseina sang tak a hnenah kan nei a.

Han wind up tur vak pawh ka hre lova. Ka resolution, group hrang hrangin lungrual taka kan han pawm thei hi, kan han sawi tak ang khan thil vang tak pawh niin ka hria a, a puluttu nih pawh a lawmawm khawp mai.

Tichuan, ka Resolution - “*Kawngpui tha leh building tha kan neih theih nan tuna aia ulukin hna thawh ni rawh se*”, tih hi member te min pass-pui turin ka sawm e.

SPEAKER : Aw le; resolution neituin a resolution adopt a rawn dil ta a, kan buk ang a.

“*Kawngpui tha leh building tha kan neih theih nan tuna aia ulukin hna thawh ni rawh se*” tih hi, adopt rem ti apiangin ‘rem ti’ ti rawh u le. (**Memberte:** Rem ti) Rem ti lo kan awm em? Kan awm chuan ‘rem ti lo’ ti u la.

Aw le, member zahawm tak Pu Lalchhuanthanga Resolution - “*Kawngpui tha leh building tha kan neih theih nan tuna aia ulukin hna thawh ni rawh se*” tih chu House-in lungrual takin a adopt ta ni. (**Pu Lalchhuanthanga:** Pu Speaker, ka lawm e.)

Hun kan la nei a, dar 4 thleng turin. Resolution No. 2-ah kan kal ang a. “*Kan ram thenawmte sa-himna zawnga rawn ral tlan te hi kan sorkar hian an awmna tur siam sakin, duat takin enkawl se; awm khawmna tur bik ngaihtuhsak rawh se*”, tih a ni a. Resolution neitu, Member zahawm tak Pu Lalrindika Ralte, move turin ka sawm e.

PU LALRINDIKA RALTE: Pu Speaker, ka lawm e.

A hmasaa lawmthu ka sawi duh chu - kan House boruak a nuam hle mai a. Tunah khan kan pass zo chiah a, member zahawm tak resolution pawh kha. A lawmawm hle in ka hria a, kei pawhin beiseina sang tak ka nei a. He ka resolution hi lungrual taka min pass pui ve beisei chungin rawn move ka duh a.

Thuhma a tan tlem ka sawi duh chu - Pu Speaker, kan hriat angin Myanmar leh Bangladesh atangin kan unaute an rawn raltlan a, NGO hrang hrangte leh sorkar ang pawhin kan lo buaipui nasa a. Mimal te pawh a ni ang, kohhran te pawh a ni a; kan lo buaipui nasa a, lawmthu ka sawi a.

Harsatna hi tumahin kan duh lova. Amaherawhchu, harsatna hi kan hringnuna bet ve tlat a nihna chin te pawh a awm a. Tin, harsatna ruamah hian nun inngahna a dik leh dik loh te hi a lang fiah ve thin a. He kan hnamin harsatna kan tawh ve chungchangah pawh hian, ‘eng ang tluka hnam inlaint leh inhmangaih nge kan lo nih’ tih hi a lang Chiang Chho zel dawn niin a hriat a; a harsatna kha chu duh lo mah i la. Amaherawhchu, kan tawna, kan tlanhhiat san theih si lohah chuan, he harsatna hi rawng inbawl sak nan te, kan inhmangaihna leh kan inlaintna lantir nan he hnam hian kan hman chhoh pawh ka duh bawka a ni.

Tin, hei, ‘refugee’ kan ti lo thei lova. Bangladesh atang hian chhungkua 458 leh Myanmar atangin chhungkua 31,050 te lo luta hriat a ni a. He document hi a dik vek kher lo maithei a, lo danglam hlek te pawh a lo awm ang a. A document kha chu eng a pawh lo ni se, harsatna tawktute lo chhawmdawl hi kan tih tur leh vawiina kan Resolution kan put luh chhan pawh a ni a.

Tichuan, Pu Speaker, vawiina ka Private Resolution - “*Kan ram thenawmte sa himna zawnga rawn ral tlan te hi kan sorkar hian an awmna tur siam sakin duat takin*

enkawl se; awm khawmna tur bik ngaihtuahsak rawh se”, tih, kan ram rorelna sang bera sawiho ngaia a lo awm hi a lungchhiatthlak ka ti a. Amaherawhchu, a tul bawk si a ni.

Kum zabi 21-na kan chuang kai tawh a. Kum zabi 21-naah pawh mahni mihringpui pawhin tuar dawn mahse, pawilo leh mahni khua leh tuite pawhin tuar dawn mahse pawilo khawpa thuneihna thlahlel an la awm hi a vanduaithlak ka ti a. Tin, chu mi tuartute kan unaute an ni hi a pawilo takzetin ka hria a, an thlavang kan hauh ngei pawh a pawimawhin ka hre bawk a ni.

Tin, wawiinnia ka resolution rawn putluhna chhan hi, ‘Sorkarin a tih tur a ti tawkl lo’ tih lam a ni lova, amaherawhchu, kan sorkar hian a mawh la se kan ram leh hnam tan a that ber ka ring a. Chuvanga he Resolution hi rawn pulut ka ni.

Pu Speaker, a tawp berah chuan, khang ka rawn sawi takte hre chung leh kan unaute harsatna tawkl mekte ngaihtuah chungin, ka resolution hi kan member zahawm tak ten thinlung taka min sawipua, min pawmpui ngei turin ka ngen bawkl a ni e. Ka lawm e.

SPEAKER : Awle, resolution neituin a rawn move ta a, kan sawiho nghal ang a. Minute engzatnge kan inpek leh ang? Minute 10 hi kan kal dan a ni ber a, minute 10 i ti mai ang aw? (*House-in a remti a..*) Tunge han sawi hmasa ang le? A resolution neitu lam party te pawh kha kan han phut che u a nia. Awle, member zahawm tak Dr. B.D. Chakma ka sawm e.

PU B.D. CHAKMA : Pu Speaker, ka lawm e. He *Private Member Resolution* hi a pawimawh ka ti a, chutih lain sawi tura banphar an awm vak lova.

Member zahawm tak Pu Lalrindika Ralte Resolution – “*Kan ram thenawmte atanga sahimna zawnga rawn raltlante hi kan sawrkar hian an awmna tur siamsakin, duat takin enkawl se; awmkhawmna tur hmun bik ngaihtuah sak rawh se*” tih a ni a.

He resolution hi a tha ka ti em em a. Keini Mizoram hi international boundary hnaivaia awm kan ni a, East lam hi China leh Myanmar a ni a, tin, west lam hi Bangladesh niin, a tri-junction-ah tak kan awm a ni a. Tunlai khawvelah ‘materialistic’ kan ti a, khawvela developing leh under-developing country aiin developed country te hian development an khelh nasat lutuk avangin buaina a chhuak ta thin a. Chutianga ram buaina avangin raltlan awmna state te zingah keini hi kan vulnerable ber a ni tih kha ka sawi duh a ni. Chuvangin, Myanmar leh Bangladesh te hi development lama kan thlir chuan India nena an relationship hi a chhe lo ang tih kha ka sawi duh a. Tin, India mipuite hi Myanmar leh Bangladesh mipuite nena tehkhinin kan hnam leh sakhua lamah pawh kan inzul em em a. Myanmar-ah pawh Buddhist sakhua zawm tam tak an awm a, chutiingin Mizo unau kristiante pawh Myanmar-ah tamtak an awm a. Tin,

Bangladesh-a Chakma, Bawm leh Pang te zingah pawh Buddhist sakhaw zawm kan unaute tamtak an awm a ni. Tin, Bangladesh buaina hi kan Mizo leh Chakma unaute chauh ni lovin, kan tribal-puite hian an tuar nasa bik a. Khawvel awm chhung chuan heng thil hi a awm ve lo thei lova, North East State te zingah .. (*Hon. Dy. Speaker-in Chair a la a..*)

DEPUTY SPEAKER : Sawi chhonzawm rawh le.

PU B.D. CHAKMA : Pu Dy. Speaker, ka lawm e. Chuvangin, hetiang thil, rambuaina avanga raltlan ho kha hmelma nilovin, duat taka kan mikhual a, kan lo enkawl ve hi kan tih tur a ni.

Hei, Buddhist religious-bu ah pawh OTT Dev Bava chuan chiang takin a sawi a - “Kan mikhualte chu Pathian angin mimalin kan duat ve tur a ni” tiin. Eng emaw buaina avanga raltlan te an awm a nih chuan, ei tur lo pek kha kan mawhphurhna a ni a, ‘duat takin kan lo enkawl tur a ni’ tih kha min hrilh a ni. Chuvangin, he thilah hian keimahni Kristian unaute chauh ni lo, Lai Autonomous District Council area, (a hmun tak chu ka hre lova) ah pawh kan unau Buddhist sakhua biate Myanmar raltlan tlem an awmin ka hria a, kan puthiam te pawhin thla hmasa khan relief material an han sem a. Chuvangin, hetiang sakhua emaw, hnam emaw zawng ni lova, rambuaina avanga rawn raltlante duat taka lo enkawl kha kan moral responsibility a ni a. Chuvangin, kei pawh hi he session zawhah hian a ranglamin Parva lamah kal nghal ka duh a. Chutah chuan Bawm leh Pang raltlan chhungkua eng emaw zat an awm a, ka MLA fund atangin *most urgent* angin tlem reserve ka dah a, chu chu an awmna hmun ngei tlawha, ‘engnge an mamawh ber’ tih te hriata sem ka duh a. Chutiangin Pu C. Ngunlianchnunga Bialah pawh an awm a; bial inhnaivai kan ni a, kan induat hle tur a ni.

Chu mai bakah thil pakhat ka sawi duh chu - Covid-19 lai khan central lama NGO pakhatin oxygen concentrator sem tur tlem min rawn present a, sawta ka zin huna semah pakhat chu ka reserve bawka a ni. Chutiang chuan theih ang anga tanpui turin ka rilru pawh ka siam a ni e. Pu Deputy Speaker, ka lawm e.

DEPUTY SPEAKER : Tunge sawi leh ang? Aw, Member zahawm tak Pu Lalrintluanga Sailo ka sawm e.

PU LALRINTLUANGA SAILO: Pu Dy. Speaker, ka lawm e. Hei, vawiih kan tih dan lo takin ni khatah Private Resolution pahnih sawi a lo ngai ta a, lawmawm lamah ngai ta ila. Pu Lalrindika Ralte Hachhek bialtu zahawm takin “*Kan ram thenawmte atanga sahimna zawnga rawn raltlante hi kan sawrkar hian duat takin enkawl se; awmkhawmna tur hmun bik ngaihtuah sak rawh se*” tih hi, keini chuan tha kan ti tlangin ka ring a, kei pawhin mimal takin tha ka ti hle a. Amaherawhchu, a wording hi Pu Dy. Speaker, ‘awmkhawmna tur hmun bik’ han tih lai tak hi tlema kan modify a thain ka

ring a. A chhan chu, central subject deuh hlek a ni a, awm khawmna tak hi. Induhsak viau mah ila, a remlohna te pawh a awm thei a. Tin, ‘hmun bik’ han tih lai te pawh hi, ‘an awmna tur’ ti ang zawng deuh tein nakinah a thu thiam deuh ten han ti sela a thain ka ring a.

Tin, a resolution hrim hrim hi, Zofate insuihkhawm lehna atan pawh boruak tha siamtu atan ka beisei a. Keini MNF party phei chuan Zofate awmna zawng zawng rorelna pakhat hnuai dah turin kum tam tak kan lo bei tawh a ni a. Vawiinah heng ‘raltlan’ kan han tih bik te hi kan hriat angin khawchhak lamah Myanmar ramah kan Zofa unaute an ni deuh vek mai a. Chutihrualin Bangladesh lama Zofate hi, kan unaute an ni a. Keini ngat phei chu kan House Leader ho hian kum 20 zen zawn sawng laia min lo mikhual a, an ei ai te pawh min lo buatsaih saktute, kan lum loh hlaua an sin lai min sin tir thin tute kha an ni a. Chuvang chuan, he resolution a lo luh rual hian kan sentiment a khawih hle a ni. Chuvang chuan, he resolution tha tak mai hi thinlung leh titak zetin ka thlawp a ni.

Heng kan unaute ho hrehawm taka an awm hi a hmu thei lotute zingah kan tel theuh turah ka ngai a. Chuvang chuan, kan sorkar hian a resolution ang deuh hian, tha tak leh duat taka an sahimna zawn sak hi kan mawhphurhna a ni dawn lawm ni? India sorkar pawh hetiang zawng hian kan au dawn lawm ni? Hetiang zawnga anmahni tanpui hi ka ngaihtuahnaah a lian hle a ni. Chuvang chuan hei hi, *a-mizo* a, kan inhmangaihtawna te, international boundary-in min kham hnan mah sela, ‘kan rilru leh kan ngaihtuahna hi heng international boundary hian a dang zo lo a ni’ tiin, tun hunah hian lungruah taka kan za a, he House-a member zawng zawng te kan ngaihtuahna zawng zawngah awm sela ka duh a ni. Chuvang chuan, *a-thu* mai ni lova, a taka kan hmangaihna te, kan khawngaihna te, kan lainatna te, kan duhsakna te kan lantir a pawimawh hlein ka hria.

Resolution hmasa, Pu Lalchhuanthanga private resolution kan han thlawp hlek tawh te kha, hnam anga kan tanhonaah te thil tha kan duhzia tihlanna atan kan House Leader thlengin tha takin kan thlawp a, lawmawm ka ti a. Chutihruah erawh chuan Pu Dy. Speaker, a resolution neitu hotupa ber kha a lawmawm lutuk lo lai kha han tarlan ka duh a. Kan Bible-ah chuan ‘hmangaihna’ a uar em em a. *“Hmangaihna a dawhthei a, ngil a nei bawk thin; a uang lova, a che mawilo lova, mahni hma a sial lova, a thinur duh lova”* a ti a. A khaikhawmnaah khan, *“Sual lam a ngaihtuah lova”* a ti a ni. Keini member zawng zawngin ‘kan thlawp a ni’ tih, Pu Lalchhuanthanga, a resolution neituin min ngen ngawih ngawihna kha kan zain kan thlawp a ni. Chutih laiin sual lam a ngaihtuah tlat a, a lawm lova, a auchhuahpui a; ‘kha kha a puitling ber em aw’ tih min ngaihtuah tir a ni. Naupangchhia, lungawi lova kan thlem, ama duh zawng kan tih saka bang ta ang kha niin ka hre deuh a. Tin, a pass-puitute zingah ani a lo tel lo zel lai hi, a lawmlahna kha tawngkam mai ni lovin, physically-in a tilang niin ka hria a, a vanduaithlak hle a ni. Ama tihdan takah, *rilru a na hle a ni; thinlung a tap takzet a ni.*

Chuvang chuan, amah pawh hi lo lut sela, Pu Lalrindika Ralte resolution tha tak mai hi hnam inpumkhat nan te, Kristian kan nihhona kan inhmangaihna tihlanna atan te han sawi tlangin, lungrual takin han pass tlang ila ka duh a ni. Chuvang chuan, kan resolution, chawhma lama kan pass tak leh Pu Lalrindika Ralte han putluh te hi a thlawpawm takzet zet a.

Amaherawhchu, sawi ang khan a wording tlem han correct kha a awm thei dawnin ka hria a. A chhan chu, a tha duhna avangin technically hian kan *foul* ve thei thin a. Helai erawh hi chu thu-thiam deuh ten nakinah Pu Dy. Speaker, kan ngaihdan leh kan resolution pawmtlan dan atangin rawn sawilang sela a thain ka hria. Hei hi thinlung leh ti tak zetin ka thlawp a, pass sak ngei tur pawhin ka support a. Hun lo kal leh zelah pawh tawngka mai ni lo, thinlung leh titak zeta thiltih nen heng kan inunauna kan lanchhoh tir zel hi *a-mizo* a, *a-kristian* a; tin, *a-ram hmangaihzia* bawka ni. Vawiinah hian mahni pumpui chauh hampuar kan nih loh zia hi kan Zofa khawvel hmun hrang hranga awmte pawhin min hriat sak sela. He Pu Zoramthanga kaihhruai MNF sorkar hian kum tam tak kan lo fight tawhna hi ‘a taka lantirna remchang a ni bawka ni’ tih, he resolution hian a lantir a, “ka support a ni” tih ka han tarlang a ni e. Ka lawm e.

DEPUTY SPEAKER : Tunge sawi leh ang? Member zahawm tak Pu KT Rokhaw ka sawm e.

PU K.T. ROKHAW : Pu Dy. Speaker, ka lawm e. Vawiin hi opposition MLA-te - Pu Lalchhuanthanga leh Pu Lalrindika Ralte resolution kan sawiho a ni a, memberte pawh hi kan lungrual viauin a lang a, hei hi chhinchiah tlak niin ka hria. Opposition member-te resolution pahnih lai mai lungrual taka pass theih tur a ni hi lawmawm ka ti takzet a ni.

Pu Dy. Speaker, Pu Lalrindika Ralte resolution - “*Kan ram thenawmte atanga sahimna zawng a rawn ralhlante hi kan sawrkar hian an awmna tur siamsakin, duat takin enkawl se; awmkhawmna tur hmun bik ngaihtuah sak rawh se*” tih hi a tha ka ti a, ka thlawp a.

Kan hriat angin Myanmar ram buai avangin Burma lam atangin kan unaute tam tak an lo lut a, chu bakah Bangladesh lam atangin kan unaute ralhlante kan nei bawka ni. Keini bialah phei chuan Pu Dy. Speaker, camp 27 kan nei a, camp 27-ah awmte hi an vaiin mi 4,586 an ni. Tin, Siaha khawpuia inluaha awmte leh hmun remchang danga awmte hi hetah hian chhiar tel anni lova; a awmzia chu, tuna ka sawi ai hian an tam zawk dawn a ni. Chuvang chuan tuna an awmna te khi ka ngaihtuah a, Myanmar sorkar khi a ziaawm mai a rinawmluh avangin, heng ralhlante hi kan sokar hian an awmna tur hmun a rang lama kan ngaihtuah a ngaiin ka hria a. Keini Siaha District-ah phei chuan an camp awmna tur te khawngtlang hruaitu VC te leh NGO ten an ruahman sak a,

temporary in camp te an siamsak a. A thenah phei chuan *Ni-100 inhlawhna* te an hmang-tangkai a, chutiang chuan kan inchnawmdawl a ni. Tin, ei leh in, silh leh fen te pawh min tawm ve bawk a ni tih te ka han sawi duh bawk a.

Chuvang chuan, sorkar hian an awmna tur camp hi a rang lama a ruahman a ngai khawpin ka hria a. Ka rilrua lian em em chu, Siaha leh a chhel vela raltlante hi Lobo khuaah an camp siamsak ni sela, Lobo hi police out-post leh sipai awmna a ni bawk a, a remchang khawpin ka hria a. Tin, camp pahnhna Chakhei leh Siasi khaw inkarah emaw dah leh ni ta sela; tin, a pathumnaah Zyhno khaw bulah dah ni leh sela; a palinaah chuan Lopu lamah dah nib awk se a that ka ring a. Chuvang chuan, ‘he resolution hi ka lo thlawp a ni’ tih karawn sawi ve a ni e. Ka lawm e.

DEPUTY SPEAKER : Hun in hmang reilo thei hle mai a; minute 5 in sawi thei mang lo tlat mai a. Tunge sawi leh ang le? Member zahawm tak Pu Ramthanmawia ka sawm e.

PU RAMTHANMAWIA : Pu Dy. Speaker, ka lawm e. Member zahawm tak tak tena hun an hman bang kha chu ka hauh teh ang; sawi tur ka ngah deuh maithei a.

Vawiinah Private Resolution pahnih kan han sawiho ta a. Kan ngaihthlak tak ang khan, lungrual taka kan pass tak “*Kawngpui tha leh building tha kan neih theih nan tun aia ulukin hna thawh ni rawh se*” tih te kha a lawmawm ka ti a; ka sawi ve lo naa, kan thlawp em em a. A chhan chu, kawngpui tha neih a hlutzia hretu vek kan ni a. Kan bial East Tuipui phei chu kawngpui tha kan nei har hle a, tunah hian kan han nei ve a, bial chhungah na na na chuan harsa lo tak leh rang takin kan tum ram kan thleng zung zung thei a; chungah te chuan MLA zahawm takina a rawn putluh hi a dik zia hretu leh chhawrtu kan nih avangin, lungrual taka kan han pass thei kha ropui ka ti a ni. A chang chuan kan han inisial bap bap thin tak na a, a tak takah chuan kan ram thatna turah hi chuan kan inlungrual a ni. Kan ram leh hnam dinchhuahna tur leh kan that zawkna turah hi chuan ‘kan inlungrual hle a ni’ tih hi vawiinah hian a lo lang Chiang a, a lawmawm ka ti a ni.

Pu Dy. Speaker, MLA zahawm tak Pu Lalrindika Ralte resolution rawn putluh, “*Kan ram thenawmte atanga sahimna zawng a rawn raltlante hi kan sawrkar hian an awmna tur siamsakin, duat takin enkawl se; awmkhawmna tur hmun bik ngaihtuah sak rawh se*” tih hi, a tum hi a tha hlein ka hria a. Amaherawhchu, kan ngaihthlak tak ang khan ‘*awmkhawmna tur hmun bik*’ tih hi, ‘*remchang*’ tia han siamrem hi remti se chuan a that ka ring a, chungte chu kan sawi hmasa duh a.

Kan hriat angin Ni 1.2.2021 khan kan thenawm ram Myanmar chu General Min Aung Hlaing in a sipai chakna hmangin mipui sorkar, Aung San Suu kyai kaihhruai chu

paihthlain, sipai sorkar a din a; chu sipai sorkarna chu duh loin mipuiin nasa takin an dodal a, silai hial tipuakin an buai chho ta em em a, rambuayah a chang chho ta a ni.

Chu buaina chu darhzau zelin, Zo-hnahthlakte chenna ‘Chin Hills’ kan tih, kan unaute chenna thlengin buaina chuan a rawn chim chho ta a. Mipui leh Myanmar sipaite chu vawi tam tak an inkap a, Zo-hnahthlakte chenna khaw thenkhat phei chu Myanmar sipai ten an hal sak a, thlawhna hmanga bomb te thlakin an bei a ni. Hetia buaina a lo thlen takah chuan, Myanmar lama kan unaute chu an in leh lo te tihchhiatin an awm a, thla bar mangangin an awm a, an sahimna zawngin ‘kan unaute’ tiin Mizoram lamah loh theih loh in an lo lut ta a ni.

Pu Dy. Speaker, he ram buaina avanga an raltlan tirh kha kum 2021, helaia budget session kan neih mek lai kha a ni a. Ka bial Farkawn atangin VC ten min rawn bia a, “Myanmar rambuai a vangin kan unaute raltlanin an rawn lut tan a, harsatna kan tawk tlat mai” an rawn ti a. An harsatna chu, khi laia ramri veng Assam Rifles ten an lo dang kir a, luh an phalloh avang khan ramhnuayah te an lo awm a ni. Chu thu chu kan House Leader zahawm tak hnenah kan thlen ta vat a, chuta tang chuan kan hotupa ber, kan CM zahawm tak khan khami tlai la la khan he House ah ngei hian, he sorkar, MNF sorkarin Myanmar unau raltlante chung a rilru puthmang, a ngaihda kha ‘khawvel hriatah a puang ta a ni’ tih kan hria a.

Tin, tunhnaiah Chittagong Hills Tracts-a Kuki National Army ten thuneihna sang zawk an ngiat avanga buaina thlengah Bangladesh ram a kan unaute pawhin sahimna zawngin Mizoram-ah an lo lut ve leh tih kan hria kha.

Kan sawi tak ang khan, Myanmar ram atanga kan bial chhunga raltlan hmasaber chu Thasiama a ni a, Tamu khua niin, February Ni 3, 2021 ah Thekte khuaah a mah chauh in a lo tlanlut a ni. Ka bial, East Tuipui-ah khian raltlan mi 2,500 vel an awm mek a, Ni 27 January, 2023 thleng khan Mizoram-a raltlan lo lut hi, mi 31,508 an tling tawh a ni. Myanmar atanga lo lut hi mi 31,050 niin, Bangladesh a tanga lo lut hi mi 458 an ni. Kan ngaihthlak tak ang khan, an lo luh phat atangin sorkarin a tihtheih theih te a ti nghal a, chu mai ni lovin, a khaw thenawm, khalai ramria awm kan NGO te, kan VC te, khawtlang leh kohhran ten thahnemngaiin leh tlawmngai takin an lo tuamhlawm a. Chutiang chuan, a thenin mi in an bel a, a thenin mi in te luahin leh bukte sak sak in, chutiang chuan a tir atangin Zoram mipuiin heng harsatna tawkte chungah hian ngilnei leh duhsak takin an lo enkawl nghal a ni.

Vawiina kan resolution hi pass ta lo pawh ni ila, kan sorkar leh kan mipuite’n a an enkawl mek, ‘an tih mek a ni’ ti zawng te pawhin sawi ta ila, a dik thei tho a. Amaherawhchu, House-ah meuh sawichhuaha pass tluk chu a awm lo a ni. Chuvangin, vawiina private resolution putluh hi a lawmawm em em a, hei hian rah thatak a chhuah ngei pawh ka ring a ni.

Kan hriat theuh angin Mizoram chuan kum 1966 khan zalenna sualin kan rammu a nih kha. Kan ram chu rambuayah puan a lo ni ta a, he kan buaina avangin Mizoram-ah mi tam tak ram hran hranah raltlanin, sahimna zawngin kan chhuak a ni. Chungah chuan, Myanmar ramah te pawh sahimna zawngin kan lut chho a. Khatih hunlai khan Myanmar ram chu sipai sorkar a ni a, an khirh em em mai a, kan raltlan te pawh duh angin Myanmar lam unaute khan an ngaihsak thei lo zawk a. Amaherawhchu, hlau leh khur chung pawhin min lo tuam hlawm a, Mizoram atanga raltlan tam takte ei tur bakah silh leh fen te pawh min lo pe a ni. Chumai ni lovin, he zalenna suala kan ram leh hnam tana nunna chan pawh Myanmar ramah khian mi thahnem tak an awm a ni. Bangladesh ram pawh khu hnam sipai ten hmunpuiah zuk neiin, Bangladesh-a awm kan u leh naute khan kan hnam sipaite kha theih ang angin an lo tuamhlawm bawk a ni.

Tunah hian Myanmar leh Bangladesh rambuaina avangin kan unaute'n Mizoram an rawn bel ve ta thung a, Zoram mipui, NGO, sorkar leh Kohhran ten theih ang anga lo dawngsawngin kan tuamhlawm mek a ni. Tichuan, central sorkar a tangin raltlante lo dawngsawng tura remtihna kan hmulo chung pawhin kan House Leader, Chief Minister zahawm tak ni bawk Pu Zoramthanga chuan kan unaute sahimna zawnga Mizoram lo lutte, theih ang anga kan tuamhlawm tur thu leh, thlamuang taka Mizoram-a awm tir a duhthu a sawi pawh kan hre cham chi a nih kha.

Tichuan, Mizoram sorkar chuan '*High Level Committee on Myanmar Refugees*' dinin, mumal zawka raltlante lo dawngsawng tura ruahmanna siamin hmalak chhoh mek zel a ni a. DC te kaihhruaina hnuayah District leh Village Level Committee on Myanmar Refugees te din chhoin, mumal taka raltlante chhinchhiaha lo enkawl annih theihnan ID te siam a ni a. Bangladesh atanga raltlante chungchangah pawh sorkarin a theih ang angin hma a la nghal a, Lawngtlai DC hova meeting te neiin, mumal taka lo dawn sawn dan turte an rel a ni tih kan hria. Pu Dy. Speaker, Mizoram sorkarin Myanmar raltlante chhawmdawl nan pawh hian ₹3,84,66, 000/- leh, Bangladesh raltlante chhawmdawl nan ₹30,00,000/- a lo pechhuak tawh bawk a ni. Mizoram sorkarin raltlante chhawmdawl na sum a pek tawh zawng zawng chu ₹414,66,000/- niin, buhfai pawh raltlante pualin quintal 950 zet a lo pechhuak tawh bawk a ni.

Kan hriat theuh angin, kan MP te pawhin India ram rorelna sang berah an auchhuahpui a, Minister te MLA rualte pawhin he House-ah ngei kan auchhuahpui bawk anih kha. AMC Councillor te, Autonomous District Council hotute, Development Council hotute thlengin, tumah a bo a bang awm lovin, thu khat vuanin kan tang ho a ni. Central YMA, sub-headquarter, YMA Group, YMA Branch hrang hrangte, Mara thalai pawl MTP te, Young Lai Association te a tir atanga sulsutute an ni a, theihtawp an chhuah a, a lawmawm em em a ni. Kohhran hrang hrang - MUP, MHIP, MZP, MSU leh pawl hrang hrang, an zavaiin kan lam seng lova; Mizoram-a political party hrang hrangte, mimal mi-inphalte leh tlawmngai tak tak ten Mizoram pawn lam atangin mimal leh pawl hrang hrangte kan thawh ho leh tanrualna hi a ropui tak zet zet a ni. Chutichuan,

zoram mipui, kohhran leh NGO hrang hrang, sorkar leh zohnahthlak ram pawn lama awmte thlengin kan theihna zawn zawnah theihtawp chhuahin kan lo tuamhlawm a, kan lo dawngsawng a. An mamawh tur nia kan hriat - thawmhnaw, mutmu, silpauline, ei leh in tur, sum leh pai thlengin kan neih ang angte ui hauh lovin .. (**Dy. Speaker:** I zo thei dawn tawh em?) kan thehchhuak a, duat takin kan lo enkawl mek a ni.

Hetianga kan unaute mahni in leh lo pawh luah lum thei lova, mangang taka chenna mumal pawh nei lova an awm mek lain, chenna tur leh an khawsakna turte lo ngaihtuah sakin kan lo tuam hlawm a; relief camp te sain khaw hrang hrangah *runthlak-hnatlang* te kova kan unaute tan kan han che suau suau mai te hi a ropui tak zet zet a ni.

Kan bial chhung bikah pawh raltlante chungchangah Tuipuiral Group YMA ten, mimal, pawl leh sorkar hnen atangin tanpuina awm thei ang angte an hnenah lut zelin, ei leh intur te, mutbu leh thawmhnaw te, silpauline thlengin pek khawm a ni a, an niin an lo buaipui a. Tichuan, MNF thalai headquarters te pawhin thawmhnaw leh mutbu thahnem tak, heng Tuipuiral Group YMA te kutah an han pe nghe nghe a ni. Chu mai nilovin, kan Minister zahawm tak Er. Rinawma ngei pawh hian thalai president anih lai khan, sum fai thahnem tak an han pe tawh nghe nghe a ni. Chutiang chuan bialtute pthenkhat, ramria bial nei - Pu Nguna te, Pu Rokhaw te leh midang dangte pawh hian kan bial chhunga rawn lutte chu kan lo tuamhlawm a, kan fund atang tein kan theih ang angin kan lo tuam hlawm ve a. Hemi chungchangah hian kan hnam inpumkhatna leh inlungualna, hei hian a siam nasa hle a. Pu Dy. Speaker, relief camp te pawh kan bial hmun 4 laiah kan siam nghe nghe a ni.

Chuvang chuan, he thil pawimawh tak, kan u leh naute thlavang hauhna leh thlamuang taka an awm theihna tura resolution pawimawh tak hi, pass ngei turin kei pawhin ka rawn support a ni e. Ka lawm e.

DEPUTY SPEAKER : Member zahawm tak kha, a bial lamah raltlan an luh hnem em avangin leh a buaipuitu tak te zinga mi a ni a; hun kha midangin in hmang tlem si a, ka han pek belh deuh hlek a nih kha.

Awle, kan Minister zahawm tak Pu Lalchhandama Ralte ka sawm e.

PU LALCHHANDAMA RALTE, MINISTER: Pu Deputy Speaker, ka lawm e.

Member zahawm tak Pu Lalrindika Ralte ina “*Kan ram thenawmte atanga sahimna zawnga rawn raltlante hi kan sawrkar hian an awmna tur hmun bik siamsak rawh se*” tih resolution thehluhna chang a rawn hria hi lawmawm ka ti khawp mai a. Vawiin chawhma lamah khan kan ram tana pawimawh tak mai, Pu Lalchhuanthanga resolution pawh lungual takin kan passed tawh a. Ka rilrua ka lo lawm em em chu – “Resolution No. 2 hi he ram rorelna sangah hian lut ngei se la, kan unaute harsatnate hi

resolution-ah lungruah taka han pass a, khawvel hriatah kan inunauna te puang chhuak ila” tih hi a ni a; chumi hunah chuan sawi ve ngei pawh tumin kei pawhin rilru ka lo insiam a ni.

Kan hriat angin, tun dinhmunah hian Myanmar lam atanga kan unau raltlan mek te hi official lam ten record an neih hnunung berah hian mi 31,129 an ni a, camp hmun hrang hrang 160 velah an awm darh a ni. Bangladesh atanga lo kal kan unaute hi mi 646 an ni a, anni hi hmun 3-4 velah dah anni a. Bangladesh Atanga lo lute camp awmna tak hi kei ka va la thleng phei lova; hemi kan unaute chhawmdawlina lamah hian. Chutiang chuan kan unauten an inpui-ah, an sa himna zawngin an lo haw a, inpua awm mek ten lungruah taka sorkar, kohhran, NGO zawng zawngte party thinlung, hnam bil thinlung, kohhran bil thinlung dah thaa, kan unaute kan lo tuamhlawm hi a mawi a ni. A bik takin MNF te chuan zohnahthlak zawng zawngte rorelna pakhatat engtik niah emaw chuan kan awm kan beisei a, kan buaipui thin a, chumi avang chuan kan ute, kan nu leh pate pawh an lo rammu a. Amaherawhchu, vawiinah, tun dinhmunah hetiang hi kan ni; beiseinain ‘engtik niah emaw chuan’ tiin chu chu kan la thlir a, chutiang tur chuan beiseina kan nei a. Amaherawhchu kan unau ram danga awmte an inpui laka rilru na hian an lo awm tawh thin a. Vawiinah unau hmel pawh kan inhai tawh lain; a leh lam zawng tak chuan he harsatna hi a runthlak a, a pawh em em lain, ‘malsawmna’ hi a ni ve tlat a ni. He harsatna hi ‘malsawmna’ a ni ve tlat. ‘Eng vang maw?’ kan tih chuan, unau inhmangaih tharna, unau intuamhlawmna tur atana theih ang tawka kan luan zana a nih avangin; Pathian hian thil engkim a chhe ber hi min pe lo; “a phenah a malsawmna kan chhar thiam chuan, min dah sak a ni” tih hi ka hmuh avangin lawmawm ka ti tak zet zet a ni.

Tin, tuna mi kan unaute harsatna chungchang hi zoram chhung piah lam, khawvel hmun hrang hranga zohnahthlak awmte pawh hian vawiina kan hmalakna kal mek hi, sorkar leh khawtlang kan hmalakna kal mek hi min lo thlir reng a, he “Mizoram sorkar, Mizoram mipuite lakah hian beiseina sang tak an nei a, an lawm hle a ni” tih hi a takin ka hmu a ni.

Nikum September thla khan kan Chief Minister hi Chin Community of USA (kan Chin unau America rama awmte) Khawmpui neiin kan pu, (kan Chief Minister) hi *Khuallian* atan an sawm a ni. An sawmna chhan pawh kan sorkarin nu leh pa chan changa kan unaute kan chhawmdawlinaah an lawm a, kan pu chawimawi an duh a ni. Ani a remchan loh avangin, ‘nang zuk kal ta che,’ min ti a; ka beisei ai daihin an lawm zia a takin ka zuk hmu a ni. America-ah kan Chin unauten min lo dawngsawng tha em em a, programme hrang hrang kan neihnaah Mizoram mipuite chungah lawmthu an sawi mawlh mawlh a ni. America-ah pawh Mizo hnanthlak unau tamtak awmte kha, zep nak a awm lo, India ram atanga kal te, Myanmar atang kalte pawh kha, unau hmel pawh an lo inhai tan tawn a ni. Mahse, Myanmar unaute harsatna avang hian an vaiin pumkhatin an lo awm a; an zaithiam rual ten concert an lo siam a; sum an thawh khawm

a, mihausa awm, mi hrang hrang ten; chumi hmang chuan tanpuina tur an lakhawm a, in-unauna boruak tha a siam a ni tih a takin ka zuk hmu a ni. An tangrual em em a, hmuntin kalna apiangah Mizoram ai awha kal ka nih avangin, lawmthu hliir an sawi a.

Chumi piah lamah chuan, remchang kan la a, khulaia awm Chin Community of USA te nen, kan kal tak rau rauah chuan ‘America sorkar-laipui, a remchan danin dawr tum tawp teh ang’ kan ti a, Indian Embassy phalna pawh la lovin. America sorkar Washington DC-ah, an State Department (Foreign Ministry) ah an MP te kalatlangin appointment kan dil a, min lo pe ve mai a. “Mizoram Minister India ram atangin a lo kal a, Myanmar harsatna avanga lo kal kan unaute chungchangah kan hmu duh a ni” tih kan zuk sawi a, America sorkar aiawh ten min lo dawngsawng tha em em mai a, kan indawr a. Chuta kan sawitam em em chu, kan unaute a bik taka kan dawnawm dan a ni a. School Education Minister ka nih avangin, kan department atanga kan hma lakna te an lo hre em em a. Naupang 6,000 chuang zirlai kan zirtir a, midday meal kan pe a, lehkhabu leh uniform kan pek te America sorkar chuan an lo hre vek mai a ni. Kha kha ‘engatinge?’ kan tih chuan, anni chu an inzarpharh tha tih kan hria a ni.

Kan zu kal a, officer panga vel an ni a, a lo kal te kha; an Director - East Asia incharge te, Myanmar sorkara an palaite an lo tel a ni. Chungho nen chuan kan sawikhawm a, an mutan ber chu – “engatinge India hian refugee-ah a pawm theih lo?” tih hi a ni a. Chu chu keimahni ngei pawhin “America sorkar-a *Democracy-inpui* hian India sorkar hi, kan unaute refugee-a pawm turin in nawr tur a ni; in ti tur a ni” kan ti a. Anni chu khawvela refugee hrang hrangte tanpui thintu an nih avangin, “dollar maktaduai tel Myanmar refugee te tan hian kan pe thei reng; mahse, tunge dawng ang?” an ti a ni. India sorkar kaltlanga refugee tanpuina chu pek a ngai si a, Mizoram sorkar minrawn pe ngawt thei si lova.

Chutiang chuan indawrna tam tak kan nei a, “kawng dangin tih dan i zawng ang hmiang” kan ti a. Kar leh lawkah pawh hian America-a awm kan unau aiawhte pawh an lo chho leh dawn a ni. Chutianga indawrna pawh thui tak kal lai anih avangin, a hnu lawkah kan central YMA te, CYLA hruaitute an kal a, nasa em emin an lo chawimawi a; kan in-unauna piahah an duh chu - kan unaute harsatna heti taka a hnam anga kan lungrualna leh inpui chan kan chang hi an lawm a, ‘Mizo mipuite chungah lawmthu an sawi mawlh mawlh a ni’ tih ka sawi nawn duh a ni.

A dawt leha ka sawi duh chu, kan sorkarin theih tawka kan lo chhawmdawlina hi sorkar anga kan tih pawh a ni bik lo; mipute kan zavaia kan tanrualna a ni a, sorkarin a hming that kan la a ni mai. Sum leh pai tam tak kan thawh piah lamah hian chhungtin atangin kan che a ni. ‘Eng chen nge kan tih la ngai dawn’ tih hi kan ngaihtuah tel a tulin ka hria a.

Kan sawi tak ang khan, Bangladesh atangin kan unaute mi 646 an lo chho ve leh ta bawk a. Anni pawh hi nimin lawka House-a ka sawi ang khan, kan department atanga tanpuina awm thei tur ang, naupang zirna pawh hi April thla session tan hunah zirna kan pe ang a, Mizo naupang ten an dawn ang chiah dawn tir kan tum a ni. ‘Zo-hnanthlak Inpui nih hi kan tum’ tih hi ka sawi duh a ni.

Kan thnlung tina em em tu, kan unau raltlanten India ramah sa-himna an rawn zawng a, Manipur-ah te, Mizoram-ah te an remchan dan angin an rawn tlan a. Manipur sorkar chuan India thu awihin, ‘dan lova ramri cross’ an ti a, an man a; kan unaute jail-ah an khung hi a va na em! Mizoram sorkar pawh hi nasa takin an rawn nawr ve tho; mahse kan Chief Minister, hnam tana ding tlat, pa-nih tling hian, ‘kan ti dawn lo’ a ti a ni. India sorkarin eng ang pawhin nawrlui mahse, “kan unaute chhan tur chuan a tawp thlengin kan tang ang, kan ei chhung chuan an ei ve ang” tih hi kan pu thusawi a ni. Chumi avang chuan, a thlamuan thlak a, India hian min nawr lui lovang tih ka ring a ni. ‘Kan unaute tan hian kan ding tlat tur a ni’ tih hi ka sawi nawn duh a ni. Myanmar emaw, Bangladesh emaw atanga lo kal an nih pawhin, ‘India sorkar hian min nawr nat poh leh kan thnlunga inunauna leh inpumkhatna hi a thar dawn’ tih hi an hmuin ka ring a. Vawiinnia he House-in lungrua taka he resolution kan pass hian India sorkar-laipui hi thleng rawh se. Mizoram sorkar hian kan unaute hi ‘refugee status pek kan phut a ni’ tih hi hria se. chumi anih chuan khawvel ramdang atang te, India sorkar atanga tanpuina mumal zawk an neih a tul a ni.

Ramri hrulah kal ila, kan unau, chhungkaw pangngai tak takte kaihkul hnuaiyah an nupui fanaute nen an awm a. Eng pawh tha tawk lo, temporary-in society-in kan lo buatsaih a. Kan rin aiin a rei tawh si; an khawngaih thlak a ni. Aizawl khaw chhungah pawh an MP te, an chief minister hluite an lo kal a, mi-pawimawh, an VIP thinte kha; an va khawngaih thlak em! Ram leh hnam politics avangin an lo tlan thla a, khawngaih thlak takin an awm a, an nupui fanaute pawh hmu hlei thei lovin an awm a ni. Kan MP thenkhat phe chu, unau kan awmna a lo tlang hrang tawh a, kan tawng hman ‘Mizo tawng’ kan tih te pawh thiam mang lo te an awm avangin, Mizo tawng zirtirtu turte pawh kan department hian kan dah a ni. Chuvang chuan, tawng hi kan unaute zirtir kan duh a, kan theih ang angin kan inunauna atan kan thawk a ni. He harsatna hi kan duh vanga thleng ni lo mahse, Mizo mipuite hian ‘Inpui’ kan nihna hi tilang ila, India sorkar a ni emaw, khawvel hriatah emaw pawh, he hnam, zo-hnanthlak tan hian kan ding a ni; kan lungrua a ni. Political ideology-ah chuan danglam awm thin mahse, hnam thil, ram thilah chuan, ‘we are one’ kan tih hi lang se. Zohnanthlak hmun hrang hranga mite tan pawh, an ‘inpui’ kan nihna hi an hmuh chhunzawm zel theihna turin, hawh u, I tangrua ang u.

Vawiin niah kan resolution bik tak hi, a thu erawh hi chu resolution neitu hian ‘tlem tihdanglam hi a phal em aw’ ka ti a; a phal a nih chuan, a wording pawh hi tha zawkin heti hian a siam danglam theih ang em? -

‘Kan ram thenawmte atanga sahimna zawnga rawn raltlante Zoram mipuiten tha taka kan lo dawngsawng hi a lawmawm hle a, a tul ang zela lo mikhual chhonzawmin, an awmna tur ngaihtuah zel nise kan ti’ tih tein emaw. Chu ai mah chuan ka rilrua awm chu, ‘kan ram thenawm atanga lo kal’ tih pawh hi, ‘kan ram thenawmte atanga kan unau sahimna zawnga rawn raltlante’ tih deuh kher hi ka duh a ni. ‘Kan unau’ tih tel hian thinlung a fan dawnin ka hria. Tute emaw, hnam dang pawh an lo tlan ang tih ka hlau a. Chuvangin ‘kan unau’ tih hi la telh ila, lung a la kuai deuh zawkin ka hria. ‘Zoram mipuite’n tha taka kan lo dawngsawng hi lawmawm kan ti e’ tiin House hian sawi tel ila, ‘A tul ang zela an awmna tur ngaihtuah zel ni se kan ti’ tih hian resolve thei ila, lungrual thei ila a va tha awm em, Pu Dy. Speaker. Tichuan, a wording pawh tlema tidanglam turin rawtna ka han siam a ni e. Ka lawm e.

DEPUTY SPEAKER : Member zahawm tak Pu C. Lalsawivunga ka sawm e.

PU C. LALSAWIVUNGA: Pu Dy. Speaker, ka lawm e. Member zahawm tak Pu Lalrindika Ralte Resolution - ‘*Kan ram thenawmte atanga sahimna zawng a rawn raltlante hi kan sawrkar hian an awmna tur siamsakin, duat takin enkawl se; awmkhawmna tur hmun bik ngaihtuah sak rawh se*’ tih hi a tha ka ti em em a, ‘ka support tak zet a ni’ tih kha ka sawi hmasa duh a.

Nichinah khan Aizawl South-II bialtu, MLA zahawm tak Pu Lalchhuanthanga Resolution kha lungrual takin kan zavaiin kan pass zo chiah a, lawmthu ka sawi a. Tunah hian resolution tha tak mai kan han sawiho a, lungrual taka kan han pass leh thei tur hi (ti tawh mai ila) kan inlungrualin ka hria a, a lawmawm hle a ni.

Tichuan, Zofate hi indopui II-na thleng khan British awpna hnuaiiah, British rorelna hnuaiiah kan awm a. Amaherawhchu indopui II-na a lo thleng a, a lo tawp leh tak hnuah khan India, Bangladesh, Pakistan leh Burma-te kha ‘independent countries’ an lo ni a. India pawh ‘sovereign country’ a lo ni chho ta a, ‘Independent State’ niin mahniin ro kan inrel a. British awpna hnuaiia kan awm lai kha chuan sawrkar pakhat enkawl na leh awpna hnuaiiah kan awm a. Amaherawhchu India, Burma leh Pakistan te independent an lo nih tak hnuah khan, Zofate hi kan duh vang reng pawh ni lovin, sawrkar hrang hrang, ram hrang hrang awpna hnuaiiah thendarhin kan lo awm ta a; a then Burma ramah, Burma sawrkar awpna hnuaiiah kan awm a, a then India ramah, India sawrkar awpna hnuaiiah kan awm a, a then Pakistan (tuna Bangladesh ni ta) sawrkar awpna hnuaiiah kan awm bawk a. Hei hi kan duh vang a ni lova, kan duh thlanna pawh a ni lova; ni. chuti chung chung chuan thendarhin kan awm a, ram hrangah, rorelna hrang hnuaiiah kan awm a lo ngai ta a ni. Amaherawhchu, heti pawh hi nimahse, Zofate hi Burma a awm kan ni emaw, India ram chhunga awm kan ni emaw, Bangladesh ram chhunga awm kan ni emaw kan thinlung chhungah unau kan nihna hi a bo lo a, a awm reng a; vawiin ni thleng hian a nung reng a ni. Unau kan nihna hi, khawvel sawrkar

dang dangah ram hmasawna avangin awm mah ila, lakhran theih a ni lova. Tunah phei chuan sawrkar hrang hrang hnuaiyah kan lo awm chho ta a, hmasawnnain a ken tel pawh a ni ang. Chuvang chuan, Mizo kan nihna hi, khawi ramah pawh awm mah ila, khawi sawrkar awpna hnuaiyah pawh awm mah ila, 'kan thinlungah hian a reh tawh lo ang' tih hi ka ring a.

Vawiin niah hian he kan resolution atang ringawt pawh hian kan inpumkhatna leh kan in-unauna hi a hma lam zawng ai hian tihngheh leh suihngheha a awm hi ka beisei em em a, keima mimalah pawh hian chu thinlung chu nasa takin a lo awm thar a ni. Chutiang taka kan unau, kan thisen zawmpui, nupui pasalaw pawh innei tawn, engkim titlang, tiho, khawsaho vek, mahse sawrkar inawpna thalo Burma leh Bangladesh-ah kan unaute an awm a. Chu mite chuan harsatna nasa tak an tawk a, tihduhdah leh nghaisakin an awm a ni. Kan rilru a na a, kan lainat a, kan khawngaih a. Tichuan, nichina kan ngaihtlak tak ang khan, Zofa, Mizo kan nih anga kan ram neih chhun Mizoram chhungah, an inpuiah an lo hawng a, lawm takin vawiinah hian kan lo dawngsawng a ni. Chuvangin, kan theih ang angin an tan thlamuantu, tanpuitu kan nih pawh hi he inpuia awm Zofate hian kan mawhphurhna leh kan tihtur pawimawh tak a niin a lang a ni.

Chuvang chuan, Pu Dy. Speaker, vawiinah hian he resolution hi lungrual taka kan pass-a, Zoram chhung mai nilo, Burma sawrkar te, Bangladesh sawrkar te, India sawrkar leh khawvel ramdang sawrkarte kan auh-eihna, kan koh-eihna hmanrua atan he resolution hi lo awm se tih hi ka duh em em a ni. Chuvang chuan, kan zavaiin inlungrual taka, kan ram leh hnam tan, Zofate tan he resolution hi pass ka rawn ngen a, ka support thu ka rawn sawi ve a ni. Ka lawm e.

DEPUTY SPEAKER : Member zahawm tak Pu Zodintluanga Ralte ka sawm e.

PU ZODINTLUANGA RALTE: Pu Dy. Speaker, ka lawm e.

Hei Pathian leh mipui zarah he House-ah hian kum 20 ka awmna kum a lo ni ve der mai a. Tin, vawiin hi ka tan chuan thil chhinchhiahtlak tak a niin ka hria a. Opposition MLA-te resolution pahnih he House-ah ngaihtuah a han ni hi thil dangdai tak a ni a. Pu Lalchhuanthanga resolution chawhma lamah kan ngaithla a. Ruling lam pawh vawiinah hian an chungah lawmthu ka sawi a. Opposition a nih avanga kan han paih ringawt thin kha kan han paih ta hi a lawmawm ka ti a. Pu Lalchhuanthanga resolution he House-a member zawng zawng ina lungrual taka kan pass hi a lawmawm ka ti a.

Tunah pawh Pu Lalrindika resolution - "*Kan ram thenawmte atanga sahimna zawng a rawn ralhlante hi kan sawrkar hian an awmna tur siamsakin, duat takin enkawl*

se; awmkhawmna tur hmun bik ngaihtuah sak rawh se” tih hi ruling lam, treasury bench atanga an sawiah pawh khan an rawn support a. Hetiang ang hi he House ka awm chhunga thil thleng zen zen lo, ka hriat vawikhatna, opposition MLA-te resolution pahnih nikhata kan pass thei tur hi lawmthu ka rawn sawi lawk a ni.

‘Engatinge hetiang resolution hi rawn putluh a ngaih tak ni?’ tih hi ka ngaihtuah a. Politics hi a lo pawimawh khawp mai a. Pu Dy. Speaker, keini helai House chhunga member-te pawh hi kan pawimawh lehzuai a ni. Politics hi a kal suai chuan, a tuartute chu nunau, naupang leh pawisawilo te an ni. ‘Democracy ramah kan awm’ tiin ngaihtha takin awm mah ila, democracy ramchhungah pawh rorelna a thatloh chuan, kan ram a ralmuang lova, kan ramah ngei pawh thinthiin kan mu ngam lo thin a ni. Kan thenawm state-te pawh kan hria a, helpawlte an awm a, hartsatna hrang hrang rorelna thatloh vangin an tawka a ni.

Vawiinah pawh hian kan fimkhur a ngai khawp mai. A bik takin vawiina roreltute leh helai House-a awmte pawh hian kan ram kan enkawlnaah te, ro kan relna te lai sela, mipui huapzo sela, mipuite hi him sela, mipuite rilru hi dam sela tih hi ka duhdan a ni a. Vawiina kan resolution putluh a ngaihna chhan pawh hi, rorelna diklo leh lalna leh thuneihna duh luat avanga hetiang harsatna hi tawka kan ni. Kan hria a, kan thenawm State-ah chuan democracy palzut a ni a; a tuartu dik takte chu mirethei te te an ni; an khawngaihthlak khawp mai. Politics hi a kal suai chuan, politics ngaihven ngai reng reng lo - sawrkar hnathawkte, zirtirtute, sumdawngte, kohhran hruaitute pawh ami nghawng dan a inang vek mai a ni. Vawiinah chuan politics kalsuai avangin resolution a rawn luh a ngai ta a.

Keimah ngeiin, ka mithmuh ngeiin Mara ramah ka va kal ve a, an khawngaihthlak em em a ni. An neih zawng zawng an rawn tlanhhiat san a, mi ramah awmhmun pawh khuar lovin mi thlamah an awm a, ei leh in tur an nei lo a ni. Mahse chutih lai chuan Mizoram-a kan sawrkarin a theih ang tawkin a lo support a, NGO zawng zawng, kohhran zawng zawngin kan lo support thei te hi a lawmawm ka ti.

Nitin news kan ngaithla a; politics kalsualna Europe-a Ukraine ram nawm zia te chu, Youtube lamah an in advertise-naah pawh tourist hmun ropui tak, ram nuam tak a ni. Mahse an khawpui hmun nuam tak chu vawiinah chuan building pawh awm tawh lohna khawpa bomb chhiat, chhut chhiat; mitthi ruang, ‘a dotu ruang nge tam zawk, tu ruang nge’ tia, uih vut vut khua deuh vek a ni tawh a ni. Hetiang hi kan ramah pawh la thleng ve thei reng a nih avangin, keini helai a hminga ram rorelnaa awmte hi kan fimkhura, kan mi leh kan sa, kan ram rorelnaah hian tluang taka mipuite ngaihtuaha ro kan rel hi a pawimawh ka ti tak zet a ni.

Vawiinnia an harsatna avanga kan rama raltlan rawn lutte hi kan duat an ngai khawp mai. An dinhmun han ngaihtuah chiang ila, an rilru tur te han ngaihtuah hian an

khawngaihthlak a ni. Chutiang anih avang chuan, vawiinniah hmun hrang hrangah an awm darh a, sorkar tan pawh enkawl a harsa em em mai a ni. Chutianga anmahniin a an lo thatpui theih zawkna atan Pu Dy. Speaker, an awmkhawmna tur bik, hmun hrang hrangah darh taka awm lova, sorkar tan pawha enkawl awlsamna zawk tur leh, anmahni tan pawha an inbenbelna tur, an nun te a lo nawmsakna tur atan hian an awmkhawm theihna tur hi kan ngaihtuah sak a ngaiin ka hria a. Chuvang chuan, Pu Lalrindika Ralte resolution “*Kan ram thenawmte atanga sahimna zawng a rawn ralhlante hi kan sorkar hian an awmna tur siam sakin, duat takin enkawl se; awmkhawmna tur hmun bik ngaihtuah sak rawh se*” tih hi ka rawn support ve a ni e. Ka lawm e.

DEPUTY SPEAKER : Member zahawm tak Dr. Vanlalhlana ka sawm e.

DR. VANLALTHLANA : Pu Dy. Speaker, ka lawm e.

Pu Lalrindika Ralte, MLA zahawm tak resolution “*Kan ram thenawmte atanga sahimna zawng a rawn ralhlante hi kan sorkar hian an awmna tur siamsak in duat takin enkawl se, awmkhawmna tur hmun bik ngaihtuah sak rawh se*” tih hi tha ka ti hle mai a. He thilah hian kan sorkar hi a fakawm ka ti a. Kan sorkar hmalaknain camp te an lo buatsaih sak a. Tin, *Ni-100 inhlawhna* tein, tikhan an lo kep ve a. Tin, school-ah te zirna an lo buapui sak a, mid-day meal leh uniform te nena kan lo pe thei hi a ropui ka ti a. Nikum budget session-ah pawh khan nuai 380 vel kha hman a nih tawh thu te kan han hria a, tunah phei chuan tam tak sen belh te pawh a ni tawhin ka ring. Hman lai kan pi leh pute atanga kan in-unau tawhna te, thlahtu in ang kan nihna tunah hian a rawn langchhuak a. Hemi chungchangah he hmun ngeia thusawi ve theia ka awm hian min tilawm lehzual a. Ram danga kan unaute nen hian engtikah emaw chuan kan la luangho ngei turah ka ngai bawka a ni.

Hei, kan in-unauna lama min khaikhawmtu ZORO – ‘Zomi Reunification Organization’ kan tih mai hi an che tha thin khawp mai a. Website - *Zogam.org*. an nei a, hei hi thalaite pawh hian kan hriat tam te pawh a ngai hle in ka hria a, remchang te pawh ka han la duh a. *Zogam.org* ah hian kan hun hmasa, hmanlai atanga Calcutta Convention neih atang te, August Ni 14, 1947-ah te khatianga Mizoram luh leh loh tur ngaihtuah dan document hrang hrang tangkai tak tak hmuh tur a awm a. Hei hi thalaite hian kan ngaihven pawh a ngaiin ka hria a. Chu chu hun remchangah ka han sawi tel ve zawk duh a ni.

Veng khata awmkhawm thin te hi Kohhran a lo dang a, NGO lam - YMA, YLA tih te emaw, VC te emaw a lo dan tawh chuan kan han in-mihran deuh nghal ringawt zel a. Amaherawhchu, harsatna a han awm a, kan tangho leh thap thin thung a ni. Veng hrang ni mai lo, ram hranah kan han awm a, kan kal dan, kan ngaihtuah dan, thil eng emaw te chu a lo danglam ve ngei ang; amaherawhchu, chuti chung pawhin tunah hian, hei kan sorkar te, NGO te, Kohhran te, political party te leh pawl hrang hrang mai leh

mimal te .. (Pu Zothanthluanga, Chariman in Chair a la a..) kan tan hona, kan luan hona hi a ropui ka ti hle a. Hetah hian kan Chief Minister zahawm tak leh kan Home Minister zahawm tak te hi a hrana tarlan te pawh tha in ka hria a. ‘Mizoram hi kan unaute tlan luhna tlak a ni’ tih tar chhuak a, an lo lantir a, kan lo kuangkuaah thei hi a lawmawm ka ti a. Silh leh fen tur nei lo, mahni fate ngei han tuamhlawmna tur neilo te, mahni nu leh pate hrehawm tuar pawh tanpui hlei thei lova an awm laia kein ina theihtawp kan lo chhuah hi a ropui ka ti a, Zoram mipuite hi kan tuiral hlawm niin ka hria a ni.

He resolution in an awmna tur bik siam a rawn rawt hi a tha ka ti a. Tanpuina a khawma a kal theih nan te, medical check-up te, school te pawh awmze nei zawka a kalpui theih nan te, khatiang khan ruahmanna hrang hrang felfai zawka a kal theih nan he resolution hi a tangkai ka ti a. Chuvangin, he resolution hi ka support a, pass ngei pawh tha ka ti e. Ka lawm e.

CHAIRMAN : Awle, Dr. Vanlaltanpuia, Member zahawm tak ilo sawm ang.

DR. VANLALTANPUIA : Pu Chairman, kha thutna seat kha i inhme hle mai ka ti.

Vawiinah hian Hachhek bialtu, MLA zahawm tak Pu Lalrindika Ralte in resolution a rawn put luh hi han thlawp ve ka duh a. Tin, vawiin hi ni chhinchhiah tlak tak a ni a, Pu Chairman. Treasury Bench te leh Opposition te lungrual taka ro kan rel ni a ni a. Hnam issue kan rel ho avangin a nuam hlein ka hria a, hemi ni a han din ve pawh hi a thain ka hria a ni.

Kan hriat angin kan thenawm ramah hian politics-a buaina namen lo an tawk a, Myanmar leh Bangladesh-ten. Bangladesh hi ethnic group -hnam chi hrang hrangte helna avangin sorkarin a thenfaina hna a thawh avangin Mizoram-ah te an rawn tlan chhia a, tunah hian mi 510 vel lai an rawn tlan lut a. Chutiangin Myanmar atangin sorkar record-ah chuan mi 31050 a ni a, hemi hnu hian eng emaw zat chu am awm leh tawh mai thei bawk a; heng lo tuamhlawm hna kan han thawk ve te hi a ropui hle a.

Mi tam takin an sawi thin angin, ‘kan hnamin ramri a nei lo’ tih a ni a. India leh Bangladesh partition/then hran a nih laiin khung Sylhet Valley vela chengte chuan hrehawm an ti thei em em a. Luiral lehlamah an u leh naute an awm a, lehlamah an awm bawk a. An hla phuah hrang hrangah te pawh hian, khung Bengali poetry-ah te kluan an lunglen zia hi an ziak nasa em em thin a. Keini pawh chutiang tho chu kan ni. Thlahtu hmun khat kan ni a. Mizote hi khawchhak lam atanga rawn tlathla kan ni a, kan pi leh pute awmna hmun a ni a, kan lunglenna hmun leh mumang ramah te pawh kan la hmuh tam tak kan neihna hmun a ni. Tin, kan ziarang a inang vek a, kan ei leh in, tui kan tih zawng te a inang vek a, pi leh pu kan intawm a, silh leh fen inang kan feng a, sakhaw

hmun khat kan bia a, chutiang zelin in-unauna thuk tak keimahniah a awm a ni. Chuvang chuan, tun anga hun khirh an tawh laia lo tuamhlawmtu kan ni hi a ropui hlein ka hria.

Kan Chief Minister zahawm tak pawhin wawi tam tak a sawi thin a, kan unaute hrehawm tawrhna kan tawrhpuia zia thute a sawi thin a. Tin, tanpuina state sorkar-in kan phak tawka kan pek ve te hi a hlu hlein ka hria a ni. He House zahawm takah hian kan Home Minister zahawm tak khan vaibelchhe 3.8 vel bawr hi Myanmar unaute tan kan sen tawh thu report a pe tawh a; Bangladesh unaute tan nuaih 30 emaw lai kan seng tawh a ni tih a awm bawk a, hengte hi a chhinchhiah tlak hlein ka hria.

Myanmar bik hi han en ila, independent ram an nihna hi, British empire atangin 1948-ah an nei a. A maherawchu rei a nih hmain 1958-ah khan General Ne Win khan wawi leh khatah sorkarna a la rup mai a, sipai sorkar an siam ta a, *one-party rules* an lo ni ta a, chu chu nghet takin 1962 atangin 2011 thleng a kal a. Chumi hnu chuan mipui rorelna (nominal administrative system) an han tungding a, mahse 2021 atang khan sipai sorkarna kha a lo ni leh ta a. He an sipai rules hi ka han enchiang a, kum 50 chuang a lo ni daih tawh a, an khawngaihthlak em em a ni.

Chu political hun khirh karah chuan Chin lama kan unaute an rawn tlanche ta a, Mizoram-ah shelter zawngin an lo kal a. Kan bialah hian tunah hian Zotuitlang, Mualthum North, Haulawng leh Pangzawl-ah te hian chungkaw thanhnem tak kan lo dawng ve a. Chungte chu kohhranten an hall-te leh an hmunte lo hawh tirin buk an lo sak sak a, a lawmawm ka ti em em a. Kei pawh bialtu ka nihna angin, an ei leh in tur, buhfai leh chawhmehte kengin ka va kan kual ve tawh a, ka rilru a tina em em a ni. Ka tlawh tum phei kha chu krismas dawn a ni a, khua a vawt em em a, silpauline zar hnuaiah khaw vawt tak leh thli na tak hnuaiah an awm a, ka rilruin ka hre vang vang thin a ni. Krismas lai vel te khan ka ngaihtuah thin a, ‘a va vawt dawn ve aw’ ka ti thin a, naupang leh nausente nen an awm a ni a, a hrehawm hle a ni.

(Hon. Dy. Speaker in Chair a la a):

DEPUTY SPEAKER : Awle, sawi chhunzawm rawh le.

DR. VANLALTANPUIA : Kan unaute tawrhnaa kan ramin kan lo buaipui thei hi thil lawmawm tak leh chhinchhiah tlak tak a niin ka hria.

May Ni 10, 2022 khan ka office-ah Pi Lalrinmuani, Chin Affairs Minister leh Pi R. Khawtinsiami, an MP te an lo kal a, education chungchang sorkar sawipui turin thu an rawn thlen ve a. Higher & Technical Deptt. puitu ka nihna angin kan Minister te pawh ka hrilh a. Chutiangin Education Minister, Pu Lalchhandama Ralte ka titipui bawk a. An u leh naute ho education chhunzawmna tur an rawn buaipui a ni a, an sorkar hruaitute pawh an fakawm hlein ka hria. Pi Lalrinmuani leh Pi Khawtinsiami te ram buai karah pawh, mi ramah an u leh naute an ngaihsak hlein ka hria a, an fakawm ka ti.

Chutiang chuan kan theih ang tawkin kan intuamhlawm tawn a ni a, ‘engtia rei nge an la awm dawn’ tih a hriat loh a, theih ang zela tangho turin ka han inchah duh a ni. Vawiinah hian lungruat takin treasury bench te leh opposition te kan han sawi khawm thei hi lawmawm ka ti em em bawk a ni.

Pu Dy. Speaker, kan resolution rawn puluttu ina a rawn putlulh dan erawh hi chu, a forwarding hi tlema thlak ngaiin ka hria a. A rawn putlulh danah hian, ‘*Kan ram thenawmte atanga sahimna zawng a rawn ralhlante hi kan sorkar hian an awmna tur siam sakin, duat takin enkawl se; awmkhawmna tur hmun bik ngaihtuah sak rawh se*’ tih hi, heti hian thlak ka duh a –

“*Kan ram thenawmte atanga sahimna zawng a rawn ralhlante Mizoram mipuiten tha taka kan lo dawng sawng hi a lawmawm hle a; a tul ang zela lo mikhual chhonzawmin, an awmna tur ngaihtuah zel ni se kan ti*” tiin. A chhan chu ‘awmkhawmna’ han tih hian, awmkhawmna bika hi a buaithlak deuh ka rin avangin leh, an rawn tlak thlakna hmun te, an belhna hmun te kha hmun hnan hnan a nih hlawm avangin, ‘*an awmna tur ngaihtuah zel ni se kan ti*’ tia thlak hi a tha ka ti a. Chutianga kan pass theih chuan a lawmawm hlein ka ring. Pu Deputy Speaker, ka lawm e.

DEPUTY SPEAKER : Prof. F. Lalnunmawia, Member zahawm tak ka sawm e.

DR. F. LALNUNMAWIA : Pu Dy. Speaker, vawiinah private resolution kan member zahawm tak Pu Lalrindika Ralte in a rawn putlulh, pawimawh em em mai kan sawiho theih avang hian a lawmawm hlein ka hria a ni.

A resolution kan hmuh ang hian, ‘*Kan ram thenawmte atanga sahimna zawng a rawn ralhlante hi kan sorkar hian an awmna tur siam sakin, duat takin enkawl se; awmkhawmna tur hmun bik ngaihtuah sak rawh se*’ tih hi, a rawn puluttu ngaihtuahna kha ka va tawmpuiin ka hria a, ka rilru chuan. Resolution tha leh pawimawh tak mai a ni a, a bik takin hetiang a rawn pulut hi kan thlawp tlangin ka hria a, ralhlant kan unau te tan pawh a thlamuan thlak hlein ka hria a ni.

Myanmar leh Bangladesh atanga ralhlant kan sorkarin a chhinchhiah danin mi 3,01,508 nia tarlan a ni a. Tun session-a Member zahawm tak Pu Vanlalhlana zawhna, kan Home Minister zahawm takin a chhannaah khan, an vaiin mi 3,01,508 an ni a, Myanmar atanga rawn tlan te hi mi 3,01,050 niin, Bangladesh atanga lo kal te hi mi 458 chhinchhiah an ni a. An thahnem viau mai a, an tan pawh a manganthlak hle ang tih ka ring a ni. A bik takin Myanmar atanga rawn tlan te, an lo tlan tirh lam pheih kha chuan Covid-19 hri len vanglai te kha a ni a, an lainatawm hle mai a. Kei pawh Serchhip-ah han kalin, ka han hmu a. Bungbawr nunau nen chhangehhe takin an rawn tlan thla a, an kalna kawngah an naute ke te kha an titilak leh nghal a, mangang takin school ruakah

an rawn dah ngawt mai a; chungte chu kan ha tlawh ve a, an lainatawm tak zet a ni. Chutiang chuan kan raltlanhote dinhmun harsa takah an ding a ni.

Pu Speaker, a bik takin Myanmar khi ka han tlawh ve tawh a, kar khat chamin ka han kal ve a. Tahan phai te, Kawlpui te leh Miawhlah ah te kan kal ve a; mi an thain, Mizote leh Zo-hnahthlakte an felin, kan chungah an tha em em a, mizo nun leh tlawngaihna pawh an la vawng tha em em a, an ngainatawm hle a; hlim takin hun te kan han hmang ve a. Chutiang hun tha zawk leh beiseina nena hmalam hun an thlir lain, an sorkar, an ram a lo buai a, tualchhung induna te lo chhuakin, lo theih lohin an tlan a lo ngai ta a. Ka han zin ve tuma kan chaw eina ngei te pawh kha an lo tlan thla ve a ni, Mizoram-ah hian. An lainatawm khawpin ka hria a, an in leh lo tlansanin, an eizawna laklawh tak mai te kha tlansan a ngai ta si a, an dinhmun hi an lainatawm em em a ni.

Chutih mek laiin Bangladesh, Chittagong Hill Tracts-a zohnahthlak unauten harsatna namenlo tawkin, mi eng emaw zat an rawn lut bawk a. Pu Speaker, kan hriat angin, January Ni 4, 2023 khan chung zingah chuan Pastor Chhawnkhupa kha a boral a nih kha. Mizoram mipuiten kan lainatin, khangte avang khan zohnahthlakte thlavang hauha te pawh Central YMA kaihhruainain kan nei nghe nghe a nih kha. Heng kan unau te hi sorkarin theihtawpin chhawmdawl hna a thawk a, sorkar mai bakah NGO te, kohhran te leh mimal ang pawhin theih ang angin chhawmdawl an ni.

Chutih rual chuan, a resolution-ah hian duat taka enkawl kha a rawn rawt a, theih ang tawk chu sorkar chuan an chhuahin ka hria a. Kan CM, House Leader te ngei pawhin theihtawp chhuahin, central sorkarah te pawh an thlavang te pawh a hausak ve a ni tih kha kan hriat kha. Sorkar hian theihtawpin a enkawl a, a resolution-ah hian, ‘*an awmna tur a bika ngaihtuah sak rawh se*’ tih kha a ni a, mi 30,000 chuang an ni a. A bika hmun khata dah emaw han tih bik kha chu a har ang a, ‘a buaithlak awm mang e aw’ ka ti a. Chuvang chuan, a remchan dan ang anga dah an nih loh kha chuan, ‘khawi hmun bikah nge kan dah ang, heng ral tlan te hi’ tih kha ngaihtuahnaah a lo awm a ni. Chuvang chuan, hei hi khatiang chiah lo deuh pawh khan a resolution neitu khan, ka hmaa mite rawt ang kha a rem tih chuan tlem han siksawia, han tihdanglam deuh hlek kha thain ka hria a.

Tin, nichina kan memberte leh kan Minister zahawm tak Pu Lalchhandama Ralte khan, ‘*kan unau*’ tih belh kha kei pawhin ka thlawp a. “*Kan ram thenawmte atanga kan unau*”, tih han belh kha a thain ka hre ve a ni.

Chutiang chuan, sa-himna zawnga rawn tlan te Zoram mipui te’n tha taka kan lo dawngsawng hi a lawmawm hle a. ‘*A tul ang zela lo mikhual chhunzawmin, an awmna tur ngaihtuah zel ni se kan ti*’ tia thlak kha ka rawn rawt ve a ni. A resolution neituin a rem tih chuan, ka rawn thlawp ve a ni e. Ka lawm e.

SPEAKER : Ngawi rawh u. Phar in la awm nual a, hunin a daih tawh lova; Dar 4 hi pelh a ni ngai lo a ni. Chuvangin, Pu Duha, i sawi dawn em? Awle, Pu Duha'n a sawi ang a. Tin, Home Minister-in a wind-up dawn, 'wind up' ti mai i la, a tih a ngai bawk si a, House Leader in a sawi a ngai dawn bawk si a; tin, Pu Rinsanga Ralte a phar bawk a. Midang kha chu insum theihna nei mai rawh u. Pu Ngunlianchunga kha saw lam bialtu a nih avangin tawi te a sawi theih ka ring a.

Aw le, Member zahawm tak Pu Lalrinsanga Ralte ka sawm e.

PU LALRINSANGA RALTE: Pu Speaker, ka lawm e. Hei, hun a tlem a, tawi te a sawi ka duh a. Tun Resolution hi a ropui ka ti a. Han sawi ve loh tawp hi dikin ka hre lo va. Chuvang chuan han din ka'n duh hram a ni.

Pu Speaker, Pathianin Mizote hnamah min siam a. Chu hnam chu kan ral mai lohna tur leh, kan awmkhawmna tur ram min siamsak a; *Mizoram* kan nei a ni. Chutah chuan Mizo hnahthlakte hi hmun hrang hrangah awmkhawmin, kan awm darh nasa ta hle mai a. Chung zingah chuan tun hunah hian Bangladesh leh Myanmar-a awm zo-hnahthlak unau te'n harsatna an tawh a. He harsatna, kan zo hnahthlak unau te'n an tawh takah hian an inpui, an *Jerusalem* - Mizoram-ah hian an rawn tlan lut ta a ni. Ramin ri a nei a, hnamin ri a nei lova. Chuvangin, Pu Speaker, heng ral tlan, kan unau rawn lutte hi duat taka kan lo enkawl chhonzawm zel hi a tul hlein ka hria a. Tin, a bik takin Lawngtlai District te, Mamit District te, Siaha te, Champhai District tea a bialtu MLA te in fakawmin ka hria a. Heng kan raltlan unaute duat taka, an harsatna theih ang anga in lo buaipui hian Mizo hnam kan nihna ropuizia hi a tilang chhuakin ka hria a. He House zahawm takah hian ka member-pui, heng district-a kan MLA te lakah pawh hian lawmthu ka sawi duh a ni. Tin, kan NGO hrang hrangte, kohhran hrang hrangte hmalakna leh tanpuina an pekte hi a lawmawmin, ropui ka ti tak zet a ni.

Chutichuan, Pu Speaker, sorkar pawhin hma nasa taka lak sakin, Myanmar rama kan unau raltlante tan nuai 300 chuang lai mai sen an ni te; tin, an zirna chungchangah te sorkarin tha takin enkawl na a pek te hi ropui ka ti a. Chutiangin, Bangladesh lama kan unaute raltlan lo lutte pawh harsatna chi hrang hrang an nei a sorkarin a theih ang angin pawisa pawh eng emaw zah, nuai 30 chuang daih mai, kan han sen sak te hi ropui ka ti tak zet a ni. Wawiinah hei hi a la beitham hlein ka ring a, harsatna namenlo tawkin hmun tinah hian an la awm a ni a. Heng te hi nasa lehzuala kan sorkar pawhin kan en zuia, an mamawh leh an harsatnaah te pawh kan puiah zel thain ka hria a. Hei hi 'kan Mizo hnam ropuina lanna niin ka hria' tih kha ka han sawi ve duh a ni e.

Pu Speaker, he Resolution hi tha ka ti a, ka rawn thlawp e.

SPEAKER : Awle, Member zahawm tak Pu C. Ngunlianchunga ka sawm e.

PU C. NGUNLIANCHUNGA: Pu Speaker, ka lawm e. Resolution kha chu ka chhiarchhuak tawh lo mai ang a. Helaia rawtna te te an siam pawh kha tha ka ti a, ‘kan unaute’ tih han belh ngei pawh kha a duhthusamawm mang e ka ti a ni.

Tichuan, Pu Speaker, vawiinah hian vawiina kan Mizoram sorkara kan hotupa ber, kan Chief Minister leh a thawhpui Mizoram sorkar chungah lawmthu sawi tur a tam hlein ka hria a. Tin, chu mai chu ni lovin, LADC (Lai Autonomous District Council) sorkar te, MADC (Mara Autonomous District Council) te, MADC (Chakma Autonomous District Council) sorkar te ang pawhin, he kan unaute sahimna zawnga an rawn tlannaah hian theih ang tawpin an lo buaipui a, a lawmawm ka ti a.

Pu Speaker, chu mai chu ni lovin, Mizoram-ah NGO hrang hrang, pawl hrang hrang te’n, ‘unaute’ tiin tha takin an lo dawngsawng a. Chu mai chu ni lovin, kohhran hrang hrangte, eng kohhran pawhin, ‘kan kohhran a ni lo ve’ ti lam reng reng awm lovin, an lo dawngsawng tha em em mai a. Tin, hei, Aizawl khawpui chungah AMC te pawhin an area theuhah an lo dawngsawng nasa a. Tin, political party ang pawhin, tu party mah awl bik pawh awm lovin he kan unaute, a bik takin, Myanmar rama kan unaute, an rama lalna leh thuneihna duh avanga mipuite’n an tuarnaah sa-himna, za-himna zawnga lo tlante, Bangladesh atanga lo raltlan te, helaia kan hotute’n an lo sawi thin ‘Zofate tan he Zoram hi ‘kan Jerusalem a ni’ an tih, an rawn pannaah hian, Pu Speaker, Laifa ka nihna angin vawiinah hian he House zahawm takah hian kan unaute lo buaipuitute, lo hmangaihute zawng zawng chungah thinlung takin lawmthu ka sawi a ni.

Tichuan, Pu Speaker, vawiinah hetiang resolution kan han pawtchhuak nawlh mai te hi, ‘Pathian remruat a va ni em’ ka ti a. Helaiah hian sorkar angin theihtawpin hmalak a ni a. Tin, chutiang chuan MLA te leh hmun hrang hranga mite, a tute mahin thlahthlam lovin hma kan la a ni. Vawiinah Mizoram rorelna khawl sang bera he resolution sawiho a niha, lungrual taka kan han sawiho thei mai te hi, ‘a va han ropui em’ ka ti a ni. He hun min siamsaktu hi kan Pathian a ni; Pathian chungah pawh lawmthu ka sawi tak zet a ni.

Kan unaute dinhmun hi sawi dawn i la, sawi tur tam tak a awm; an khawngaihthlak em em a ni. A bik takin Myanmar-a kan unaute, Thantlang khua phei chu a ram deuh thak a ni. In leh lo tha tak tak, anmahni phak ang tawk tawka an sak ve te, an in leh lo that tak te chhuahsanin min khaw daiah, khaw femah, silpaulin hnuaiyah an nupui fanau te nen an awm a, an lainatawm em em a ni.

Pu Speaker, vawiinah hian kan unaute dinhmun ngaihtuah hian, lung pawh a chhia a ni. Amaherawhchu, Pathianin kan chungah a rorelna a ni miao si a. Chutih mek laia helaia Zoram mipui ten tumah enhranna nei reng reng lova, a te ber atanga a lian ber thleng, ‘kan unaute an ni e’ tia kan lo dawng sawng hi a ropui ka ti tak zet a a ni, Pu Speaker.

Chutih rual chuan, he kan unaute harsatna an tawhnaah mimal ang te, sorkar ang te, kohhran ang te, khawtlang ang te, khawtlangah pawh Village council hrang hranga an luhna apiangah, “E, kan unaute an lo kal e” tiin an lo dawngsawng a, ei tur an lo pe a, sin tur an lo pe a, chutiang chuan an lo buaipui a ni. Vawiinah hian kan unau raltlan te sahimna zawnga lo kal te avanga insengso, sum leh pai, tha leh zam lo seng zawng zawngte pawh ‘Pathianin a let tam takin rul se’, tih hi kan tawngtaina a ni.

Tichuan, wawiina resolution kan han ngaihtuah hi Pu Speaker, kan ngaihtlak tak ang khan, hmun khata awmkhawm vek ngaihna a awm lova. Amaherawhchu, wawiinniah hian kan unauten an chan tawk chu Bible-ah pawh kan hmu a, Mizo thawnthuah pawh kan hmu a. Pharte hian khawchhung an chang ve ngai lo; daipawnah an awm thin. Vawiinniah kan unau raltlante a tam zawk hian daipawnah hmun an luah a ni. An khawngaihtlak em em. Thenkhat chu dinhmun inang lo em em, helai Aizawl tlangah pawh singhnih-singthum man in luaha fate lo chawm te pawh an ni a, thenkhat erawh chu mei eng en tak zet an ni, Pu Speaker.

Chutih lai chuan, kan sorkar hian wawiina kan resolution ang hian an awmna tur te, hmun khata dahkhawm vek te phei chu a rem hauh lo ang a, community hrang hrangte an lo ni hlawm a, tin, khaw hrang hrangte an ni. Amaherawhchu, sorkar ang leh anmahni tan pawha an zirna turah te, ei leh in zawna turah te, khawsak khawmna tur hmun siam sak nise. Chutah chuan, *entirnan*: Khawthar ang te pawh han siamsak ta ila, chutah chuan veng hrang hrang ang te pawhin awm ve ta se, sorkarin tui in tur pe se, mei eng pe se, School in te pe se, chutiang chuan ruahman sak thei ila chuan, an nun pawh a lo zangkhai deuh ang a, an nun pawh lo zalen deuh ang a. Tun hunah chuan daipawnah, ka sawi tak ang khan an awm a, a chung rangva tur takngial pawh an nei lo a ni. Silpaulin hnuaiah an awm a. Sorkar hian a lo hmangaih a, hei, kan Chief Minister zahawm tak, he thilah hi chuan a office-a ka len tum pawhin ka fak a ni; lawmthu ka sawi a ni. Vawiinah pawh hian he House kaltlang pawh hian kan unau raltlante a lo dawnsawna leh, a lo enkiawlnaah hian lawmawm ka ti a.

Hei ram pawn atangin kan unau ten Pu Speaker, nangmah ngei pawh zoom meeting-a lawmthu lo sawi an duh te, kan Home Minsiter te, kan Chief Minister te ‘appointment min lo dil sak the, nangin’ an ti a, appointment te kan han dil sak ve a. Kan Chief Minister te, kan Home Minister te, kan Speaker zahawmtak te, buai tehlul nen hun thawl tha tak pea, an duhzawng in hnena an sawi theihna hun in lo pe te kha a ropui ka ti a. Chuvang chuan, wawiinah hian Pu Speaker, he resolution hi kan unaute enkawl that an nih vea, anmahnia zalen deuha he Zoram-ah hian an lo nun khaw chhoh theihna tur atan sorkar anga mawhphurhna kan lak a, sorkar anga kan lo enkawl hi, wawiina kan resolution-ah hian ‘sorkar hian a ngaihsak lo e’ tihna lam a ni lova; ‘sorkar hian a ngaihsak lova, a bikin enkawl rawh se’ tih lam a ni reng reng lova. A enkawl tawhnaah kan lawm, mahse, wawiinniah he House, Zoram rorelna sang ber ina lungrual taka hetiang a kan ti a nih chuan, sorkar tan pawh hmalak a nuam chho in ka ring a. Tin,

central sorkarah pawh, kan Education Minister-in a sawi ang khan *refugee status* te pawh hi an hmuh ve theih nan vawiin niah he House-a kan sawi tel te pawh hi a tha em? A that ka ring a, kan unaute an khawngaihthlak a. Pu Speaker, sawi tur a tam, mahse dar 4 ah tawp tur a ni si a, he resolution-a kan lungrual te pawh hi a lawmawm ka ti. He resolution hian Zofate inpumkhatna nasa takin min siamsak a ni.

Pu Speaker, kum 2013 ah khan US ah CEM ka nih lain khuallian turin min sawm a, keini chu 'Lai' kan ni a, Lai tawngin kan inbe thei mai a; Mizo tawng hrelo an tam lutuk; Direct-a USA lut anni. Vawiinah chuan kan Education Minister ten theih tawpin hma an la a, Zohnahthlakte tawngah chuan kan in-communicate thei tawh ang; kan inpawh thei tawh ang. Lunglei an bomb tuma Thingsai khuaa lo raltlante kha tawng leh sak an ngai a ni. Mahse, tunah erawh chuan, hman zan lawka *Chin National Day*, kan Chief Minister zahawm tak Khualliannaah kei pawh ka va tel ve a, khati hun lai, sorkar an neih laia Chin Hills Chief Minister Pu Lianluaia, minister kan nih lai khan Saisihchhuah leihlawn dawhna tur kha kan en dun a. Chulai chuan Mizo tawng a thiam vak lova, tunah chuan Mizo tawngin thu te a lo sawi thei tawh a. He hnam kan inpumkhatna atan, leh lamah chuan, '*Keini'n vanduinana kan ruat, a hmangaihna lan tirtu*' tih lam hawi zawng pawhin a kalna chin, Zofate inpumkhatnaah hian tamtak a awm a ni.

Chutih rualin, helaia Inpui nghak ten hmangaih takin leh duhsak takin, 'kan unaute an ni' tia, enhranna tel miah lova an lo dawngsawng thei hi lawmthu ka sawi a, he Resolution hi Pu Speaker, 'ka support a ni' tih ka rawn sawi e. Ka lawm e.

SPEAKER : Member zahawm tak Pu Lalduhoma ka sawm e.

PU LALDUHOMA : Pu Speaker, hun lo kal zel turah kan hnam hian eng engte nge kan la tawh dawn kan hre lova. Tichuan, politics te pawh tun aia nasaa kan ngaihven a la ngai zel dawnin ka hria a. Vawiina kan Resolution hi kan thlawp tlang vek turah ka ngai a, hnam thil a ni a. Amaherawhchu, member thenkhat ten an han sawi ang khan kei pawhin her rem kha tha zawk turah ka ngai a. 'Dahkhawm' han tih te pawh hi nakin zelah a that zawk lohna lai te pawh a awm ve thei a; her rem rawtna pahnih lo kal kha tha ka ti ve ve a. Khati zawnga kan resolution neituin a remtih theih chuan, tha zawk turah ka ngai a ni.

Tin, kan sorkar chungah, a bikin kan House Leader leh kan Home Minister chungah lawmthu ka sawi duh a. An theih tawkin an ti niin kan hria. Theih nise, hei aia thaa lo dawn sawn an duh ve tho ang. Amaherawhchu, kan ram sorkar sum dinhmun te kan hria a, theitawp tak tak an chhuah niin kan hria a; kan theih ang angin kan sorkar pawh kan thlawp zel dawn a ni tih ka sawi duh a.

Tin, kan Central YMA te pawh khan nuai 55 lai kha an han pein ka hria a. Tin, party hrang hrangte, kohhran te, keini party te pawhin kan theihna tlem hle mahse kan han thawh khawm a, kan han pe ve a. Tichuan, kan zavai maiin, mimalte pawhin buhfaite, sum leh pai leh damdawi te, mutbu te thlengin kan Mara leh Lai unau leh kan thalai rualte thlengin an fakawm vekin ka hria a.

Tin, central sorkar pawh hian fund te pawh min pe ve tih kha kan hria a, ‘engzat nge min pek tawh’ tih kha a inzawh chi loh maithei a. Amaherawhchu, a ruk tak chuan an ni pawh an ngawi thei bik lo tih chu a hriat a. Amaherawhchu le, *refugee status* min pe thei lo erawh hi chu kan duh thu a sam lova, kan la nawr zui tlang zel turah ngai ta ila. Hei, India sawrkar hi Security Council Member nih a tum mek lai a ni a, chutih laia a ram chhunga refugee lo kal te, refugee status tak ngial pawh min pek theih loh chuan, security council member ni tlakah khawvel hian India hi a ngai thei bik dawn em maw ni le, tih thleng hian ka rilru a kal a ni.

Tin, kan Chin unaute pawh an lawm a, hman deuh lawk khan appreciation dinner an rawn buatsaih a, chutah chuan min rawn sawm ve nghe nghe a. He laia a kan sorkar leh mipuite’n kan lo dawnaw dan zawng zawngah khan lawmthu an sawi a, dinner a hranpain, a pualin an siam a ni.

Pu Speaker, kan hnam chungchang hi a hmasa bera ngaihtuah a nih tum kha Chin Lushai Conference, Fort William, Calcutta ah khan a ni a, kum 131 lai a lo liam ta a, kum 1892 ah khan a ni. Khatah khan vaiho zinga awm chi ah min ngai lova, kawl ho zinga awm chi ah min ngai lova, ‘Zo-hnahtlak’ kan tih zawng zawng hi rorelna pakhata dah tura thu tlukna kha siam a ni a, kha kha lo kal tlang selang tha mai tur hi a ni a. Amaherawhchu, kha kha implement a nih tak loh avangin sokar pathumah tunah chuan thendarhin kan awm a, a pawl ta em em a. *Unau hmel hai* te pawh alo thleng a, kan unaute ngei pawh ‘foreigner’ tiin tum hnih ngawt hnawhchhuah te a thleng a nih kha. Amaherawhchu, heng buaina leh vanduaina lo thleng hi kan tan malsawmna inthup a lo ni a. 1966 ram buaiah kan unaute belin Burma lamah kan chho a, min lo mikhual a. Tin, 2015-ah khan Burma-ah tuilian nasa takin an tuar a, kan theih ang tawkin kan han pui ve leh a. Zophai ramri ah kan han intibuai a, (2018 em ni ta kha) tah chuan Zohnahtlak zawng zawng khawvel pumpuia awm hi an nghing a ni. Theihtawpin an che a, kan in lungualna thlentu alo ni zel. Tun thil pawh hi kan hnam kal zelah a tuartu atan, hrehawm hle mahse, ‘hnam inpumkhatna min petu, malsawmna thlentu ah chang se’ tih hi kei ka duh dan a ni a. Tin, anmahni pawh hian mikhual rilru pu lo se, an awmna a piangah - kohhran ah, NGO ah, chhianthi thatni ah, tualchhung mi, khua leh tui dik tak angin awm thei se ka duh a. Kei ka duh dan phei chuan ration card-ah te hian thun ve nghal zung zung ila. Tin, chu mai a nilo, Hailakandi vela foreigners 98% vel khu dan loa lo lut an ni; vote an pe zel; voting right an pe teuh tawh. Tunah khuan MLA te pawh an ni tawh. India ramah a ruka rawn lut vote nei an tam lutuk tawh. Chuvang chuan, kei chuan voting right an neih loh chhung chu mikhual rilru an put ka ring tlat. Hei hi an

ram a ni ve a, nei ve mai rawh se. Tualchhungah kan lo ti ve ang a, tunge hria ang? Chuvang chuan, khatiang khan khua leh tui chanvo zawng zawng hi dawng ve sela, an awm hlen duh leh awm hlen sela; chutiang a kan tih chu a tha ka ti a.

Tin, special development scheme hi ruahhman sak tha ka ti a, khawimaw laiah development programme hmangin an awmna hmun tur kan lo siam khan, refugee hmingin nilo sela; khami hmunah khan tui, school engkim facility kha pe ila, eizawna bul tanna tur harsa lovin dah tai la. Amaherawhchu, khua leh tui kan pek duh dawn avang khan, refugee hming hi chuan engmah tih loh hi a fing zawk ang tih te ka ring a ni.

First World Zomi Convention kha kum 1988-ah Champhai-ah khan a awm a, in-unauna atana hmalakna hmasa a ni a. Tichuan, ZORO hi a lo piang a, tunah hian Brig. T. Sailo thinslungah a awm reng lo thei lo a ni. Tichuan, kan hnam hming, kan nomenclature hi Pu Speaker, pakhat mahin kan generic name a awm lo; *Lushai* min ti a, *Chin* min ti a, *Kuki* min ti a. Heng hi hnam dangin hming min phuahchawp sak, kan pianpui generic name ni lo vek a ni. Kan zavaia kan hming tur nomenclature hi a la piang ang tih ka ring a, common language impose tur niin ka hre lo a *own process* rawn la sela, a *natural cause* rawn la sela common language kan nei mai ang.

A tawp bera ka sawi duh chu – ‘*UN Declaration on the Right of Indigeneous People*’ kan tih 2007 kha khawvela keini ho ‘indigeneous’ an tih te, ‘tualto hnam’ an tih te, kan ram hlui, kan pi leh puten an lo luah ram lak let leh theihna thuthlung a ni. Pathian leh mipuite zarah sorkarna lo la ve ta ila, Prime Minister hi sawipui ka duh a ni; hetah hian India hi a signatory a ni. Mi ramah chuan committee an din a, a theih theih an implement tawh a, keini chuan hma kan la lo reng reng a. Hengte pawh hi kan hnam kal zel tura kan inpumkhatna leh rorelna pakhat hnuaia kan awm theihna tura UN in kawng min sah kuak sak a ni; kan ngai hlu ang a, hman tangkai pawh kan tum ang a, kan bawhzui tur niin ka hria a.

Tichuan, he resolution hian tuna kan harsatna sutkianna mai bakah, kan hnam kal zel tura inpumkhatna leh rorelna pakhat hnuaia kan awm theihna thlenga min hruaitu step pakhat lo ni nghal thei se ka duh a, ka support a ni. Ka lawm e.

SPEAKER : Tunah chuan Home Minister zahawm tak Pu Lalchamliana ka sawm e.

PU LALCHAMLIANA, MINISTER: Pu Speaker, ka lawm e. Vawinah Hachhek bialtu member zahawm tak Pu Lalrindika Ralte in private Member resolution pawimawh tak a rawn pulut hi a lawmawm hlein ka hria. A hrim hrimah, chhan eng pawh ni sela, mahni in leh lo tlansana ngai, hetiang miho hi ‘an khawngaih thlak em em a ni’ tih kan hre theuh a.

Refugee (raltlan) problem hi tunlai khawvelah, Europe-ah te pawh a la awm reng a. Tin, District Council hun lai (kan la te khawp mai), East Pakistan an ni laia Kaptai tuikhuahin a chim dawn avanga Chakma raltlan, Arunachal Pradesh-a an dah tak te pawh vawiinah hian ka rilruah a lo lang a. Vawiinni thleng hian Arunachal-ah sawn *second class citizen* anga treat an ni a, an khawngaih thlak hle. Tin, Burma sipai ten an tihduhdah avanga Burmese-Muslim ‘Rohingya’ an tih te, Bangladesh-a raltlan dinhmun te pawh khu a chhe em em a, *refugee* anga pawm an ni a. UN atanga tanpuina an dawng chung pawh khuan an dinhmun an khawngaih thlak hle a ni. Burma ram sipai sorkarna laklaih niin, a duhlotute nen an indo a, mipui eng emaw zat kan ramah raltlanin an lo kal a ni. He thu kan hriat tantirh atang hian kan sorkar, Pu Zoramthanga kaihruai chuan he House-ah ngei hian amah ngeiin a sawi a, “Kan unaute an ni a, theipatawp chhuahin kan lo enkawl ang”, tiin a lo welcome a, a lawmawm hle a ni.

Amaherawhchu, sorkarin tih theih a nei tam lo khawp a. Kan hriat angin, sorkar pachhia kan ni a, nasa taka India sorkara inngat kan ni. Chuvang chuan sorkar anga kan tih chhun hi chhuan tur a tam lo khawp a. Kan ngaihthlak tawh angin, Mizo mipui rilruah hna a thawk a, Kohhran te, NGO te, Zirlai Pawl te leh mi chi hrang hrangin tanpuina rilru an lo nei a, vawiinni thleng hian harsa tak chungin nuamsa lo tak chungin an la eiin an la in ve a. An chenna te pawh duhthusam ni lo mah sela, ruah a surin an in te a hula, zanah eng chhe te an lo neih theih hi a lawmawm hlein ka hria.

Kan Chief Minister thahnemngaihnhain State Level Committee a siam a, a hnuaiah chuan committee te zawk official hoin din a ni leh a, chumite hnuaiah chuan District Level te, Village Level Committee te kan unau raltlante buaipui tur hian hmalak a ni ta a. Tunah hian kan unau raltlante hi District 11-ah hian an awm kim vek a ni; a thenah an awm tam deuh a, a thenah an awm tlem deuh a. An vai hian, sorkar record dan chuan Bruma lam atanga lo lut hi mi 31,050 an ni a, Relief Camp 162 siam a ni. Amaherawhchu, relief camp-a awm ai hian relief camp loa awm hi an tam zawk a, in luaah te leh chhungte bel hi. Relief Camp-a awm te hi mi 13,540 an nih laiin Relief Camp-a awm lo te hi mi 17,508 an ni. Uluk takin, ‘engzat nge an nih’ tih leh, ‘tute nge an nih’ tih te hi hriat a tul avangin an zavai hian ‘Identity Card siam sak ila’ tiin sorkarin a rel a. Tunah hian mi sawmhnih-khat tih lo hi chu Identity Card pek vek tawh an ni.

Tin, Relief camp-ah te hian a theih chin chinah solar lighting te, tui dahkhawlina te, ek in (a khur laih chi) te, tin roof tlem a zawng leh silpouline te, mutbu te, thosilen te pek an ni a. Tin, kan ngaihthlak tawh angin, ‘naupangte zirna nei ve sela, school ah kal se’ tiin....(**Speaker:** Kan hun pangngai hi a tawp ta a, kan zo lawk dawn em? Awle, chhunzawm rawh le) kan ngaihthlak tawh angin school an kalna turte, an zir tur zirlaibu thlengin ngaihtuah sak an ni a. Chutiang chuan sorkar hian hma a la a. Amaherawhchu, ka sawi tawh ang khan kan duhthusam a ni lova, a bei tham em em a ni. Myanmar lam unau Mizoram lo lutte hi, kan member thenkhat ten an sawi tawh ang khan cheng nuai 384 velin kan tanpui ve tawh a. Tin, Bangladesh atangin tun hnuaiah lolut an awm a,

krismas bawr leh a hnu deuh hleka figure lak kha a inang thei lova; kan sorkar figure chu 458 a ni a. Burma ram atanga rawn raltlante hi hmana he House-a Pu Rualchhina, Forest Minister anih laia ‘Ngengpui Sanctuary-ah Sava engzatnge awm?’ tih an zawhna ang deuh kha a ni a, Pu Rualchhina chhanna kha ka la hre reng a, “A chiah chiah hriat a har khawp mai; a then an thlawk lut a, a then an thlawk chhuak a,” a ti a. Chutiang deuh chuan khaw chhaklamah khi chuan buh te sengin an han haw lawk a, khatieng kha a ni a. A figure chiah chiah hi chu 31,000 bawr velah dah ta ila a thain ka ring a ni.

Ka lawmna pakhat chu - thu an awih viau mai, kan raltlan unaute hi. Sorkarin an awmdan turah ‘nangmahni duh thuin hmun dangah zin chhuak suh u, hmun dangah insawn ngawt suh u’ an tih te pawh an zawm tha viauin ka hria. Tin, kan hriat theuh angin Mizoram hi drugs tawlhna kalkawng a ni a, Excise leh Police force bakah khawtlang ten an man reng a. Nimin lawkah te pawh an man thawm te pawh kan hria a ni. Kan police hotute hnenah, “heng refugee kan tihte hi hetiang thilah hian an inhnawmah em, a bik takin lo chik teh u” tite pawhin advise ka pe a, mahse tun thleng hian “raltlanhote zinga mi anni” tia man fak pakhatmah kan la nei lova, hei pawh hi a lawmawm ka ti. Chuvang chuan, anni ho pawh hian khawtlang tana thil thalo tihna lakah hian sorkarin kaihhraina a siam te zawm tha se la, thil sual ti lo turin insum thei se tih hi ka duhdan a ni.

Tin, tlang beng atanga kan hriat danin, USA te, New Zealand te, Australia lam te atang pawhin kan unauten an theih chin chinah an tanpui thin a ni tihte pawh kan hria a, a lawmawm hle a ni. Tichuan, nuam lo takin, mi ang pawh phak lovin, amah Pu Nguna’n mittui tla lek leka a sawi ang deuh khan khawngaih thlak tak tak dinhmunah hian an ding a, hemi atan hian mizo mipuite hi kan tanrual a ngai a. Kan ngaihtlak angin, Mizoram sorkar hi sorkar pachhe tak anih avangin, duh angin thil a ti thei lova. Ka ngaihtuahnaah phei chuan MLA te pawh hi han tang leh hret ila, nuai 10 theuh emaw te kan fund atang hian han sik chhuak ila, crore 4 chu a ni mai dawn a tih tein ka ngaihtuahnaah chuan a awm rum rum a. Amaherawhchu hei hi chu kan zavaia kan ngaihtuah tlan tur a niin ka hria.

Nichina figure ka sawi ang khan, tam tak hi chu relief camp-ah an awm duh lova, chhungte bel an ni a, chhungte an belh khan emaw, in an luah hran emaw khan khawilaiah emaw inhlawhna remchang te a lo awm ve a; dawrte siam erawh chu sorkar leh khawtlang, an awmna ten rem an ti thin lova, a remchang lova, manual work engah emaw te hian an inhlawh ve a. Khatieng khan mi khawngaihna ringawta innghat lova an awm theihna turte pawh hi a awm ni awm tak a ni.

Chungho chungchangah Member zahawm takin resolution a rawn siam kha tha ka ti a. Mahse, member thenkhatten an sawi ang khan, *tin loh nghawngkawlin inbah tir* te pawh hi a awm thei a. Chuvang chuan, “*Kan ram thenawmte atanga sahimna zawnga rawn raltlante hi kan sawrkar hian an awmna tur siamsakin duat takin enkawl se;*

awmkhawmna tur hmun bik ngaihtuah sak rawh se” han tih chiah hi chu sorkar kha mawhphurhna kan pe lian lutuk a, zawh loh nghawngkawl kan bah tir a hlauhawm a. “Khatieng khan kan pass si a, engahnge sorkar hian a tih leh loh,” tih hun te pawh kha thleng ve thei tho a ni. Chuvang chuan, ZPM group leader sawi ang deuh khan, tlema han tihdanglam deuh kha a tha lawm ni ka ti a, chu chu sorkar tan pawh pawm a nuamin ka ring a, a tum tak tidanglam lutuk si lovin. Member zahawm tak takten an rawt ang deuh khan “*Kan ram thenawm Myanmar leh Bangladesh atanga sahimna zawnga kan unau raltnan lokalte, Mizoram sorkar leh mizo mipuiten tha taka kan lo dawngsawng hi a lawmawm kan ti a, a tul ang zela lo tuamhlawm chhonzawmin, an awmna tur leh an mamawhte ngaihtuah zel nise kan ti*” tih hi a him tawk viau lawm ni tiin ka ngaihtuahnaah a awm a, hetiang hian rawtna ka rawn thlawp anih chu, Pu Speaker. Ka lawm e.

SPEAKER : Awle, kan House Leader, kan Chief Minister zahawm takin sawi duhte a neih chuan sawm ila.

PU ZORAMTHANGA, CHIEF MINISTER: Pu Speaker, ka lawm e. Vawiina kan resolution hi a lawmawmna chu nidanga kan tih zen zen lohin vawikhatah, ni khatah private member resolution pahnih tha takin kan tlangpui a, lungruual takin kan pass ve ve dawn niin a lang a. Tichuan, chawhma lama mi pawh awlsam taka kan pass khan, tuna chawhnu lama kan unaute tana resolution pawimawh deuh tur tan hmun a rawn hawng a, chumi a tan hei hi kan han pass pah theih dawn niin a lang a. Kan unau Bangladesh leh Myanmar atanga lo kal te pawhin news-a puan a nih hunah, ‘hei, zanina an rorel’ tiin, hetiang kan pass tlan theih phei chuan a lawmin, kan tih ngailoh zinga mi, kan tihfuh tak turah a tang dawn a, a lawmawm tak tak a.

Chuvangin, kan Home Minister leh member dangten an rawt ang khan, tlema han siamrem deuha ngaihthlak hahtam deuh zawk tura a kal theih phei chuan, a resolution puluttu-in a remtih phei chuan, kha kha a tha lehzual turah pawh kan ngai bawk a ni.

Kan hriat theuh angin, keini ho hi lehlamah chuan tlawmngai tak, mi tana thahnemngai taka titu kan ni a, tunah pawh hian tumah kan intur lui lova, sorkar political party zawng zawng, NGO zawng zawng, kohhran zawng zawng, pawl zawng zawngin thahnemngai tak leh inlungruual takin kan han ti thap mai hi, entawntlak tak chu a ni a. Chuvangin, lawmawm ka ti a, lawmthu ka han sawi hmasa a ni.

Tin, a dawt lehah chuan, kan hriat sa mah nise han sawinawn ka duh chu, Bangladesh lam hi han sawi hmasa ila. Bangladesh ah chuan kan unau - Bawm te, Pang te, Khumi te, Khiang te leh a dang neuh neuh te pawh a awm a. Amaherawhchu, a pui ber chu tuna refugees lo kalah chuan Bawm unaute an ni a, Pang unaute pawh an tel tho a. Kan Bawm unaute hi, kan awm lai khan ‘singnih vel kan ni ang’ an ti thin a, mahse

tun hnua kan han zawh hian, ‘singnga kan ni tawh’ an ti a; ‘in lo va tam ta ve’ kan ti a, ‘E, kum 30 zet a kal tawh a lawm’ an ti a, a ni lah bawk tak a. Chuvangin khulamah khuan singnga chuang chu an awm ve a ni, kan unaute hi. Chu chu kan information a ni a.

Tin, kan hnamah pawh kan thuhmun tlang em em a, kei pawh ka nu hi Bawihlung a ni a, Bawm chuan ‘Bawihlung’ an ti lova, ‘B’ aiah khan ‘D’ an hmang a, ‘Dawihlung’ an ti a. Chuvang chuan, ‘kei hi Bawm-chanve ka ni’ ka ti thin a, an hnenah, anni pawh an lawm phian a. Bangladesh-a kan awm lai khan Bangladesh sorkar, Chittagong-a an Commander lian ber General Manzura nen khan vawi tam tak Ruma - an sipai hmunah kan inkawm thin a. Chutah chuan, ‘nang hi helai Hill Tracts ami *Bawm* te nen hian engnge in in-unauna’ tiin remchang takin min zawt a. ‘Ka pa hi chu Mizoram lama mi a ni a, ka nu hi a hnamah chuan *Bawm* a ni; half-Bawm ka ni e’ ka ti a, a nuhi a za angreng a; a dik ve tlat si a, a hnamah chuan. Khatiang khan, anni lam pawhin min pawm dana kha, khatia a hotupa ber pawh *Bawm-chanve* han nih kha chuan, min en dan kha a dang khawp mai a, relation pawh tha deuh maiin kan nei a. Amaherawhchu, vanduaithlak deuh maiin Chittagong Commander ber khan a pu, Zia Ur Rehmana a coup a, that ta si a, kan camp-a a lo tlan luh kan hlau khawp a, an rawn um dawn si a. Amaherawhchu, lehlamah a tlan a, lehlamah khan an va man a, an nangching ta zawk a; a pawh khawp mai a.

Tichuan, khulamah kan unaute kha, kan hriat angin kan inpumkhatna kha chu sawi vak pawh a ngai lova, hetia han sawi mai tur chuan Prime Minister hnena ka sawiah pawh, Bangladesh kan awm chhung khan mi 40 chuang zet kan nei a. Inremna kan neih khan ‘kan daughter-in-law, kan mo te 40 zet kan rawn hawn a nia’ ka ti a, Modi hnenah pawh ka sawi ngat a ni. Chuvangin, kan inpumkhat a. Kan naute thenkhat chuan silai dah kim lovin, ‘helamah kan puzawnte in lamah kan awm ang a, in mamawh hunah hman leh turin eng emaw zat hi chu kan awm nghal ang e’ an ti a, mahse kan awih lova, kan vaiin, kim takin kan lo hawng a nia. ‘An makpa te pawh kan ni hlawm a ni’ tih te ka sawi a, anni pawhin an hriat ngai reng reng loh a ni a, an lawm khawp mai a, tunthlengin.

Kan Bawm unaute chu keini ho hnenah an lo kal hi chuan, Mizotawng thiam pangngai ngat pawh hi Bawm tawngin an tilui ve tlat thin a, kan relation pawh a thatphah viau a ni.

Awle, khulamah chuan khatiang inpumkhat kha kan ni a. Kum 1968-69, East Pakistan a nih laia kan tlakthlak pawha, kan Bawm unaute, kan Pang unaute nen hmun khatah engkim harsatna in-share tlang kan ni a. Dhaka Falls pawha harsatna tinreng su tlang kha kan ni. Chuvangin, tunah pawh kan harsat laia min lo mikhualtu an ni a, an harsata mikhual kha kan bat ve tlat a ni. Chuvangin, Bible-a Pathian-in Israel fate hnenah ‘mikhualte chung a thatchhuah tur’ a tih rual khan, ‘nangni pawh mi ramah

mikhual in nih thin kha' a tih ang kha. A mikhual hmasa zawk zawk kha kan ni si a, khulam thlanglamah pawh, a chhaklamah pawh a ni tho a. Kum 1966 kan ram buaia khatia kan awm khan, tam tak hemi Burma ramri depa awm kha chu Burma sorkar khan min hrethiam a, Burma ah khan kan awm a, kan tawm tam em em a ni. Amaherawhchu, kan tisual palh a, tawngkam mawilo ni suh se; kan at kan so a leh; kan han kap leh ta rih a Burma kha. Heng kan Home Minister Pu Chama teho pawh, buai deuh mai khan an han che ta si a. Kha kha kan tihsual a ni a. Pu Denga thinrimin kan zuk chhuk thla kha, "engatinge a thenin lo kan vah laiin a mawng atangin in rawn hal" a ti a, khatiang deuh khan kan tisual ta a, kha kan kah thinrim kan tihsual kha, Pu Rualchhina te nen Bawm ram, Arakan-a kan awm khan theihtawpin tihdam tumin kan han bei ngial thin na a, kan tidam hlei thei lo a ni; a buaithlak khawp mai.

A enga pawh ni se, tikhan political thli chu kawng chi hrang hrangin a lo kal zel a. Tichuan, keini pawh Burma rama kan han mikhualna ramah leh min lo tanpui thinna ramah khan harsatna lo thlengin, ti hian an lo tlan thlak a tul ve leh ta a, keiniin kan lo mikhual ve leh a, kan inmikhual tawn zak zak a, a-chhak, a-thlengin. Chuvangin, theihtawpin kan lo welcome a ni a.

Nichina kan ngaihthlak ang khan, Union Home Ministry tih danah chuan, 'an ni hi India ramah rawn luh tir tur a ni lo e; lo nawr kir zel rawh u' tia order lehkha nen an rawn tih thlap kha a ni a. Manipur-ah chuan le, thu an lo awih bawk a, an lo phal lova, lo tan tir te pawh neiin harsatna tinreng an nei a. Amaherawhchu keini chuan kan hriat ve leh, a ruka thil sawi emaw, public meeting-a sawi naran emaw nilovin, hetah House-ah ngei 'kan unaute an ni a, kan nawr kir dawn lo; hetah hian kan lo welcome ang a, *humanitarian treatment* kan lo pek a ngai a ni' tih khan kan puang a, kha kha khawvelin a hre nghal a ni a.

Tichuan, Delhi ka zina Prime Minister hnenah pawh ka zu kal khan, Manipur lam hotute ang chu ni ve ila chuan, 'kan lo nawr kir ta lova, min hriatthiam kan ngai a ni' tia ngaihdam zuk dil kha tul awm tak pawh a ni a. Amaherawhchu ngaihdam dil a hnehin, an tanpuina tur pawisa lampang kha ka zuk dil thung a. 'Engnge Burma nen in inhnaihna' a ti a, a hnena ka sawi chu, 'ka nute unau hi 4 an ni a, hmeichhe 2 leh mipa 2, hmeichhe 2 - ka nu leh a nau chu India ramah an awm a, hetah hian an cheng a, an thi a, an fate pawh India ramah kan awm a; an nutate 2 erawh chu Burma ah an cheng a, an thi a an fate zawng zawng nen Burma ah an awm a; chuti vela inhna chu kan ni' ka ti a; 'a nih tak chu maw le' a ti a, a nui ve mai mai a. Kei chuan, 'tuna lo kal te hi chu Burma mi mai an nilo; ka uncle fate, ka cousin te an ni a, engtin nge kan lo nawr kir theih ang? Chuvangin min puhi a ngai a ni' ka ti a, pawisa kha ka zuk thing tlut tlut mai a, kawng chitin rengin. Chuvangin, hreh chung chung a eng emaw tia indirect tanpui theihna tur te pawh kha theihtawpin hma an la ve a ni. Amaherawhchu veng thawng ve ta reng reng hi an ni. Keimahnin kan beisei ang te phei chuan an tithei lova.

Engpawh nise la, tunah chuan kan zuk nawr nasat ber kha chu, tanpuina leh thildang chu thuhran ni sela, “Burma ram hetia a awm chuan kumkhua chuan India ram luhaina tur a ni a, Burma buaina a awm chuan, North East pumpui a buai a ni mai; Burma ralthuam a tam chuan, North East pumpuiah ralthuam a lo lut a ni mai; Burma insurgency a awm reng chuan, poppy an ching a, tichuan drug heroin leh thil dang a lo lut thla chur chur a ni. Chuvangin, Burma ah hian remna awm sela, north-east ah remna a awm a ni mai a. Chuvangin, India sorkar hian a hmaa hma in lak ang khan in lak leh a ngai a ni” ka ti a.

A hma khan Burma sorkarin India sorkar an rawn sawm a, remna siampui turin, tichuan National Security Adviser Pu Dovala nen kan pahnihin India sorkarin min tir a. Tichuan theihtawpin Naypyidaw ah te, Rangoon ah te, Bangkok ah te underground hruaitute nen inremna siam turin hma kan la a. Kan sawmna anga India ramah exposure nei tura a lo chhukna tur travel document vel kan buaipui lain an inthlang a, Aung San Su Kyi a tling ta a. Tichuan a buai ta vek a, a dawt leh kum nga chhung kha rem thu reng reng sawi awm lovin, Aung San Su Kyi sorkarah khan kum 5 a liam a, tun hi a thleng ta a. Tunah erawh chuan an vaiin Min Aung Hlaing sorkar pawhin, Aung San Su Kyi sorkar pawhin, an ramhnuai underground pawhin ‘inremna kan mamawh a ni’ tihah khan an lungrual ta thap a, ‘inremna min siampui turin India sorkar lo chu beisei reng kan nei lo’ an ti a, chu chu tuna an au hla a ni a.

India hi tunah chuan a la ngawi ta deuh rih a, eng pawh nise, remna kan siam theih chuan tuna an duh ber a ni a. Ram tha tak, ram hausa tak nei an ni a, khami hmuna kir leha, chumi hmuna an in leh lo tea kir leh theihna tur remna kha an mamawh a ni a, chumi tur chuan kan tawngtaina bawk a ni. Theihtawpin mizo mipui hian chu chu kan duhpui a, India sorkar Pathian-in an thinlungte tihawngin, Burma rama remna siamtuah India sorkar hi a la awm ngei ka ring a, chumi tur atan chuan Mizoram pawh remna entawntlak nei, rawn zir tura lo kal an chak ngawih ngawih, ‘engtin nge inremna in neih kan hre duh a ni’ tia India rama lo kala, Mizoramah ngei pawh lo kala, ‘in inremna neih dan hi kan duh a ni’ tia an hmachhawp mek, amaherawhchu inthlan avanga sukuk ta kha a ni a. Tiang khan a ngai rengin inremna neih pawh an la duh a ni.

Engpawh nise, heng thilah hian Pathianin remchang a la ruat ang a, tuna Burma ram atanga raltlante theihtawpa kan lo tanpui a lawmawmna chu thukhat, rahbi khat ni se, a rahbi pawimawhna chu - remna neia Burma leh India ram, Burma leh Mizoram, north east pum puite inrem taka kan awm tlang a, hetia insum dawn tawmna te pawh buai lova, silai leh drug, smuggling thil leh ralthuamte awm lova tha taka kan awm tlan theihna tur hi Pathianin rem a la ruat ang tih ring ila. Chu chu vawiina kan ngaihtuahna a ni a.

Chuvangin, vawiinah pawh hian Pu Rindika resolution hi a lawmawm ka ti a, vawiina sawiho theihna hun, *Private Members’ Resolution* kan han nei tlat te hi ‘Pathian

remruat a ni' tih hi kei pawh ka ngaihndan a ni a. Kan resolution hi pass ila, kan pass rualin Mizoram news-ah a khat vek ang a, Burma ram news-ah a khat vek ang a, India rama a hre tur awm chinin an hre vek ang a, khawvel, America rama kan unau awmte hian an hre vek bawk ang a; 'A va lawmawm tak em!' an ti vek dawn a ni. Pu Rindika resolution hi nichina kan Home Minister-in a rawn rawt ang khan, '*kan unaute*' tih te pawh telha siamrem kha, rem a tih theih pheih chuan a tha leh zual ang a. Khami ang khan pass ila, kan resolution pass hi, 'khawvel pumpui' tih em em chu a ni lo ang a, mahse, khawvel hmun dang dang atanga lo ngaithla tuten an lo hriat turin; India hian a lo hriat hunah, 'E khai! Leh ta deuh deuh e le' an ti maiin ka ring a. 'I thawnkir em?' an ti ang a; 'E khai, thawnkir chu sawiloh, tanpuina pawisa kan pe' kan han tih pheih chuan, 'ta deuh deuh em e' min ti maiin ka ring a.

Khatieng deuh kha ka ni a. keini legislature hian pass hnan ve reng reng ila, India sorkar pawhin heta tang hian a ngaihtuahna pawh a seng ang a. 'Security Council member nih i duh bawk a, hengte hian a tanpui ang che' a ti tawh kan awm ang a; kan parliament-ah pawh an autir ve ang a, kan hotute pawhin 'ram buai te hmangaihna nei Security Council member ni tlak ngei tan chance a awm e,' tia zuk auchhuah nan pawh a tha turah ngai ila. Vawiina kan resolution lungrual taka pass hi kei pawhin ka rawtna a ni e. Pu Speaker, ka lawm e.

SPEAKER : Awle, kan sawihona a ngaihnawm hle mai, *Chair* atang pawhin. A resolution neitu kan sawm hmain, amendment ang chi a rawtna kha a awm a.

Kan hriat angin, Dan te kan nei ve a, tuna private members' resolution hi, kan dan pheh 21-na, 27-na (1) in a ziah angin, kartir kan session a, a kar tawp Zirtawpni apiangin member ten free takin, zalen takin ram tana tha an tih te House-a sawiho turin chhawp theihna *Right* hmangin a rawn chhawpchuak a. Member zahawm tak Pu Lalrindika Ralte-in Dan ang thlapin a rawn submit a, kan lo pawm a.

Tichuan, kan sawiho a, amaherawh chu, kan sawiho ah khan, a thu hi a original ah chuan – "Kan ram thenawmte atanga sahimna zawng a rawn ralhlante hi kan sorkar hian an awmna tur siamsakin, duat takin enkawl se; awmkhawmna tur hmun bik ngaihtuah sak rawh se" tih a ni a. Kan sorkara Home Minister zahawm tak leh Chief Minister hnen atang pawha kan ngaihlak ang khan, hmun bik siam kha anmahni tan pawh a lo rem lo deuh thei a, chuwangin, 'amend ni se' tia rawtna lo kal kha, kan dan pheh 73-na leh 129-na khan a rawn ziak a – "Member tupawhin amendment a duh chuan, a resolution neitu hnenah a copy a pe ang a, a rawn move tur a ni" tih a ni a. Chu chu kan Home Minister zahawm tak khan, nangma rawn move turin nge a kal ang a, tunge kan tih dawn? 'Any member' a ti a, modified form khan. Tunge ni dawn? (**Pu Lalchamlia, Home Minister:** Pu L. Thangmawia, Secretary kha a tha ang)

Awle, kan resolution neituin a rawn win-dup hunah rem a ti thei a, a rem tilo thei bawk a. Khami hma khan amend an duhdan te rawn thlen turin, Member zahawm tak Dr. L. Thangmawia ka sawm e.

PU L. THANGMAWIA : Pu Speaker, ka lawm e.

Hachhek bialtu MLA zahawm tak Pu Lalrindika Ralte Resolution “*Kan ram thenawmte atanga sahimna zawnga rawn raltlante hi kan sawrkar hian an awmna tur siamsakin, duat takin enkawl se; awmkhawmna tur hmun bik ngaihtuah sak rawh se*” tih chu, Pu Speaker, tuna thil awm tawh dan te han enin leh, Member zahawm tak tak ten vawiina an sawiho dan atangte, sorkar chauh ni lovin, a khawtlang - NGO te, kohhran te, Zoram mipui ina kan lo dawnsawn zawk a nihna lai tam tak te a awm avangin, Pu Speaker, resolution puluttu in min remtih sak pawh kan dil a, heti hian amendment, i remtih nain he House zahawm takah hian ka rawn move e –

“Kan ram thenawm Myanmar leh Bangladesh atanga sahimna zawnga kan unau raltlana lo kal te Mizoram sorkar leh Zoram mipuiten tha taka kan lo dawngsawng hi a lawmawm kan ti a, a tul ang zela lo tuamhlawm chhunzawmin, an awmna tur leh an mamawhte ngaihtuah zel ni se kan ti” tiin ka rawn move e, Pu Speaker.

SPEAKER : Awle. Hei, kan lungruual khawp a, a copy hi min rawn pe sa a; tlang deuha sawi a tha a. Tin, Member zahawm tak, a resolution neitu hnenah a copy pek a ni tawh em? (*Pek tawh a ni a*) Awle, a lawmawm e.

Tunah chuan, a resolution neitu, Member zahawm tak Pu Lalrindika Ralte kan sawm ang a, sawihona te rawn wind up in, adopt han dil nghal turin ka sawm e.

PU LALRINDIKA RALTE: Pu Speaker, ka lawm e.

Vawiinah hian lawmthu sawi ka duh a. Kan inlungruualna hi a fakawm ka ti a, resolution neitu ka nihna ang pawhin lawmthu ka sawi duh bawk a ni.

Ziaktu pakhat chuan, ‘*Ni naran (ordinary day) hian nun a thup a, harsatna hian nun a tlangzarh thin*’ a ti a. Vawiinah hian harsatna karah hian kan in-unauna leh kan inhmangaihna chu tlangzarhin a lo awm ta a. Tin, kan unau raltlante pawhin lo hria se ka duh chu – “kan ram rorelna sang berah in chungchang kan sawi a, a tawp thlengin in tan kan ding dawn a ni” tih hi a ni. *Mizo hnam hi vul zel rawh se.*

Pu Speaker, ka Private Resolution chu - “*Kan ram thenawm Myanmar leh Bangladesh atanga sahimna zawng a kan unau raltlan lo kalte Mizoram sorkar leh Mizoram mipuiten tha taka kan lo dawngsawng hi a lawmawm kan ti a, a tul ang zela lo tuamhlawm chhunzawmin, an awmna tur leh an mamawhte ngaihtuah zel ni rawh*

se” tih a ni a. Hei hi member-ten min pawmpuia, he House-ah hian lungruah taka kan pass tlan turin ka rawn rawt a; chutiang tur chuan member-te pawh ka sawm a ni e. Ka lawm e.

SPEAKER : Awle, hei hi dan dik takah chuan, ‘ni khat tal Secretary hnenah ziaka thlen tur’ tih a ni a. Amaherawhchu, kan dan hian *Speaker* hi a dah lal em mai a, a tawpah, ‘Speaker-in a tidanglam thei ang, a duh chuan’ tih hian a veng zel a, chumi hmang chuan vawiina amendment lo lut hi ka lo pawm a ni.

Kan resolution neitu member zahawm tak Pu Lalrindika Ralte in amendment an rawn dilna te pawmin, a resolution chu adopt a rawn dil ta a, “*Kan ram thenawm Myanmar leh Bangladesh atanga sahimna zawng a kan unau raltlana lo kalte Mizoram sorkar leh Mizoram mipuiten tha taka kan lo dawngsawng hi a lawmawm kan ti a, a tul ang zela lo tuamhlawm chhunzawmin an awmna tur leh an mamawhte ngaihtuah zel ni rawh se kan ti*” tih hi adopt remti apiangin ‘Remti’ ti rawh u le. (**Member:** Remti) Awle. Remti lo kan awm em? Kan awm chuan ‘Remti lo’ ti ula. (*Member remti lo an awm lo a.*)

Awle. Member zahawm tak Pu Lalrindika Ralte Resolution “*Kan ram thenawm Myanmar leh Bangladesh atanga sahimna zawng a kan unau raltlan lo kalte, Mizoram sorkar leh Mizoram mipuiten tha taka kan lo dawngsawng hi a lawmawm kan ti a, a tul ang zela lo tuamhlawm chhunzawmin, an awmna tur leh an mamawhte ngaihtuah zel ni se kan ti*” tih chu House-in lungruah takin adopt ta a ni. (**Pu Lalrindika Ralte:** Pu Speaker, ka lawm e)

Vawiin hi a lawmawm hle mai; ka hriat ve chinah opposition member-te resolution pahnih ni khata passed awm chhun niin ka hria a. Ram tana kan thawhonaah, rilru hmunkhat pua kan awmkhawmnaah a lawmawm ka tiin, lawmthu ka sawi nawn leh a ni.

Tunah chuan kan chawl leh tawh ang a, Ni 27 February, 2023 (Thawhtanni) 10:30 AM ah kan thukhawm leh dawn a nia.

Sitting is adjourned. (4:35 PM)